

萬 有 文 庫

第 二 集 七 百 種

王 雲 五 主 編

唐 會 要

( 六 十 )

王 溥 撰

商 務 印 書 館 發 行

唐 會 要

(六十)

王 溥 撰

國 學 基 本 叢 書

編主五雲王  
庫文有萬  
種百七集二第

唐  
會  
冊  
十  
六  
要

中華民國二十四年九月初版

撰者 王 溥

發行人 王 雲 五  
上海河南路

印刷所 商 務 印 書 館  
上海河南路

發行所 商 務 印 書 館  
上海及各埠

壽

# 唐會要卷九十二

## 內外官料錢下

長慶二年十月勅。司徒兼中書令韓宏。疾未全平。尙須在假將息。其俸料宜從勅下日。便令所司支給。四年五月勅。近日訪聞京城米價稍貴。須有通變。以公濟私。宜令戶部應給百官俸料。其中一半合給段疋者。迴給官中所糶粟。每斗折錢五十文。其段疋委別貯。至冬糶粟填納太倉。時人以爲甚便。

太和四年七月勅。吏部奏。應比遠道州縣官課料。請令依元額料計支給。不得更有欠折。勅旨依奏。其年七月勅。應外任官帶一品正官京職。縱不知政事。且依俸料。宜付所司。並令兼給。

七年三月。戶部侍郎庾敬休奏。應文武九品已上。每月料錢。一半合給段疋絲綿等。伏以自冬涉春。久無雨雪。米價少貴。人心未安。自德音放免。逋懸賑恤貧民。中外羣庶。已感皇慈。至于衣冠之家。素乏儲蓄。朝夕取給。猶足爲憂。以臣愚見。若令百官料錢內。一半停給段疋絲綿等。迴給太倉粟。每斗計七十文。在衆庶必見懽康。于公家無所虧減。待至麥熟。米價稍賤。卽依前卻給段疋等。酌于事理。庶叶變通。勅旨依奏。八年八月。劍南東川觀察使楊嗣復奏。管內普合渝三州刺史元請料錢。每月各四十五貫。請各添至六十貫。勅旨依奏。

九年六月勅宰相俸料宜依元和十四年以前舊例並給見錢。

開成二年八月戶部侍郎李珣奏京諸司六品以下官請假往外府違假不到本官停給料錢勅旨違限停俸料餘依準令式。

四年三月勅侍講學士兼太子少師王起宜兼給料錢。

五年三月中書門下奏準今年二月八日赦節文應京諸司勒留官令本處剋留手力雜給錢與攝官者臣等檢詳諸道正官料錢絕少雜給手力則多今正官勒留亦管公事俸入多少事未得中臣等商議其料錢雜給等錢望每貫割留二百文與攝官其職田祿米全還正官從之。

會昌元年中書門下奏河東隴州鄜坊邠州等道比遠官加給課料河東等道或與王舊邦或陪京近地州縣之職人合樂爲祇緣俸課寡薄官同比遠伏準元和六年閏十二月十二日及元和七年十二月二十日勅河東鳳翔鄜坊邠州易定等道令戶部加給課料錢共六萬二千五百貫文吏曹出得平流官數百員時議以爲至當自後訪聞戶部所給零碎兼不及時觀察使以其虛折皆別將破用徒有加給不及官人近地好官依前比遠臣等商議伏望今日以後令戶部以實物仍及時支遣諸道並委觀察判官專判此案隨月加給官人不得別將破用如有違越觀察判官遠貶觀察使奏取進止選人官成後皆于城中舉債到任填還致其貪求罔不由此其今年河東隴西鄜坊邠州新授比遠官等望許連狀相保戶部

各借兩月之數。加給料錢。至支給時剋下。所冀初官到任。不滯息債。衣食稍足。可責清廉。從之。

### 內外官職田

武德元年十二月制。內外官各給職分田。京官一品十二頃。二品十頃。三品九頃。四品七頃。五品六頃。六品四頃。七品三頃五十畝。八品二頃五十畝。九品二頃。雍州及外州官。二品十二頃。三品十頃。四品八頃。五品七頃。六品五頃。七品四頃。八品三頃。九品二頃五十畝。

貞觀十一年三月勅。內外官職田。恐侵百姓。先令官收。慮其祿薄家貧。所以別給地子。去歲緣有水旱。遂令總停。茲聞卑官頗難支濟。事須優恤。使得自資。宜準元勅。給其地子。

景龍四年三月。勅旨頒行天下。凡屬文武官員五品以下。各加田五畝。五品以上。各加田四畝。

開元十年正月。命有司收內外官職田。以給逃還貧民戶。其職田以正倉粟畝二升給之。

其年六月勅。所置職田。本非古法。爰自近制。是以因循。事有變通。應須刪改。其內外官所給職田地子。從今年九月以後。並宜停給。

十八年三月勅。京官職田。將令準令給受。復用舊制。

十九年四月勅。天下諸州縣。并府鎮戍官等職田頃畝籍帳。仍依允租價對定。無過六斗。地不毛者。畝給二斗。

二十九年二月勅外官職田。委所司準例倉中受納。納畢一時分付。縣官亦準此。

其年三月勅京畿地狹。民戶殷繁。計丁給田。尙猶不足。兼充百官苗子。固難周濟。其諸司官令分在都者。宜令所司具作定額。計應受職田。並於都畿給付。其應退地。委採訪使與本州長官給貧下百姓。其應給職田。亦委採訪使與所由長官勘會同給。仍永爲常式。

天寶元年六月勅。如聞河東河北官人職田。旣納地租。仍收桑課。田樹兼稅。民何以堪。自今以後。官人及公廩職田有桑。一切不得更徵絲課。

十二載十月勅。兩京百官職田。承前佃民自送。道路或遠。勞費頗多。自今已後。其職田去城五十里內者。依舊令佃民自送入城。自餘限十月內。便於所管州縣。并腳價貯納。其腳價五十里外。每斗各徵二文。一百里外。不過三文。並令百官差本司請受。

上元元年十月勅。京官職田。準式並令佃民輸送至京。

廣德二年十月。宰臣等奏。減百司職田租之半。以助軍糧。從之。

大曆二年正月詔。京兆府及畿縣官職田。宜令準外州府縣官例。三分取一分。至十月。減京官職田。一分充軍糧。二分給本官。

十四年八月勅。內外文武官職田。及公廩田。準式。州縣每年六月三十日。勘造白簿申省。與諸司文解勘。

會至十月三十日徵收。給付本官。近來不守常規。多不申報。給付之際。先付清望要官。其間慢舉官。即被延引不付。自今以後。準式各令送付本官。又準式。職田黃籍。每三年一造。自天寶九載以後。更不造籍。宜各委州縣。每年差專知官巡覆。仍造簿。依限申交所司。不得隱漏。及妄破蒿荒。如有違犯。專知官及本典。準法科罰。

貞元四年八月勅。準田令。永業田。職事官從一品。郡王。各五十頃。國公。若職事官正二品。各四十頃。郡公。若職事官從二品。各三十五頃。縣公。若職事官從三品。各二十頃。侯。若職事官正四品。各十四頃。伯。若職事官從四品。各十一頃。

十四年六月。判度支于頔。請收百官闕職田。以贍軍須。從之。元和六年八月詔。百官職田。其數甚廣。今緣水潦。諸處道路不通。宜令所在貯錢。充度支支用。百官卻令據數於太倉請受。

十三年三月詔。百司職田。多少不均。爲弊日久。宜令每司各收職田草粟等數。自長官以下。據多少人作等差。除留闕官外分給。

長慶元年七月勅。百司職田。在京畿諸縣者。訪問本地。多被所由侵隱。抑令貧戶佃食蒿荒。百姓流亡。半在於此。宜委京兆府勘會均配。務使公平。



其年十月勅司兼中書令合屬內官各依舊外再加田五畝七品以下仍舊。

寶歷元年四月制京百司田散在畿內諸縣舊制配地出子歲月已深佃戶至有流亡官曹多領虛數今欲據額均入地盤萬戶供輸百司盡得隨稅出子逐畝平攤比量舊制孰爲允便宜委京兆府與屯田審勘計會條流聞奏。

開成二年五月判國子祭酒事門下侍郎平章事鄭覃奏太學新置五經博士各一人屯田素無職田請依王府官品秩例賜以祿粟從之。

會昌六年十月京兆府奏諸縣徵納京百司官秩職田斛斗等伏請從今已後卻準會昌元年已前舊例上司官斛斗勒民戶使自送納所冀輸納簡便百官各得本分職田縣司所由無因隱欺者並從之。

大中元年十月屯田奏應內外官請職田陸田限三月三十日水田限四月三十日麥田限九月三十日已前上者入後人已後上者入前人伏以令式之中並不該閏月每遇閏月交替者卽公牒紛紜有司卽無定條莫知所守伏以公田給使須準期程時限未明實恐遺闕今請至前件月遇閏卽以十五日爲定式十五日以前上者入後人已後上者入前人據今條其元闕職田並限六月三十日春麥限三月三十日宿麥限十二月三十日已前上者入新人已後上者並入舊人今亦請至前件月遇閏卽以十五日爲定式所冀給受有制永無訴論勅曰五歲再閏固在不刊二稔職田須有定制自此已後宜依屯田所奏。

永爲常式。

唐會要 卷九十二

一六七三



# 唐會要卷九十三

## 諸司諸色本錢上

武德元年十二月置公廩本錢。以諸州令史主之。號捉錢令史。每司九人。補於吏部。所主纔五萬錢以下。市肆販易。月納息錢四千元。歲滿授官。

貞觀元年京師及州縣皆有公廩田。以供公私之費。其後以用度不足。京官有俸賜而已。諸司置公廩本錢。以番官貿易取息。計員多少爲月料。

十一年罷諸司公廩本錢。以天下上戶七千人爲胥士。視防閣制。而收其課。計官多少而給之。十二年復置公廩本錢。諫議大夫褚遂良上疏言七十餘司。更一二歲。捉錢令史六百餘人受職。太學高第諸州進士。拔十取五。猶有犯禁罹法者。況麀肆之人。苟得無恥。不可使其居職。太宗乃罷捉錢令史。復給百官俸。又令文武職事三品以上。給親事帳內。以六品七品子爲親事。以八品九品子爲帳內。歲納錢千五百。謂之品子課錢。凡捉錢品子。無違負者。滿二百日。本屬以簿附朝集使。上於考功兵部。滿十歲量文武授官。

十八年。以京兆府岐同華邠坊州隙地陂澤可墾者。復給京官職田。

二十一年二月令在京諸司依舊置公廩本錢捉以令史府史胥士等令迴易納利以充官人俸至永徽元年廢之以天下租腳直爲京官俸料其後又薄斂一歲稅以高戶主之月收息給俸尋顯以稅錢給之總十五萬二千七百三十緡

光宅元年秘書少監崔沔請計戶均出每丁加升尺所增蓋少流亡漸復倉庫充實然後取於正賦罷新加者至開元十年中書舍人張嘉貞又陳其不便遂罷天下公廩本錢復稅戶以給百官籍內外職田

開元十八年御史大夫李朝隱奏請籍百姓一年稅錢充本依舊令高戶及典正等捉隨月收利將供官人料錢並取情願自捉不得令州縣牽捉

其年復給京官職田州縣籍一歲稅錢爲本以高下捉之月收贏以給外官復置天下公廩本錢收贏十之六

天寶元年員外郎給料天下白直歲役丁十萬有詔罷之計數加稅以供用人皆以爲便自開元後置使甚衆每使各給雜錢

至德二年七月宣諭使侍御史鄭叔清奏承前諸使下召納錢物多給空名告身雖假以官賞其忠義猶未盡才能今皆量文武才藝兼情願穩便據條格議同申奏聞

乾元元年勅長安萬年兩縣各備錢一萬貫每月收利以充和雇時祠祭及蕃夷賜宴別設皆長安萬年

人吏主辦二縣置本錢配納質債戶收息以供費諸使捉錢者給牒免徭役有罪府縣不敢劾治民間有不取本錢立虛契子孫相承爲之

寶應元年勅諸色本錢比來將放與人或府縣自取及貧人將捉非惟積利不納亦且兼本破除今請一切不得與官人及窮百姓并貧典吏揀擇當處殷富幹了者三五人均使翻轉迴易仍放其諸色差遣庶得永存官物又冀免破家

大歷六年三月勅軍器公廩本錢三千貫文放在人上取利充使以下食料紙筆宜於數內收一千貫文別納店鋪課錢添公廩收利雜用

貞元元年四月禮部尙書李齊運奏當司本錢至少廚食闕絕請準秘書省大理寺例取戶部闕職官錢二千貫文充本收利以助公廚可之

其年九月八日勅自今後應徵息利本錢除主保逃亡轉徵鄰近者放免餘並準舊徵收其所欠錢仍任各取當司闕官職田量事糶貨充填本數并已後所舉不得過二十貫

十二年御史中丞王顏奏簡勘足數十王廚二十貫十六王宅三百九十二貫門下省三千九百七中書省五千九百

集賢院四千四百六十崇元館五百宏文館七百二十六太清宮一千史館一千三百一尙書都省一萬二百一十五

吏部尚書銓。三千一百八十。東銓。二千四百四十五。西銓。二千四百三十三。南曹。五百八十。甲庫。二百八十四。功狀院。二千五百。實文。三百一十文。實六百六十一文。實六十五文。實文。百貫文。

流外銓。三百。急書。五百。主事。五百。白院。五千六百二十。考功。一千五百二十六。司勳。二百二十。兵部。六千五百二十。實文。十三貫文。實一百九十五文。實八貫文。五百五十二文。戶部。

六千貫五百。工倉部。四百二十七貫。刑部。六十。禮部。三千五百二十八。工部。四千三百二十。實文。三百三十文。實文。五百三十七文。實五百五十九文。御史臺。一萬八千五百五十六文。實文。三百三十文。實文。九十一貫文。東都。

御史臺。五百。西京觀察使。五千四十六。三衛使。五百。軍器使。二千一百九十一。監食使。七十四。實文。八百五文。實文。五百三十五文。實一百三十文。實五十文。秘書省。四千七百。殿中。

省。二百三十八。太常寺。一萬四千二百五。太常禮院。一千七百。光祿寺。一百五十五。衛尉寺。一千二百四。實五百文。實十四貫八百文。實百貫文。實六貫文。實八百七文。實文。十四貫文。宗正寺。一千八百八。

大理寺。五千九十二。太僕寺。三千。鴻臚寺。六千六百五。司農寺。五千六百五。太倉諸色供。七百八十七。實八百文。實文。三百二十九文。實文。二百八十二文。實文。四百二十四文。太府寺。

二千二百八十。左藏庫將作監。七百。少府監。六百七十八。中尚。七百七。國子監。三千三百八十二。詹事府。一千七百一。實六百三。實文。七百文。實七百文。實十貫文。實三百六十文。實文。六貫七百三十。

家令寺。七百八十七。僕寺。四百。左春坊。一百八十四。右春坊。二百八。崇文館。八百一。司天臺。二百八。實九百文。實文。六百文。實十貫文。實文。十貫文。實文。十貫文。皇城留守。二百。

三十四貫。右金吾衛。九千。右金吾引駕仗。三千三百六。右街使。一千八百六十。左金吾衛。九千九。實文。九千。實文。十九貫文。實八百三十文。實五百文。左金吾引駕仗。

六千一百。左街使。三千九百十六。總監。三千。京兆府。四萬八千八百八十。京兆府御遞院。二千五百。實文。三百八十文。實文。九貫二百二十四文。實百貫文。

二十一年正月制百官及在城諸使息利本錢徵放多年積成深弊宜委中書門下與所司商量其利害條件以聞不得擅有禁錢務令通濟

其年七月中書門下奏勅釐革京百司息利本錢應徵近親及重攤保并遠年逃亡等今年四月十七日勅本利并放訖其本事須借錢添填都計二萬五千九百四十三貫六百九十九文伏以百司本錢久無疏理年歲深遠亡失頗多食料既虧公務則廢事須添借令可支持伏望聖恩許令準數支給仍請以左藏庫度支除陌錢充勅旨宜依

### 諸司諸色本錢下

元和二年六月中書門下上言聖政維新事必歸本疏理五坊戶色役令府縣卻收萬民欣喜恩出望外臣等敢不釐革舊弊率先有司其兩省納課陪廚戶及捉錢人總一百二十四人望令歸府縣色役勅旨從之

六年四月御史臺奏諸使慮有捉利錢戶請同臺省例如有過犯差遣並任府縣處置從之

其年五月御史中丞柳公綽奏請諸司諸使應有捉利錢戶其本司本使給戶人牒身稱準放免雜差遣夫役等如有過犯請牒送本司本使科責府縣不得擅有決罰仍永爲常式者臣昨因奉進止追勸閑廢使下利錢戶割耳進狀劉嘉和訴被所由分外科配等事由因勘責劉嘉和所執牒身所引勅文檢勅不



獲牒閑廩使勘勅下年月日。又稱遠年文案失落。今據閑廩使利錢案。一使之下。已有利錢戶八百餘人。訪聞諸使。並同此例。戶免夫役者。通計數千家。況犯罪之人。又常僥倖。所稱捉利錢戶。先亦不得本錢。百姓利其牒身。情願虛立保契。文牒一定。子孫相承。至如劉嘉和。情願充利錢戶。事由緣與人毆鬪。打人頭破時。便於閑廩使情願納利錢。得牒身免府縣科決。實亦不得本錢。已具推問奏聞。訖伏奉進止。今臣具條流奏聞者。今請諸司諸使所管官錢戶。並依臺省舉本納利人例。諸司諸使更不得妄有準勅給牒身。免差遣夫役。及有過犯。許任府縣處分。如官典有違。請必科處。使及長官。奏聽進止。其先給牒者。並仰本司本使收毀。入後在人戶處收毀不盡。其官典必有科責。其捉錢戶。原不得本錢者。亦任使不納利。庶得州府不失丁夫。姦人免有僥倖。勅旨宜依。

九年十一月。戶部奏。準八月十五日勅。諸司食利本錢。出放已久。散失頗多。各委本司勘會。其合徵錢數。便充食錢。若數少不充。以除陌五文錢。量其所欠。添本出放者。令準勅各牒諸司勘會。得報。據秘書省等

三十二司牒。應管食利本錢物五萬三千九百五十二貫九百五十五文。各隨司被逃亡散失。見在徵數額。與元置不同。今但據元置數額而已。 秘

書省。三千三百八十貫。四貫五百文。 太常寺。六千七百二十貫。六貫六百六文。 光祿寺。一千二百九十貫。九貫六十四文。 宗正寺。一百十七貫。九十五文。 衛尉寺。一千二百五十五貫。十貫九百文。 太僕寺。一千九百

五百。大理寺。五千九百二十四貫。七貫四百四十文。 鴻臚寺。二千六百貫。十貫。 司農寺。二千七百三十五貫。九百文。 太府寺。一千五百八十八貫。九百九十貫。 殿中省。九百九十貫。五百五十文。 詹事

府。一千一百九十一  
 國子監。二千六百四十四  
 少府監。一千三百三十四  
 將作監。一千六百  
 左春坊。一千三百八  
 右春坊。一  
 千  
 實三百七十七文  
 實二百五十文  
 實七百三十一文  
 實七百七文  
 實三百八十  
 實三百三十  
 實三百七十四  
 尚輦局。一百  
 太倉。二千四百十五貫  
 內中局。六百三十六  
 萬年縣。三千四百  
 長安縣。二千七百四十五  
 左衛。  
 實三百文  
 實文。六百八十一文  
 實二百文  
 實六百文  
 實四百三十三文  
 實三百八  
 一千八百一  
 太僕寺。四百三十六貫  
 總監。二千六百七  
 左藏庫。六百二  
 尚食局。三百三十  
 尚舍  
 十貫文  
 十貫七百文  
 六百五十文  
 十二貫文  
 十貫文  
 八貫文  
 五百四  
 左司禦帥府。二百一  
 右司禦帥府。一百  
 勅宜委御史臺仔細簡勘。具合徵放錢數。及量諸司開劇人目。  
 加減條流奏聞。

其年十二月勅。比緣諸司食利錢。出舉歲深。爲弊頗甚。已有釐革。別給食錢。其御史臺奏所勘責秘書省  
 等三十二司食利本錢數內。有重攤轉保。稱甚困窮者。據所欠本利並放。其本戶中納利。如有十倍已上  
 者。既緣輸利歲久。理亦可矜。量准前本利並放。其納經五倍已上。從今年十二月以前。應有欠利並放。起  
 元和十年正月已後。準前計利徵收。其餘人戶等。計其倍數。納利非多。不可一例矜放。宜並委本司準前  
 徵納。其諸司所徵到錢。自今以後。仍於五分之一中。常抽一分。留添官本。各勒本司以後相承收管。其諸司  
 應見徵納。及續舉放所收利錢。並準今年八月十五日勅。充添修司廨宇什物。及令史驅使官廚料等用。  
 仍委御史臺勾當。每常至年終。勘會處分。其諸司除疏理外。見在本錢。據額更不得破用。如有欠失。即便  
 勒主掌官典所由等。據數填賠。其中書門下兩省。及尚書省御史臺。應有食利錢外。亦便令準此條流處

分。

十年正月。御史臺奏。秘書省等三十二司。除疏理外。見在食利本錢。應見徵納及續舉放。所收利錢。進勅並充添修當司廨宇什物。及令史驅使官廚料等用。準元和九年十二月二十九日勅。仍委御史臺勾當。每至年終。勘會處分。及諸司疏理外。見在本錢。據額不得破用。如有欠失。即便勒主掌官典所由等填陪者。其諸司食利本錢疏理外。合徵收者。請改案額爲元和十年新收置公廨本錢。應緣添修廨宇什物。及令史府史等廚並用。勒本司據見在戶名錢數。各置案歷。三官通押。逐委造帳。印訖入案。仍不得侵用本錢。至年終勘會。欠少本利官典。諸節級準法處分。庶官錢免至散失。年額既定。勾當有憑。勅旨宜依。

十一年八月勅。京城百司諸軍諸使。及諸道應差所由。并召人捉本錢。右御史中丞崔從奏。前件捉錢人等。比緣皆以私錢添雜官本。所防耗折。裨補官利。近日訪聞商販富人。投身要司。依託官本。廣求私利。可徵索者。自充家產。或逋欠者。證是官錢。非理逼迫。爲弊非一。今請許捉錢戶添放私本。不得過官本錢。勘責有贖。並請沒官。從之。

其年九月。東都御史臺奏。當臺食利本錢。從貞元十一年至元和十一年。息利十倍以上者。二十五戶。從貞元十六年至元和十一年。息利七倍以上者。一百五十六戶。從貞元二十年至元和十一年。息利四倍以上者。一百六十八戶。伏見去年京畿諸司本錢。並條流甄免。其東都未蒙該及者。竊以淮寇未平。供饋

尙切人力少疲。衣食屢空。及納息利年流。正身旣沒。子孫又盡。移徵親族。旁支無支。族散徵諸保人。保人逃死。或所由代納。縱倪施孤獨。仰無所依。立限踰年。虛繫錢數。公食屢闕。民戶不堪。伏乞天恩。同京諸司例。特甄減裁下。勅旨從奏。

十二年正月。門下省奏。應管食利本錢。總三千四百九十八貫三百二十一文。宰相已下至主錄等食利三百七十八貫三百四十餘文。直省院本

錢。準建中三年四月十五日勅。以留院入錢置本。中書省奏。當省食利本錢。共五千貫文。宰相以下官至主錄等食利錢一千貫。直省院食利本錢。準建中二年四月勅。當院自斂置本。準元和

九年十二月九日勅。令勘會疏理。其見在合徵錢。準勅合充添修當司廨宇什物。其省院本錢。緣是當院自斂置本。請便充本添廚等用。勅旨依奏。

十四年十月。御史中丞蕭俛奏。應諸司諸軍諸使公廨諸色本利錢等。伏緣臣當司及秘書省等三十二司利錢。伏準本年七月十三日敕文。至十倍者。本利並放。展轉攤保。至五倍者。本利並放。緣前件諸司諸使諸軍利錢。節文並不該及。其中有納利百姓。見臣稱訴。納利已至十倍者。未蒙一例處分。求臣上達天聽。臣已面陳奏訖。伏以南北諸司。事體無異。納利百姓。皆陛下赤子。若恩澤均及。則雨露無偏。伏望聖慈。特賜放免。勅旨從奏。

十五年二月詔。內外百官食利錢。十倍至五倍以上。節級放免。仍每經十年。卽內外百司各賜錢一萬貫。

充本據司大小公事閒劇及當司貧富作等第給付。

其年八月賜教坊錢五千貫充本以收息利。

長慶元年三月勅添給諸司本錢準元和十五年五月十一日勅內外百司準二月五日敕文宜共賜錢一萬貫文以戶部錢充仍令御史臺據司額大小公事閒劇爲等第均配。

三年十一月賜內園本錢一萬貫軍器使三千貫。

其年十二月賜五坊使錢五千貫賜威遠鎮一千貫以爲食利。

太和元年十二月殿中省奏尙食局新舊本錢總九百八十貫文伏以尙食貧虛更無羨餘添給伏乞聖慈更賜添本錢二千貫文許臣別條流方圓諸色改換收利支用庶得不失公事勅旨賜本錢一千貫文以戶部五文抽貫錢充。

七年八月勅中書門下省所將本錢與諸色人給驅使官文牒於江淮諸道經紀每年納利並無元額許置如聞納利殊少影射至多宜並勒停兩省先給文牒仍盡追收其去年所減人數雖挾名尙執兩省文牒亦宜收訖聞奏以後不承正勅不在更置之限。

開成三年七月勅尙書省自長慶三年賜本錢後歲月滋久散失頗多或息利數重經恩放免或民戶逋欠無處徵收如聞尙書丞郎官入省日每事闕供須議添助除舊賜本錢徵利收及吏部告身錢外宜每

月共賜一百貫文。委戶部逐月支付。其本錢任準前收利添充給用。仍委都省納勒舊本。及新添錢量多少均配。逐行分析聞奏。

四年六月。上御紫宸殿。宰臣李珣奏。堂廚食利錢一千五百貫文。供宰相香油蠟燭。捉錢官三十人。頗擾百姓。今勘文書堂頭。共有一千餘貫。所收利亦無幾。臣欲總收此錢。用自不盡。假令十年之後。更無此錢。直令戶部供給亦得。兩省亦有此錢。臣亦欲商量。共有三百餘人。在外求利。米鹽細碎。非國體所宜。上曰。太細碎。楊嗣復曰。百司食利。實爲煩碎。自貞觀以後。留此弊法。臣等卽條流聞奏。乃奏宰臣置廚捉錢官。並勒停。其錢並本錢追收。勒堂後驅使官置庫收掌。破用量入計費。十年用盡後。卽據所須。奏聽進止。勅旨。宜依。

會昌元年正月。勅節文。每有過客衣冠。皆求應接行李。苟不供給。必致怨尤。刺史縣令。但取虛名。不惜百姓。宜委本道觀察使。條流景縣大小。及道路要僻。各置本錢。逐月收利。或觀察使前任臺省官。不乘館驛者。許量事供給。其錢便以留州留使錢充。每至年終。由觀察使。如妄破官錢。依前科配。並同入已贓論。仍委出使御史糾察以聞。

其年四月。河南府奏。當府食利本錢。出舉與人。勅旨。河南府所置本錢。用有名額。旣無別賜。所闕則多。宜令改正名額。依舊收利充用。

其年六月。河中晉絳慈陞等州觀察使孫簡奏。準敕書節文。量縣大小。各置本錢。逐月四分收利。供給不乘驛前觀察使刺史前任臺省官等。晉慈陞三州。各置本錢。訖得絳州申。稱無錢置本。令使司量貸錢二百貫充置本。以當州合送使錢充。勅旨宜依。仍付所司。

是月。戶部奏。準正月九日勅文。放免諸司食利錢。每年別賜錢三萬貫文。充諸司公用。今準長慶三年十一月九日勅。賜諸司食利本錢。共八萬四千五百貫文。四分收利。一年祇當四萬九千九百九十二貫文。今請落下徵錢。驅使官二百文課。並更請於合給錢內。四分中落一分。均攤分配。所得新賜錢。均給東都臺省等一十四司。雖落下一分錢。緣置驅使官員。於人戶上徵錢。皆被延引。雖有四分收利之名。而無三分得利之實。今請每月合得利錢數外。更添至三百貫文。內侍省據自司報牒。稱省內公用稍廣。利錢比於諸司最多。今請於合得錢外。亦添至三百貫文。兵部吏部尙書等銓一十一司。緣有舊本錢。準勅放免。又有公事。今請每月共與一百五十貫文。臣今於新賜外。更請添賜上件錢。所費不廣。所利至多。則內外諸司。永得優足。伏望聖恩。允臣所奏。勅旨宜依。

二年正月勅。去年敕書所放食利。祇是外百司食錢。令戶部共賜錢訖。若先假以食利爲先。將充公用者。並不在放免。如聞內諸司息利錢。皆以食利爲名。百姓因此亦求蠲免。宜各委所司。不在放免之限。

# 唐會要卷九十四

## 北突厥

高祖初起義兵晉陽。劉文靜曰：與突厥相結，資其士馬，以益兵勢。從之。自爲手啓，遣始畢可汗云：欲舉義兵，迎主上。若能與我俱南，願勿侵暴百姓。若但和親，坐視受寶貨，亦惟可汗所擇。始畢得啓，謂其臣曰：隋主爲人，我所知也。若迎以來，必害唐公而擊我無疑。苟唐公自爲天子，我當以兵馬助之。卽復書，將佐皆請從。突厥言：帝不可。裴寂乃請尊隋主爲太上皇，立代王爲帝，以安隋室。旗幟雜用絳白，以示突厥。帝曰：此掩耳偷鈴，然逼於時事，不得不然。乃許之。煬帝十三年六月，遣使如北突厥，突厥遣康鞘利等送馬千匹，許發兵送帝入關。帝受書，命劉文靜報突厥，以請兵。帝私謂文靜曰：胡騎入中國，生民之大蠹，我所以欲得之者，恐劉武周引之爲患。又胡馬行牧，不費芻粟，聊欲藉爲聲援。數百人之外，無所用之。八月，帝克臨汾絳郡。劉文靜以突厥兵至，遂下韓城。帝卽位之五月，突厥遣使來，時突厥強盛，自契丹室韋西盡吐谷渾，高昌諸國皆臣之。又恃功驕倨，每遣使至，多暴橫。帝亦優容之。

武德元年八月，遣鄭元璠以女妓賂始畢可汗。始畢遣使來報，帝宴之，引升御座以寵之。

二年二月，始畢死。其弟處羅可汗立。八月，梁王師都與突厥合數千騎寇延州，總管段德操擊破之。十一



月師都請爲鄉導謀大舉入寇是月處羅死其弟頡利可汗咄苾立

三年五月頡利恃其士馬雄盛有憑陵中國之志言辭驕慢求請無厭又王世充使說之曰昔啓民奔隋賴文帝力有此土宇子孫享之宜奉楊政道煬帝孫代唐以報文帝之德頡利然之至是寇汾陽

四年三月頡利遣使送鄭元璿等還先是處羅與劉武周寇并州遣元璿諭以禍福不從未幾處羅死疑璿毒之留不遣又遣漢陽公瓌使頡利頡利欲令瓌拜不屈亦留之復遣使賂頡利且許結婚遂遣使送還

六月寇定州八月寇并州遣鄭元璿詣頡利責以負約因說以得唐地不能居虜掠所得皆入國人於可汗何有不如還師修好坐受金幣孰與棄昆弟積年之歡結子孫無窮之怨頡利悅引兵還

七年閏七月秦王世民與虜遇於豳州頡利突利二可汗率萬騎奄至城西秦王帥騎馳詣虜陣告之曰國家與可汗和親何爲負約深入我地我秦王也能鬪獨出與我鬪若以衆來我直以此百騎相當耳頡利不應又遣騎前告之爾往與我盟有急相救今乃相攻何無香火情突利亦不應頡利見秦王輕出又聞香火之言疑突利與王有謀乃遣止之曰王不須渡我但欲申固盟約耳兵少卻後雨久虜弓筋膠俱解秦王潛師夜進頡利大驚乃請和親

九年秋七月頡利寇邊先是與突厥書用敵國禮帝欲改用詔勅突厥遂寇靈相潞沁韓朔等州張瑾全

軍沒。溫彥博爲虜所執。靈州都督任城王道宗擊破之。請和而退。

貞觀二年四月。頡利以薛延陀回紇等叛。遣突利討之。敗還。頡利拘而撻之。突利怨。表請入朝。

十一月。突厥北邊多叛。頡利歸薛延陀。共推其俟斤夷男爲可汗。夷男不敢當。上方圖頡利。乃遣使閒道。册夷男爲眞珠毘伽可汗。夷男建牙于大漠之鬱督軍山下。回紇拔野古阿跌同羅僕骨。霫諸部皆屬。遂遣弟入貢。三年十一月。頡利因薛延陀之封。大懼。始遣使稱臣。請尙公主。代州都督張公瑾上。突厥可取六狀。乃命李靖爲行軍總管討之。公瑾爲副。突厥俟斤九人及拔野古僕骨同羅奚酋長。並率衆來降。復以李靖等分道出擊。十二月。突利入朝。太宗喜曰。朕治安中國。四夷自服。豈非上策乎。

四年二月。李靖襲破突厥于陰山。頡利遁依沙鉢羅。設蘇尼失部落。王道宗引兵逼之。使蘇尼失執頡利。張寶相取之以獻。蘇尼失舉衆降。漠南遂空。

十年正月。突厥阿史那社爾降。社爾處羅之子。年十一。以智略聞。處羅以爲拓設。建牙于磧北。頡利亡。西突厥亦亂。社爾詐之。襲取其地幾半。衆十餘萬。乃曰。破我國者。薛延陀也。我當報仇。擊滅之。諸部皆諫。不從。大敗。遂率衆降。

十三年四月。突利之弟結社率。貞觀初入朝。爲中郎將。久不進秩。從幸九成宮。陰結故部落四十餘人。夜襲御營。折衝孫武開等帥衆擊之。盜馬北走。追斬之。

七月自結社率之反羣臣皆言留河南不便乃賜懷化郡王阿史那思摩姓李氏立爲泥熟俟利苾可汗賜鼓纛使率其種落突厥咸憚薛延陀不肯出塞上賜延陀璽書言前破突厥止爲頡利爲百姓之害今册還其故國爾薛延陀受册在前突厥受册在後當以先後爲大小無故抄掠發兵問其罪薛延陀奉詔乃遣王孝恭等齎册立之

十八年十一月突厥泥熟俟利苾北渡河延陀惡之數相攻擊俟利苾有衆十萬不能撫御悉南渡河請處勝夏之間許之羣臣言陛下方遠征遼左而置突厥於河南距京師不遠豈得不爲後患上曰夷狄亦人以德治之可使如一家且彼不北走延陀而歸我其情可見俟利苾旣失衆輕騎入朝

二十一年冬十一月突厥車鼻遣使入貢車鼻本頡利同族頡利敗諸部欲立之薛延陀方強不敢當率衆歸之延陀因其有勇略恐爲後患欲殺之車鼻逃建牙金山之北餘衆稍歸之及延陀敗車鼻勢益張遣子入貢又請入朝遣使徵之卒不至正月遣右驍衛郎將高侃擊車鼻車鼻本無罪帝因安市班師欲立奇功以雪恥耳

永徽元年九月高侃擊車鼻軍至阿息山車鼻發諸部兵皆不應遂以百騎走侃追獲之送京師諸部盡內附置單于瀚海二都護府十都督二十二州分統之自是北邊無寇三十餘年

咸亨元年三月勅突厥酋長子弟給事東宮

調露元年十月單于大都護府突厥阿史德溫傳奉職二部俱反立阿史那泥熟爲可汗二十四州酋

長皆叛。衆數十萬。遣蕭嗣業等討之。屢捷。會大雪。突厥襲其營。爲虜所敗。永隆元年三月。以裴行儉爲定襄道大總管。將兵以討之。大破于黑山。擒奉職。泥熟荀爲其下所殺。以首來降。

開耀七年。阿史那伏念自立爲可汗。與阿史德溫傳連兵爲寇。詔復以行儉爲大總管。曹懷舜副之。引兵討伏念。先遣裨將程務挺掩金牙。襲獲伏念妻子輜重。伏念北走。又使務挺等追躡之。伏念遂執溫傳以降。餘黨悉平。歸斬伏念溫傳於都市。

永淳元年十月。突厥餘黨阿史那骨篤祿。阿史德元珍等。招集亡散。寇并州。代州都督薛仁貴將兵擊之。虜以仁貴流象州死。仁貴免胄示之。而虜失色。下馬列拜引去。仁貴因奮擊大破之。

宏道元年二月。突厥寇定州。圍單于都護府。五月。寇蔚州。

嗣聖四年七月。骨篤祿寇朔州。武后遣黑齒常之等擊之。骨篤祿散走。磧北。長壽二年九月。武后以僧懷義討之。十年九月。骨篤祿死。弟默啜立。十一年三月。復遣僧懷義討默啜。十二年十月。默啜遣使請降。

聖歷元年三月。默啜請爲其女求婚。武后遣閻知微等册爲遷善可汗。初。虜降者多處於豐勝靈夏朔代六州。至是默啜求之。乃悉驅降戶歸之。并許其婚。由是默啜益強盛。

其年八月。太后以武承嗣子延秀入突厥。納其女。默啜謂知微等曰。我世受李氏恩。欲以女嫁李氏。安用

武氏兒聞李氏惟兩兒在。我將兵輔立之。以知微爲南面可汗。發兵寇媯澶等州。移書曰。我可汗女當嫁天子兒。武小姓罔冒爲婚。我爲此起兵。欲取河北耳。九月。陷趙州。武后以帝爲皇太子。河北道元帥狄仁傑副之。將兵討之。默啜北遁。追之不及。

二年十月。默啜立其弟咄悉葡萄爲左廂察。骨篤祿子默矩爲右廂察。各主兵二萬餘。其子匄俱爲小可汗。位在兩察上。主處木昆等十姓兵四萬餘。又號爲拓西可汗。

大足二年正月。默啜寇鹽夏。遂寇并州。遣薛季昶等禦之。

神龍二年十二月。默啜寇鳴沙。進寇原會等州。掠隴右牧馬萬餘匹而去。詔訪羣臣禦寇計策。

景雲二年正月。默啜遣使請和。親遣和逢堯使突厥。逢堯說默啜曰。處密堅昆聞可汗結婚於唐。皆當歸附。何不襲唐冠帶。使之聞之。默啜許諾。明日。幘頭紫衫。再拜稱臣。

開元三年。默啜旣請和。稱臣。至是復圍北庭。九月。遣薛訥討之。四年六月。默啜爲拔曳固斬首來降。

### 西突厥

西突厥曷娑那可汗。入朝於隋。留之。國人立其叔父射匱可汗。射匱者。達頭之孫。旣立。拓地東至金山。西至海。遂與北突厥爲敵。建庭於龜茲北三彌山。射匱卒。弟統葉護可汗立。勇而有謀。北并鐵勒。控弦十萬。據烏孫故地。又移庭於石國北千泉。西域諸國皆臣之。統葉護各遣其吐屯監督征賦。

武德元年八月。以西突厥曷娑那可汗爲歸義王。曷娑那獻大珠。帝曰。珠誠至寶。然朕寶王赤心。珠無所用之。竟還之。

二年八月。曷娑那在長安。北突厥遣使請殺之。不許。羣臣皆曰。保一人而失一國。後必爲患。秦王曰。人窮歸我。殺之不義。久之。引曷娑那入內殿。旣而送中書省。縱北突厥使者殺之。

八月。西突厥高昌各遣使入貢。

八年夏四月。統葉護遣使請婚。帝問裴矩。矩對曰。今北寇方強。國家且當遠交而近攻。臣謂宜許其婚。以威頡利。俟數年之後。徐思其宜。上從之。

貞觀八年十月。西突厥咄陸可汗死。其弟沙鉢羅咄唎失立。

十二年十二月。西突厥分爲十部。每部酋長各賜一箭。謂之十箭。又分左右廂。左廂號五咄陸部。置五大噶。右廂號五弩失畢部。置五大俟斤。通謂之十姓部落。至是。唎失失衆心。爲其臣所襲。遂走焉耆。尋復得其故地。西部遂立欲谷設爲乙毗咄陸可汗。中分其地。

十三年十二月。西突厥唎失可汗死。子乙毗沙鉢羅葉護立。號南庭。咄陸爲北庭。

十五年五月。咄陸可汗殺沙鉢羅可汗。

十六年。咄陸旣并沙鉢羅之衆。自恃強盛。遣兵寇伊州。安西都護郭孝恪擊破之。是年。咄陸擊破米國。不

分虜獲與其下。又斬其將泥熟噉。泥熟噉部將胡祿屋襲擊之。咄陸走保白水胡城。所部詣闕請廢之。上遣使立莫賀咄之子爲乙毗射匱可汗。率諸部擊咄陸。敗之。使人招其故部落。皆曰。使我千人戰死。一人獨存。亦不汝從。咄陸自知不爲衆附。乃奔吐火羅。

十九年六月。乙毗射匱可汗遣使入貢。且請婚。許之。使割龜茲于闐疏勒朱俱波葱嶺五國。以爲聘禮。二十二年四月。葉護賀魯來降。咄陸旣奔吐火羅。部落亡散。其葉護阿史那賀魯帥其餘衆數千帳內屬。詔以爲瑤池都督。

永徽三年七月。賀魯招集離散。廬帳漸盛。聞太宗崩。遂叛。擊破射匱。滅之。勝兵數十萬。與乙毗咄陸連兵。處月處密及西域諸國多附之。進寇庭州。攻陷金嶺城。詔梁建方契苾何力發兵及回紇以討之。

四年十二月。乙毗咄陸死。子頡苾達度設號眞珠葉護。與沙鉢羅有隙。尋爲沙鉢羅所併。六年五月。屯衛大將軍程知節將兵討沙鉢羅。不克。

顯慶二年正月。遣蘇定方等復擊沙鉢羅。定方至是曳咭河西。沙鉢羅帥十萬拒戰。擊敗之。會大雪。平地二尺。定方曰。虜恃雪深。謂我不能進。亟追之可及也。又斬獲數萬。沙鉢羅脫走趣石國。諸部各歸所居。乃命蕭嗣業追獲之。遂分其地置昆陵濛池二都護府。以彌射爲興昔亡可汗。押五咄陸部落。步眞爲繼。往絕可汗。押五弩失畢部落。

龍朔二年十月勅興昔亡繼往絕二可汗發兵與蘇海政討龜茲繼往絕素與興昔亡有怨密請海政矯勅收斬之其部落亡走海政追討平之繼往絕尋死十姓無王附于吐蕃

三年十月西突厥寇庭州刺史來濟將兵拒之不能禦遂赴敵死

永淳元年四月阿史那車簿圍弓月安西都護王方翼救之三姓咽麴與車簿合兵拒方翼戰于熱海分遣裨將襲破之擒其酋長三百人西突厥遂平

嗣聖三年九月以突厥斛瑟羅爲繼往絕可汗

長壽二年十月西突厥十姓自垂拱以來爲東突厥所侵掠散亡略盡繼往絕可汗斛瑟羅收其餘衆入居內地武后以爲竭忠事主可汗

長安四年正月周以阿史那懷道爲西突厥十姓可汗

### 沙陀突厥

貞觀十二年九月上以薛延陀強盛恐後難制分封其二子皆爲小可汗各賜鼓纛外示優崇實分其勢十五年十一月薛延陀眞珠可汗聞將東封境內以虛我此時取思摩奴如拉朽乃命其子大度設勒諸部兵合二十萬擊突厥思摩不能禦率部落入長城保朔州遣使告急詔遣李世勣等分道擊之十二月世勣敗薛延陀于諾真水捕獲五萬餘大度設脫走



十六年十月。上謂侍臣曰。薛延陀屈強。今禦之有二策。苟非發兵殄滅之。則與之婚姻以撫之。房元齡曰。兵凶戰危。臣以爲和親便。卽命兵部侍郎崔敦禮持節使薛延陀。許以新興公主妻之。

十七年。眞珠使其姪來納聘。獻羊馬。契苾何力上言。薛延陀不可與婚。上曰。我許之矣。可食言乎。何力曰。願且遷延。勅夷男使親迎。彼必不敢來。則絕之矣。上乃召眞珠可汗會禮。眞珠欲行。其臣不可。謂往必不返。眞珠謂天子聖明。遠近朝服。今親幸靈州。以愛主妻我。我得見天子。死亦不恨。薛延陀何患無君。因多以羊馬爲聘禮。路經沙磧。耗死過半。乃責以聘禮不備。絕之。褚遂良上疏曰。往者夷夏咸言陛下欲安百姓。不愛一女。莫不懷德。今忽有改悔之心。得少失多。竊爲國家惜之。嫌隙旣生。必構邊患。彼國蓄見欺之怒。此土懷負約之慚。恐非所以服遠人。訓戎士也。不聽。薛延陀本無府庫。至是厚斂諸部。以充聘財。諸部怨叛。延陀由是衰弱。

十九年九月。眞珠二子。長曰曳莽。次曰拔灼。初分立爲小可汗。至是。眞珠死。拔灼殺其兄曳莽而自立。是爲多彌可汗。十二月。薛延陀寇夏州。

二十年正月。夏州兵擊薛延陀。大破之。

二十一年八月。多彌猜徧好殺。廢父時貴臣。專用己所親昵。國人不附。回紇諸部落擊之。大敗。上詔王道宗等將兵擊之。國中驚擾。多彌出走。回紇殺之。盡據其地。餘衆西走。猶七萬。共立眞珠兄子咄摩支。遣使

奉表請居鬱督軍山之北。詔遣使安集之。鐵勒九姓酋長聞其來，皆懼。朝議亦恐其爲磧北之患，乃遣李世勣圖之。上自幸靈州招撫之。世勣至鬱督軍山，咄摩支降。道宗兵旣渡磧，薛延陀餘衆拒戰。道宗擊破之，遣使招諭鐵勒諸部，其酋長皆喜，請入朝。駕至浮陽，回紇等十一姓各遣使歸命，乞置官司。上喜，遣使納之。詔曰：朕聊命偏師，遂擒頡利，始宏廟略，已滅延陀。鐵勒百餘萬戶，請爲州郡，混元以降，書未前聞，宜備禮告廟，仍頒示普天。下又爲詩曰：雪恥酬百姓，除凶報千古。勒石於靈州。

景龍二年十一月，突騎施烏質勒卒，子娑葛自立爲可汗。故將闕啜忠節不服，數相攻擊，遣馮嘉賓持節安撫忠節。呂守素處置四鎮，以牛師獎爲安西副都護，發甘涼兵兼徵吐蕃，以討娑葛。忠節逆嘉賓於討舒河口，娑葛遣兵襲之，擒忠節，殺嘉賓。守素、牛師獎與娑葛戰敗，遂陷安西，斷四鎮路。大都護郭元振表娑葛狀直，遂赦娑葛，立爲可汗。三年七月，娑葛遣使請降。

開元九年二月，突厥毗伽遣使求和，帝賜書諭之。果有誠心，則共保遐福，不然無須使者往來。若仍侵邊，亦有以待之，其審圖之。

十五年九月，吐蕃寇瓜州，遣突厥毗伽書，欲與俱入寇。毗伽獻其書於朝，上嘉之，聽於西，受降城互市。於是遣使入貢。

二十二年十二月，毗伽爲其臣梅錄啜毒死，子登利立。

二十九年七月登利從叔二人分典兵馬號左右殺登利惡其專誘右殺斬之左殺判闕特勒攻殺登利骨咄葉護自立爲可汗。

天寶元年秋七月突厥拔悉密回紇葛邏祿自爲左右葉護餘衆共立判闕特勒之子爲烏蘇米施可汗朔方節度使王忠嗣說拔悉密等攻之烏蘇遁去突厥西葉護阿布思等帥餘衆千餘帳相次來降突厥由是遂微弱。

三載八月拔悉密攻殺突厥烏蘇米施可汗國人立其弟爲白眉可汗于是勅忠嗣乘亂破其左廂十一部會回紇葛邏祿共攻拔悉密頡跌伊施殺之回紇骨力裴羅自立爲骨咄祿毗伽闕可汗上册拜裴羅爲懷仁可汗。

四載正月白眉爲懷仁所殺其子摩延斝自立號葛勒可汗。

吐谷渾

初隋煬帝征吐谷渾可汗伏允奔黨項煬帝立其質子順爲主不之遣會中國喪亂伏允還收其故地仍自稱爲吐谷渾可汗。

武德二年二月涼李軌奉書于帝稱從弟大涼皇帝臣軌帝怒議討之遣使與伏允連和使引兵擊李軌許以順還之伏允喜起兵擊軌數遣使人貢請其質子順帝遣還之。

四年七月吐谷渾寇洮岷二州遣岐州刺史柴紹救之爲其所圍虜乘高射之矢下如雨紹遣人彈胡琵琶二女子對舞虜怪之相與聚觀紹察其無備潛遣精騎出虜陣後擊之衆大潰

八年正月吐谷渾突厥各請互市詔皆許之先是中國喪亂民乏耕牛至是資於戎狄雜畜被野

貞觀八年十月吐谷渾可汗伏允老耄其臣天桂王用事數入塞侵盜詔大舉兵討之上欲以李靖爲將因其老不欲重勞之靖聞之請行上大悅以靖爲西海道行軍大總管節度諸軍討之

九年五月李靖悉燒野草輕兵走入磧諸將以爲馬無草未可深入侯君集曰虜一敗之後鼠逃鳥散取之易於拾芥此而不乘後必悔之靖從之分軍爲兩道敗吐谷渾於牛心堆又敗諸赤水源君集追伏允於烏海與戰大破之靖襲破伏允牙帳伏允子順斬天柱王來降伏允爲左右所殺國人立順爲可汗詔以爲西平王後順爲國人所殺上遣侯君集將兵立其子諾曷鉢爲可汗

十年三月吐谷渾請頒歷遣子入侍

永徽三年正月吐谷渾遣使入貢

咸亨三年二月徙吐谷渾於靈州其故地皆入於吐蕃

乾寧元年六月李克用大破吐谷渾



# 唐會要卷九十五

## 高昌

卽漢車師前王之廷。後漢戊巳校尉之故地。漢時興師西討。軍中羸憊者留居焉。地形高敞。故因名高昌。壘有八城。本皆中國人也。後魏時爲郡。以闕伯周爲太守。尋爲沮渠無諱所奪。居數世。高昌滅之。以燉煌人張孟明爲國王。國人殺之。共立馬儒。又殺之。乃立其長史金城麴嘉爲王。嘉自云河東人。世修職貢於中國。知文字書計。置官亦採中國之號。今王伯雅卽嘉之後世。

武德七年。獻狗雌雄各一。高六寸。長一尺餘。中國有拂菻狗自此始也。

貞觀四年。其王文泰來朝。泰卽伯雅子也。妻宇文氏。卽隋煬帝所賜華容公主也。請入宗親。詔賜姓李氏。封常樂

公主。其後與突厥連結。西域諸國朝貢者。皆路出高昌。文泰稍擁絕之。至十三年。太宗謂其使曰。高昌數年來。朝貢旣略無蕃臣之禮。今茲歲首。萬國來朝。而文泰不至。我使人至彼。文泰云。鷹飛于天。雉竄於蒿。貓遊於堂。鼠安於穴。各得其所。豈不快耶。明年當發兵以擊爾國也。

十四年八月十日。交河道行軍大總管侯君集。副總管牛進達。平高昌國。下其郡三。縣五。城二十二。戶八

千四十六口三萬七千七百三十八馬四千三百疋。太宗欲以其地爲州縣。魏徵諫曰。未若因撫其人而立其子。所謂伐罪弔民。威德被於遐外。爲國之善者也。今若利其土壤。以爲州縣。常須千餘人鎮守。數年一易。往來交替。死者十有三四。遣辦衣資。離別親戚。十年之後。隴右空虛。陛下終不得高昌撮粟尺布。以助中國。所謂散有用而資無用。上不從。以其地爲西昌州。又改爲西州。以交河城爲交河縣。始昌城爲天山縣。田山城爲柳中縣。東鎮城爲蒲昌縣。高昌城爲高昌縣。併爲都護府。留軍以鎮之。初。西突厥遣其葉護屯兵于可汗浮圖城。與高昌爲影響。至是懼而來降。以其地爲庭州。并置蒲類縣。國威既震。西域大懼。焉耆王詣軍門請謁。留兵鎮守。刻石紀功而還。每歲調發千人防邊。黃門侍郎褚遂良上疏曰。臣聞古者哲后。必先華夏而後夷狄。務廣德化。不事遐荒。是以周宣薄伐。至境而止。始皇遠塞。中國分離。漢武負文景之聚財。翫士馬之餘力。始通西域。將三十年。復得天馬于宛城。采蒲桃於安息。而海內空竭。生人物故。所以租及六畜。算至舟車。因之凶年。盜賊並起。搜粟都尉桑宏羊復希主意。請遣士卒。遠田輪臺。築城以威西域。武帝翻然追悔。情發於衷。棄輪臺之野。下哀痛之詔。人神咸悅。海內乂康。向使武帝復用築宏羊之言。天下生靈皆盡之矣。是以光武中興。不踰葱嶺。孝章卽位。都護來歸。陛下誅滅高昌。威加西域。收其鯨鯢。以爲州縣。然則王師薄發之歲。河西供役之年。飛芻輓粟。十室九空。數部蕭然。五年不復。陛下歲遣千餘人。遠事屯戍。經年離別。萬室思歸。去者資裝。自須營辦。旣費芻粟。傾其機杼。經途死亡。復在其外。兼

遣罪人增其防遏。彼罪人者，生於販肆，終朝墮業，犯禁違公，謂之浮薄，徒能擾於邊城，必無益於行陣。所遣之內，復有逃亡，官司捕捉，爲國生事，設令張掖塵飛，酒泉烽舉，陛下豈能得高昌一人升粟而及事乎？終須發隴右諸州，星馳電擊，由斯而言，此河西者，方已腹心，彼高昌者，他人手足，豈得糜費中華，以事無用。書曰：不作無益害有益，此之謂也。陛下平頡利於沙塞，滅吐渾於西海，突厥餘衆，爲立可汗，吐渾遺民，更樹君長，復立高昌，非無前例。此所謂有罪而誅之，旣復而立之，四海百蠻，誰不聞見，蠕動懷生，畏威慕德，宜擇高昌可立者而立之，徵給首領，兼還本國，負戴漢恩，長爲藩翰，中國不擾，旣富且寧，傳之子孫，以貽永世。初，平高昌，君集至京師，有司劾其私取寶物，詔下獄。中書侍郎岑文本上疏曰：高昌昏迷，人神共棄。在朝議者，以其地在遐荒，咸欲置之度外。惟陛下運獨見之明，授決勝之略，君集奉行聖算，指期平殄。陛下爲而不宰，乃推功於將帥，露布初至，便降大恩，從征之人，皆霑滌蕩，內外文武，咸欣陛下賞不踰時，而不經旬日，並付大理。雖君集等自挂網羅，恐海內疑陛下惟錄其過，以遺其功。古之人君，出師命將，克敵則獲重賞，不克嚴刑，是以當其有功也。雖貪殘淫縱，必蒙青紫之寵，當其無功，雖勤躬潔己，不免銖鉞之誅。故周書曰：記人之功，忘人之過，宜爲君者也。昔漢貳師損五萬之師，糜億萬之費，經四年之勞，唯獲駿馬三十四，雖斬宛王之首，而罪惡甚多。武帝以爲萬里征伐，不錄其過，遂封海西侯。又校尉陳湯，矯詔興師，雖斬郅支單于，而湯盜所收康居財物，爲司隸所繫。湯乃上疏曰：臣與吏人共誅郅支，幸得擒滅，今



司隸乃收繫按驗。是爲邳支報讎也。元帝赦其罪。封湯關內侯。又管龍驤將軍王濬。有平吳之功。而王渾等論濬軍人得皓寶物。濬上表曰。今年平吳。誠爲大慶。於臣之身。更爲咎累。武帝赦而不推。封襄陽侯。近隋新義郡公韓擒虎。平陳之日。縱士卒暴亂。取寶宮內。帝亦不問罪。加上柱國。由斯觀之。將帥之臣。廉慎者少。貪求者衆。是以黃石軍勢曰。使智使勇。使貪使愚。故智者樂立其功。勇者好行其志。貪者邀趨其利。愚者不計其死。是知前聖莫不收人之長。棄人之短。良爲此也。陛下若降雨露之澤。收雷電之威。錄其微勞。忘其大過。足使立功之士。因茲而皆勸。負罪之將。由斯而改節。乃釋君集等。先是文泰已死。國人立其男智盛爲王。竟爲君集執獻於觀德殿。初其國童謠曰。高昌兵馬如霜雪。漢家兵馬如日月。日月照霜雪。迴首自消滅。文泰使人捕其首唱者。不能得。麴氏有國。至智盛凡九代。一百四十四年而滅。尋拜智盛爲左武衛將軍。封金城郡公。弟智湛爲右武衛中郎將。封天山縣公。智湛後終於左驍衛將軍西州刺史。天授初。其子崇稅授左武衛大將軍。交河郡王。稅卒。封襲遂絕。

高句麗

高句麗者。出自扶餘氏。其後有朱蒙孫莫來。因滅扶餘。都平壤。卽元菟之故地。俗頗知書記。恆西與中國通。

武德七年二月七日。遣使內附。受正朔。請頒歷。許之。

八年三月十一日高祖謂羣臣曰名實之間理須相副高麗稱臣於隋終拒煬帝何必令其稱臣以自尊大可卽詔述朕此懷也裴矩溫彥博進曰遼東之地周爲箕子之國漢家元菟郡耳魏晉以前近在提封之內不可許以不臣若與高麗抗禮四夷必當輕漢且中國之於夷狄猶太陽之於列星理無降尊俯同藩服乃止

貞觀十八年二月太宗謂侍臣曰高麗莫離支賊殺其主盡誅大臣用刑有同坑穽夫出師弔伐須有其名因其殺虐下人取之爲易諫議大夫褚遂良進曰兵若渡遼事須剋捷萬一不獲無以威示遠方必更發怒再動兵衆若至於此安危難測太宗然之兵部尙書李勣曰近者延陀犯邊陛下必欲追擊但爲魏徵之諫所以遂用其言此之失機亦由徵之誤計倘若仰申聖策延陀無一人生還可五十年間邊境無事至十一月十六日以刑部尙書張亮爲平壤道行軍大總管自萊州泛海趨平壤又以特進李勣爲遼東道行軍大總管趨遼東兩軍合勢以其月之三十日征遼之兵集於幽州

安州人彭惠通請出布帛五千段以資征人上嘉之比漢之下式拜宣義

十九年四月李勣攻拔蓋牟城獲口二萬以其城置蓋州五月上渡遼水詔撤橋梁以墜士卒之心上親率甲騎與李勣攻遼東城拔之以其城爲州六月攻拔白巖城以其城爲巖州遂引軍次安市城進兵以攻之會高麗北部耨薩高延壽南部高惠真率靺鞨之衆十五萬來援於安市城東南八里依山爲陣上

令所司張授降幕於朝堂之側。曰：明日午時納降虜於此。上夜召文武躬自指麾。是夜有流星墜賊營中。明日及戰大破之。延壽惠真率三萬六千八百人來降。上以酋首三千五百人授以戎秩。遷之內地。餘三萬人悉放還平壤城。收靺鞨三千三百人。並坑之。獲馬五萬匹。牛五萬頭。甲一萬領。因名所幸山爲駐蹕山。命許敬宗爲文勒石以紀其迹。遂移軍於安市城南。久不剋。九月遂班師。先遣遼蓋二州戶口渡遼。乃召兵馬。歷于城下而旋。城主昇城拜辭。太宗嘉其堅守。賜縑百疋以勵事君者。十一月至幽州。初入遼也。將十萬人。各有八馱。兩軍戰馬四萬匹。及還。死者一千二百人。八馱及戰死者十七八。張亮水軍七萬人。沉海溺死數百人。凡徙遼蓋巖二州戶口入內地。前後七萬餘人。二十一年李勣復大破高麗於南蘇。班師至頗利城。渡白狼黃巖二水。皆由膝已下。勣怪二水淺狹。問契丹遼源所在。云此二水更行數里。卽合南流。卽稱遼水。更無遼源可得也。二十二年七月。太子太傅知門下省事房元齡謂諸子曰。吾自度危篤。以東討不停。豈可使吾銜恨入地。遂封表上諫曰。臣詳觀方今爲中國患者。無過突厥。遂能坐運神策。不下殿堂。大小可汗。相次束手。分典禁衛。執戟行間。其後延陀。鴟張。尋就夷滅。鐵勒慕義。請置州縣。沙漠已北。萬里無塵。如高昌叛渙於流沙。吐渾首竄於積石。偏師薄伐。俱從平蕩。高麗歷代逋誅。莫能討擊。陛下責其逆亂。弑主虐人。親總六軍。問罪遼碣。未經旬日。卽滅遼東。前後虜獲數十萬計。分配諸州。無處不滿。雪往代之宿恥。掩嶠陵之枯骨。比功較德。萬倍前王。此聖主之所自知。微臣安敢備說。今臣深爲陛下惜。

之、重之、愛之、寶之。周易曰：知進退存亡而不失其正者，其惟聖人乎。由此言之，進有退之義，存是亡之幾，得有喪之理。老臣所以爲陛下惜之，蓋謂此也。陛下威名功德，亦可足矣。拓地開疆，亦可止矣。彼高麗者，邊夷之賤類，不足待以仁義，不可責以常理。古來以魚鼈畜之，宜從闕略。若必欲絕其種類，恐獸窮則搏，陛下每決死囚，必令三覆五奏，進素食，停音樂，蓋以人命所重，感動聖慈也。況今兵士之徒，無一罪戾，無故驅之於戰陣之間，委之於鋒刃之下，使肝腦塗地，魂魄無歸，令其老父孤兒，寡妻慈母，望轆車而掩泣，抱枯骨而椎心，足以變動陰陽，感傷和氣，實天下之冤痛也。且兵凶器也，戰危事也，不得已而用之，向使高麗違失臣節，而陛下誅之可也，使失百姓，而陛下滅之可也，久長能爲中國患，而陛下除之可也。有一於此，雖日殺萬夫，不足爲媿。今無此三條，坐煩中國，內爲舊主雪怨，外爲新羅報讎，豈非所存者小，所損者大。願陛下遵皇祖老子止足之誠，保後代巍巍之名，發沛然之恩，降寬大之詔，順陽春以布澤，許高麗以自新。臣老病三公，朝夕入地，所恨竟無塵露，微增海嶽，謹罄殘魂餘息，先代結草之誠，倘蒙錄此哀鳴，卽臣死且不朽。八月，徐充容上表曰：竊見頃年已來，力役兼總，東有遼海之軍，西有崑邱之役，士馬疲於甲冑，舟車倦於轉輸，且召募投戎，去留懷生死之痛，因風阻浪，存沒有漂溺之危，一夫力耕，卒無數十之穫，一船致損，則傾數萬之糧，是猶運有盡之農功，填無窮之巨浪，圖未獲之他衆，喪已成之我軍，雖除兇伐暴，國有常規，然黷武玩兵，先哲所戒。昔秦王併吞六國，反速危亡之期，晉武奄有三方，翻成覆敗之業。

是知地廣非久安之術。人勞乃易亂之原。願陛下布澤流仁，矜弊恤乏，減行役之煩，增湛露之惠。

龍朔元年四月十六日，兵部尚書任雅相爲涇江道行軍大總管，三十五軍水陸分途。先觀高麗之釁，上將親率六軍以繼之。蔚州刺史李君球上疏曰：臣聞司馬法曰：國雖大，好戰必亡；天下雖平，忘戰必危。戰者危事，兵者凶器。故聖主明王重行之也。憂人力之盡，恐府庫之殫，懼社稷之危，生中國之患。故古人云：務廣德者昌，務廣地者亡。昔秦始皇好戰不已，至于失國，是不愛其內而務其遠故也。漢武遠討朔方，追乎萬里，廣拓南海，分爲八郡，終于戶口減半，國用空虛。至于末年，方垂哀痛之詔，自悔其失。彼高麗者，僻側小醜，潛藏山海之間，得其人不足以彰聖化，棄其地不足以損天威。何至於疲中國之人，傾府庫之實，使男子不得耕耘，女子不得蠶織。陛下爲人父母，不垂惻恤之心，傾其有限之費，貪彼無用之地，設令高麗既滅，卽不得不發兵鎮守，少發則兵威不足，多發卽人心不安。是乃中國疲於轉戍，萬姓無以聊生，則天下敗矣。天下旣敗，卽陛下何以自安。故臣以爲征之不如不征，滅之不如不滅。惟陛下裁斷焉。

乾元三年，李勣攻拔扶餘城，遂與諸軍相會。時侍御史賈言忠充支度遼東軍糧使，還上問以軍事，言忠畫其山川地勢，且言遼東可平之狀。上問曰：卿何以知其可平也。對曰：昔隋主親率六軍，覆於遼東者，人事然也。煬帝無道，軍政嚴酷，舉國皆役，天下離心。元感一倡，狼狽而返，身死國亡，自取之也。及先帝親征，問罪所以不得志者，高麗未有釁也。今高麗已失其政，人心不附，男生兄弟相爲攻擊，脫身來奔，爲我鄉

導彼之情僞。盡知之矣。以國家富強。陛下明聖。將士盡心。滅之必矣。且臣聞高麗秘記云。不及千年。當有八十老將來滅之。自前漢之高麗氏。卽有國土。及今九百年矣。李勣年登八十。亦與其記符同。又高麗頻歲飢荒。賣鬻男女。無故地裂。狼狐入城。蚘鼠穴于國門之下。夷俗信妖。迭相驚駭。天意如此。人事如彼。臣竊以爲是行不再舉矣。上曰。卿觀遼東諸將執賢。對曰。李勣先朝舊臣。聖鑒所悉。庸同善雖非鬪將。而持軍嚴整。薛仁貴勇冠三軍。威名遠震。高侃勤儉自處。忠果有餘。契苾何力沉毅持重。統御之才。雖頗有忌前之癖。而臨事能斷。然諸將夙夜小心。忘身憂國者。莫逮於李勣。上深然其言。

總章元年夏四月。彗星見於五車。許敬宗以爲星孛於東北。王師問罪。此高麗將滅之徵。九月。李勣拔平壤城。虜高藏男建等。十二月。至新豐。詔取便道俘於昭陵。乃備軍容。奏凱樂。獻於太廟。詔以高藏政不由己。赦其罪。授司平太常伯。男產授司宰少卿。男建配流黔州。分其地置都督府九州四十二縣一百。又置安東都護府以統之。移其戶二萬八千於內地。

儀鳳中。高宗授高藏遼東都督府。封朝鮮王。居安東。領本蕃爲主。高藏至安東。潛與靺鞨相通謀叛。事覺。召還。配流邗州。以永淳初卒。贈衛尉卿。聖歷二年。又授高藏男德武爲安東都督。以領本蕃。自是高句麗舊戶在安東者漸寡少。分投突厥及靺鞨等。其舊地盡入於新羅。高氏君長遂絕。元和十三年四月。其國進樂物兩部。

百濟

百濟者本扶餘之別種。當馬韓之故地。其後有仇台者。爲高麗所破。以百家濟海。因號百濟焉。大海之北。小海之南。東北至新羅。西至越州。南渡海至倭國。北渡至高麗。其王所居。有東西兩城。新置內官佐平。掌宣納事。內頭佐平。掌庫藏事。內法佐平。掌禮儀事。衛士佐平。掌宿衛兵事。朝廷佐平。掌刑獄事。兵官佐平。掌在外兵馬事。又外置六帶方。管十郡。其用法。叛逆者死。殺人者以奴婢二人贖罪。官人受財及盜者。三倍追贓。餘與高麗同。武德四年。其王扶餘璋遣使獻果下馬。與新羅世爲仇讎。

貞觀十六年。與高麗通和。以絕新羅入朝之道。太宗親征高麗。百濟懷二。數年之間。朝貢遂絕。至顯慶五年八月十三日。左衛大將軍蘇定方討平之。虜其王義慈。及太子崇。將校五十八人。送于京師。其國分爲五部。統郡三十七。城二百。戶七十六萬。至是以其地置熊津。馬韓。東明。金湊。德安等五都督。各統州縣。立其酋長爲都督。刺史。縣令。命左衛郎將王文度爲都統。總兵以鎮之。義慈事親以孝行聞。友于兄弟。時人號爲海東曾閔。及至京。數日病卒。葬于孫皓陳叔寶墓側。至麟德三年已後。其地爲新羅靺鞨所分。百濟之種遂絕。

新羅

新羅者本弁韓之地。其風俗衣服。與高麗百濟略同。而朝服尙白。好祭山神。國人多金朴兩姓。異姓不爲

婚姻。重元日。每其日。拜日月鬼神。人髮長美。其先出高麗。魏將毋邱儉之破高麗也。其衆遁保沃沮。後歸故國。其留者號新羅。

永徽元年。新羅王金真德大破百濟。遣使金法敏來朝。仍織錦作五言太平詩以獻。帝嘉之。拜法敏爲大府卿。五年。真德卒。高宗爲舉哀於永光門。使太常卿張文收持節弔祭之。贈開府儀同三司。仍賜綾綵二百段。詔其子春秋嗣位。

顯慶元年三月。又破百濟兵。遣使來告。

龍朔元年。春秋卒。詔以其子法敏嗣位。三年四月。詔以新羅國置雞林州大都督府。仍授法敏雞林大都督府。麟德二年八月。法敏與熊津都督扶餘隆盟于百濟之熊津城。其盟書藏于新羅之廟。于是帶方州刺史劉仁軌領新羅、百濟、耽羅、倭人四國使。浮海西還。以赴太山之下。

上元元年二月。新羅王金法敏旣納高句麗叛亡之衆。又封百濟故地。遣兵守之。帝大怒。詔削法敏官爵。遣宰臣劉仁軌討之。仍以法敏弟右驍衛員外大將軍臨海郡公金仁問爲新羅王。時仁問在京師。詔令歸國以代其兄。仁問行至中路。聞新羅降。仁問乃還。二年二月。雞林道行軍大總管劉仁軌大破新羅之衆于七重城而還。新羅于是遣使入朝伏罪。並獻方物。前後相屬。帝復金法敏官爵。旣盡有百濟之地。及高句麗南境。東西約九百里。南北約一千八百里。於界內置上良康熊金武漢朔溟等州。所輸物產。爲諸



蕃之最。

開耀元年。法敏卒。遣使册立其子政明爲王。仍襲父官爵。

長壽二年。政明卒。册立其子理洪爲王。三年。遣使來朝。其年。理洪卒。册立其弟崇基爲王。仍令襲兄輔國大將軍左豹韜大將軍雞林州都督。

神龍三年。授驃騎大將軍。

先天元年。改名興光。

開元十年。頻遣使獻方物。十二年。興光遣使獻果下馬二匹、牛黃、人參、頭髮、朝霞袖、魚牙、納袖、鏤鷹鈴、海豹皮、金銀等。仍上表陳謝。至十二年。遣其臣金武勳來賀正。及武勳還。降書賜之。又使其弟金嗣宗來朝。并貢方物。至二十一年。加興光寧海軍使。其年。命太僕卿員外置同正員金思蘭使於新羅。思蘭本新羅之行人。恭而有禮。因留宿衛。及是。委以出疆之任。且便之也。前年。帝賜興光白鸚鵡雌雄各一。及紫羅繡袍、金銀鈿器物、瑞文繡緋羅、五色羅、綵綾。共三百餘段。至是。興光遣使從姪志廉奉表陳謝。仍奏國內有芝草生。使圖而獻。二十年。又遣其大臣金端竭丹來賀正。又遣姪志廉來獻方物。授志廉鴻臚少卿。員外置同正員。賜絹百疋。留宿衛。二十三年十一月。遣從弟大阿嬪金忠相來朝。死于路。贈衛尉卿。二十五年。興光卒。其子承慶嗣位。遣使來告。帝悼惜之。又贈太子太保。命贊善大夫邢璠攝鴻臚少卿。往其國行弔。

祭册立之禮至二十八年册承慶妻朴氏爲新羅王妃。

天寶三載承慶卒。命弟憲英嗣位。仍襲開府儀同三司。都督。雞林州刺史。兼持節寧海軍事。是載四月遣使謝恩。并獻方物。十月遣使來賀正。授左清道率府員外長史。賜綠袍銀帶。放還蕃。自後頻來朝。七載遣使獻金銀及六十總布。魚牙。納朝霞紬。牛黃。頭髮人參。

寶應二年。憲英遣使朝貢。授其使檢校禮部尙書。放還。大歷二年。憲英卒。册立其子乾運爲王。三年二月。命倉部郎中歸崇敬兼御史中丞。持節册命。又册乾運母爲太妃。七年。遣使金標石來賀正。授衛尉員外少卿。放還。八年。遣使來朝。并獻金銀牛黃魚牙。納朝霞紬等方物。建中四年。乾運卒。無子。國人立其上。相金良相爲王。

貞元元年。授良相檢校太尉。都督。雞林州刺史。寧海軍使。新羅國王。仍令戶部郎中蓋塤持節册命。其年良相卒。立上相金敬信爲王。令襲其官爵。良相之從兄弟也。十四年。敬信卒。其子先敬信亡。國人立敬信嫡孫權知國事。俊邕爲王。十六年。授俊邕開府儀同三司。檢校太尉。新羅王。令司封郎中兼御史中丞章丹持節册命。明年。至鄆州。聞俊邕卒。其子重興立。詔丹還。

永貞元年。詔遣兵部郎中元季方持節册重興爲王。

元和元年十一月。放宿衛新羅王子金忠獻歸本國。仍加試秘書監。三年。遣使金力奇來朝。其年七月。力

奇上言貞元十六年奉詔册臣故主金俊邕爲新羅王母申氏爲太妃妻叔氏爲王妃册使韋丹至中路知俊邕薨其册卻迴在中書省今臣還國伏請授臣以歸勅金俊邕等册宜令鴻臚寺于中書省受領至寺宣授與金力奇令齋歸國仍賜其叔彥昇門戟令本國准例給四年遣使金陸珍等來朝貢五年其王子金憲章來朝貢七年重興卒立其相金彥昇爲王遣使金昌南等告哀七月授彥昇開府儀同三司檢校太尉持節大都督雞林州諸軍事兼持節寧海軍使上柱國新羅王妻正氏册爲妃仍賜太宰相金崇斌等三人戟亦令本國準給兼命職方員外郎攝御史中丞崔廷持節弔祭册立以其質子金士信副之十一年十一月其入朝王子金士信等遇惡風飄至楚州鹽城縣界淮南節度使李鄴以聞是歲新羅飢其衆一百七十人求食於浙東十五年遣使朝貢

長慶二年十二月遣使金柱弼朝貢

寶歷元年其王子金昕來朝兼充宿衛

太和四年彥昇卒五年四月詔以新羅王金景徽爲開府儀同三司檢校太尉使持節大都督雞林州諸軍事兼充寧海軍使景徽母朴氏宣册爲太妃妻朴氏册爲妃太子左諭德兼御史中丞源寂持節弔祭册立焉

開成元年其王子金義琮來謝恩兼宿衛二年四月十一日放還蕃賜物有差五年四月鴻臚寺奏新羅

國告哀其質子及年滿合歸國學生等共一百五人並放還  
會昌元年七月勅歸國新羅官前入新羅宣慰副使前充兗州都督府司馬賜緋魚袋金紫卿可淄州長  
史。



# 唐會要卷九十六

## 契丹

契丹居潢水之南黃龍之北鮮卑之故地君長姓大賀氏勝兵四萬三千人分爲八部好與奚鬪死無服紀子孫死父母晨夕哭父母死子孫不哭餘風俗與突厥同武德二年二月遣使貢名馬豐貂

貞觀二十二年酋長窟哥等部落咸請內附又契丹有別部酋帥孫敖曹者武德四年與靺鞨酋長突地稽俱請內附詔令當州城傍安置至曾孫萬榮通天元年中與妹婿李盡忠殺營州都督趙文颺據營州作亂盡忠則窟哥之婿也則天大怒更號萬榮爲萬斬更號盡忠爲盡滅尋自稱無上可汗以萬榮爲大將及盡忠

死萬榮領其衆上初令曹仁師討之全軍敗績又令王孝傑繼之孝傑沒于陣攻陷冀州俄爲奚及突厥掩擊其後張九節設伏以擊之遂單馬潛遁爲其奴斬之開元二年李盡忠從父弟失活請歸款復封失活爲松漠都督授左金吾衛大將軍仍於其府置靜析軍五年十二月以東平王外孫楊元嗣女爲永樂公主出降失活親迎之夜遣諸親高品及兩蕃大首領觀花燭六年失活卒元宗爲之舉哀贈特進册立其從父弟娑固爲松漠郡王十年十一月娑固與公主來朝宴於內殿及歸娑固衙官可突于勇悍得衆娑固欲除之而事泄可突于攻之娑固奔營州可突于立娑固從父弟鬱於爲主鬱於遣使謝罪元宗復

册立鬱於令襲娑固之位。仍赦可突于之罪。至十年。鬱於朝請婚。又封餘姚縣主長女慕容氏爲燕郡公主。以妻之。封鬱於爲松漠郡王。授左金吾員外大將軍。兼靜析軍經略大使。鬱於死。立其弟咄於。襲其官爵。復以燕郡公主爲妻。十三年。咄於復與可突于相猜阻。攜公主來奔。改封遼陽郡王。國人立其弟邵固。其冬。邵固詣行在。從至東嶽。詔授左羽林員外大將軍。改封廣化郡王。仍封宗室外甥陳氏女爲東光公主。以妻之。十八年。邵固爲可突于所殺。以其衆降突厥。東光公主走投平盧。詔遣使信安王禕。幽州長史薛楚玉等討之。皆不克。二十二年六月。幽州節度使張守珪大破之。遣使獻捷。勅曰。邊境爲患。莫甚于林胡。朝廷是虞。幾煩於將帥。積年逋誅。一朝翦滅。則東方之蝥賊。寢以廓清。河朔之民人。差寬征戍。此皆上憑九廟之靈。下仗羣帥之功。今具凱旋。敢不以獻。宜擇日告九廟。所司准式。其年十一月。幽州節度使張守珪發兵討契丹。斬其王屈列。及其大臣可突于等。傳首東都。餘衆及叛奚皆散走山谷。立其酋長李過折爲契丹王。仍授特進。封北平郡王。其年。過折又爲可突于黨泥禮所殺。惟一子刺乾。走投安東。獲免。拜左驍衛將軍。自後與奚王朝貢歲至。蕃禮甚備。至貞元四年。復犯我北鄙。幽州以聞。九年十二月。遣使朝貢。十年正月。遣使朝貢。其年二月。勅幽州道入朝契丹大首領悔落拽何等五人。並可果毅都尉。次首領王下詔活薛于君等一十六人。並可別將。放還國。十一年十月。契丹大首領熱蘇等二十五人來朝。元和元年。遣使朝貢。八年十一月。契丹大首領悔落鶻劣來朝。十年十一月。契丹遣使悔落饒等二十九

人來朝貢。十二年十一月，契丹首領介落等朝貢，以告身十九通，賜其貴人。太和九年十一月，契丹大首領二十九人來朝，賜物各有差。

開成元年十一月，契丹大首領涅列壞等三十一人來朝。四年十二月，契丹大首領薛葛等三十人來朝。會昌二年九月，契丹新立王屈戌，可雲麾將軍守右武衛將軍員外置同正員幽州節度使張仲武奏契丹新立王屈戌等云：契丹舊用迴鶻印，今懇請當道開奏，乞國家賜印，伏望聖慈允許，勅旨宜依，仍以奉國契丹之印爲文。

### 奚

奚，蓋匈奴之別種，所居亦鮮卑之故地，卽東胡之界也。勝兵三萬，分爲五部，每部置俟斤，風俗與突厥同。通天年中，契丹叛，奚亦臣屬突厥，兩國常爲表裏，號爲兩蕃。景雲元年，其王李大酺遣使貢方物。

開元五年，大酺入朝，爲饒樂郡王，仍授左金吾衛員外大將軍，詔封外生女爲固安公主，以妻之。其年，大酺與契丹首領李失活來朝，請於柳城復置營州，許之。大酺卒，弟魯蘇立，十年，詔魯蘇襲其兄官爵，又封咸安公主，女韋氏爲東光公主，以妻之。十四年，改封魯蘇爲奉誠王，後爲契丹衙官可突于脅附突厥，魯蘇走投榆關，移其部落于幽州界安置。明年，信安王禕降，其酋李詩以其地置歸義州，因以王詩，詩死，其子延寵又叛，爲幽州張守珪所困，復降，封懷信王，以宗室出女楊爲宜芳公主妻之。延寵殺公主，復叛，詔



立它酋婆固爲昭信王。仍授饒樂都督。自大歷後。朝使繼至。

元和四年七月。奚及室韋寇振武。五年四月。幽州奏破奚六萬餘衆。

太和元年。其王饒樂府都督襲歸誠王梅落來朝。加檢校司空。放還蕃。五年。以奚首領索低爲左衛將軍。同正。充檀薊兩州遊奕兵馬使。仍賜姓李氏。八年。遣使朝貢。十一年。遣使獻名馬。是後每歲至。至今朝貢不絕。或歲中三至。故事。嘗以范陽節度使爲押奚契丹兩蕃使。自至德後。藩臣多擅封壤。朝廷優容之。俱務自完。不生邊事。故二蕃亦少爲寇。其每歲朝賀。常各遣數百人。至幽州。則選其酋長三五十人。赴闕。引見于麟德殿。賜以金帛。遣還。餘皆駐而館之。率以爲常。

### 室韋

室韋者。契丹之別種。附于突厥。用角弓楛矢。尤善射。時聚戈獵。事畢而散。其人土著。無賦稅。人牽犁以種。又按隋書室韋記云。室韋有五部落。一南室韋。二北室韋。三鉢室韋。在北室韋之北。四深末怛室韋。在北室韋之西北。五大室韋。在室建河之南。深末怛室韋之西北。隋書曰。大室韋之外。名字改易。不可詳悉。突厥沙鉢羅可汗常以吐屯潘恠統領之。蓋並契丹之別種也。其南者爲契丹。在北者號室韋。南室韋在契丹北三千里。

後魏書云。自契丹路經暖水蓋轅子山。其

山周回三百里。又經屈利水。始到其國。

土地卑濕。至夏則移向西。貸穀久對二山。多草木饒禽獸。

又多蚊蚋。人皆巢居。以避其患。後漸分爲二十五部。其酋帥號餘莫不滿咄。死則子弟代之。無嗣則擇賢。

豪而立之。盤髮衣服。與契丹同。乘牛車。蘧蔭爲室。如突厥氈車之狀。渡水則束薪爲棧。或有以皮爲舟者。馬則織草爲韉。結繩爲轡。寢則屈木爲室。以蘧蔭覆之。移則載以行。以豬皮爲席。編木藉之。氣候多寒。田收甚薄。無羊少馬。多豬牛。言語與靺鞨相通。婚嫁之法。二家相許。婿輒盜婦持去。然後送牛馬爲聘。婦人不再嫁。以爲死人之妻。難以共居。部落共爲大柵。人死。置屍其上。居喪三年。其國無鐵。取給於高麗。南室韋北行十一日。至北室韋。分爲九部落。其渠帥號乞引莫賀咄。氣候最寒。冬則入山。居穴中。牛畜多凍死。饒麋鹿。射獵爲務。鑿冰沒水中。而網射魚鼈。地多積雪。懼陷坑窞。騎木而行。俗皆捕貂爲業。冠以狐貉。衣以魚皮。又北行千里。至鉢室韋。依胡布山而住。人衆多於北室韋。不知爲幾部落。用樺皮蓋屋。其餘同北室韋。從鉢室韋西四日行。至深末怛室韋。因水爲號也。冬月穴居。以避太陰之氣也。又西北數千里。至大室韋。徑路險阻。言語不同。尤多貂及青鼠。北室韋。後魏武定。隋開皇大業中。並遣使貢獻。大唐有九部焉。所謂嶺西室韋。山北室韋。黃頭室韋。大如者室韋。小如者室韋。娑高室韋。訥北室韋。駱駝室韋。並在柳城郡之東北。近者三千五百里。遠者六千二百里。今室韋最西與迴鶻接界者。有烏素固部落。當居俱輪泊之西南。次東有移塞沒部落。次東又有塞曷支部落。此部落有良馬。人戶亦多。居斿河之南。其河彼俗謂之燕支河。又有和解部落。次東又有烏羅護部落。一名烏羅渾。元魏謂之烏落。居磨蓋獨山北斿河之側。此部落自魏大武真君四年。歷北齊周隋及武德已後。朝貢不絕。又有卍禮部落。與烏羅護犬牙而居。又

東北有山北室韋。又有小如者室韋。又北有娑葛室韋。東又有嶺西室韋。又東南至黃頭室韋。此部落兵強。人戶亦多。東北與達姪接。嶺西室韋北。又有訥北支室韋。此部落校小。烏羅護之東北百餘里。邗河之北。有古烏丸之遺人。今亦自稱烏丸國。武德貞觀中。亦遣使朝貢。其國北大山之北。亦有大室韋部落。其部落傍望建河居。其河源出突厥東北界。俱輪泊地。屈曲東流。經西室韋界。又東經大室韋界。又東經蒙兀室韋之北。路丹室韋之南。又東流與邗河忽汗河合。又東經南黑水靺鞨之北。北黑水靺鞨之南。東流注于海。烏丸東南三百里。又有東室韋部落。在獯越河北。其河東南流與邗河合。

武德八年。遣使朝貢。

開元天寶中。每數十歲。一遣使來朝。及貢貂皮等物。

貞元八年閏十二月。室韋都督和解熱素等一十人來朝貢。

太和五年至八年。凡三遣使來朝貢。九年十二月。室韋大都督阿朱等三十人來朝貢。

開成元年十二月。室韋大都督阿朱等來朝。進馬五十四。四年正月。上御麟德殿。對入朝賀正室韋阿朱等十五人。其年十二月。室韋大都督祇虫等三十人來朝貢。

會昌二年十二月。上御麟德殿。引見室韋大首領都督熱論等十五人。宴賜有差。

咸通元年正月。上御紫宸殿受朝。對室韋使。

# 靺鞨

靺鞨者。蓋肅慎之地也。後魏謂之勿吉。凡有數十部落。各有酋長。而黑水靺鞨最處北方。尤稱勁捷。性兇悍。無憂戚。無文字。其畜宜豬。食其肉而衣其皮。

武德二年。其部酋長突地稽遣使朝貢。以其部置燕州。初。突地稽朝煬帝於江都。屬化及之亂。間行歸柳城。至是通使。拜突地稽爲總管。貞觀初。高開道引突厥來攻幽州。突地稽力戰有功。拜左衛將軍。賜姓李氏。封耆國公。尋卒。子謹行。武力絕人。麟德中。累遷營州都督。右領軍大將軍。爲積石道經略大使。上元三年。大破吐蕃衆數萬於青海之上。降鬻書勞。仍賜燕國公。永淳元年卒。贈幽州都督。陪葬乾陵。

貞觀十四年。黑水靺鞨遣使朝貢。以其地爲黑水州。自後或酋長自來。或遣使朝貢。每歲不絕。其白山部素附於高麗。因收平壤後。部衆多入於中國。泊咄安居骨室等部。亦因高麗破後。奔散微弱。今無聞焉。縱有遣人。並爲渤海編戶。唯黑水部全盛。分十六部落。以南北爲稱。開元十年。安東都護薛泰。請于黑水靺鞨內置黑水軍。續更以最大部落爲黑水府。仍以其首領爲都督。諸部刺史隸屬焉。中國置長史。就其部落監領之。十六年。其都督賜姓李氏。賜名獻誠。授獻誠雲麾將軍。兼黑水經略使。仍以幽州都督爲其押使。自此朝貢不絕。舊說黑水西北有思慕靺鞨。正北微東十日程。有郡利靺鞨。東北十日程。有窟說靺鞨。亦謂之屈說。東南十日程。有莫曳皆靺鞨。今黑水靺鞨界南。與渤海國顯德府。北至小海。東至大海。西至

室韋南北約二千里。東西約一千里。其國少馬。國人能步戰。士多貂鼠皮尾骨咄角白兔白鷹等。初。上謂侍臣曰。靺鞨遠來。蓋突厥服之所致也。昔周宣之時。獫狁孔熾。出兵驅逐。比之蚊蚋。議者以爲中策。漢武帝北事匈奴。中國虛竭。議者以爲下策。秦始皇北築長城。人神怨憤。議者以爲無策。然則自古以來。其無上策乎。朕承隋之弊。而四夷歸伏。無爲而治。得非上策乎。禮部侍郎李百藥進曰。陛下以武功定四海。以文德綏萬物。至道所感。格於天地。斯蓋二儀降福。以祚聖人。豈與周漢失策。較其長短哉。太宗大悅。其拂涅鐵利等諸部落。自國初至天寶末。亦嘗朝貢。或隨渤海使而來。唯郡利莫曳皆三兩部未至。及渤海浸強。黑水亦爲其所屬。

渤海

渤海靺鞨。本高麗別種。後徙居營州。其王姓大氏。名祚榮。先天中。封渤海郡王。子武藝。

貞元八年閏十二月。渤海押靺鞨使楊吉福等三十五人來朝貢。十年二月。以來朝渤海王子大清允爲右衛將軍同正。其下拜官三十餘人。十一年十二月。以靺鞨都督密阿古等二十二。人並拜中郎將。放還蕃。至十四年三月。加渤海郡王兼驍衛大將軍。忽汗州都督。大嵩璘爲銀青光祿大夫。檢校司空。册爲渤海郡王。依前忽汗州都督。初。嵩璘父欽茂。以開元二十六年襲其父武藝。忽汗州都督。渤海郡王。左金吾大將軍。天寶中。累加特進。太子詹事。寶應元年。進封欽茂爲渤海郡王。大歷中。又累拜司空。太尉。及嵩璘

嗣位。但受其郡王將軍。嵩璘遣使敘理。故加册命焉。至元和元年。以渤海郡王大嵩璘男元瑜爲銀青光祿大夫。檢校秘書監。忽汗州都督。依前渤海國王。七年十二月。遣使朝貢。八年。又遣使朝貢。十年二月。黑水酋長十一人朝貢。十一年三月。渤海靺鞨遣使朝貢。賜其使二十人官告。

### 鐵勒

鐵勒者。本匈奴之別種。武德初。有薛延陀。契苾。迴紇。都播。骨利幹。多覽葛。僕骨。拔野古。同羅。渾部。思結。斛薩。奚。結。阿跌。白霽等。散在磧北。皆鐵勒之部內。諸部隋大業中。西突厥處羅可汗強盛。鐵勒諸部皆臣之。後處羅徵稅無度。鐵勒相率而叛歸。及頡利政亂。皆屬于薛延陀。貞觀二十年。旣破延陀。太宗幸靈州。次涇陽。頓鐵勒迴鶻。拔野古。同羅。僕骨。多濫葛。思結。阿跌。契丹。渾。斛薩等十一姓。各遣使朝貢。奏稱延陀可汗。不事大國。暴虐無道。不能與奴等爲主人。自死敗。部落烏散。不知所之。奴等各有所分地。不能逐延陀去。歸命天子。願賜哀憐。乞置漢官司。養育奴等。太宗以破延陀。欲遂空漠庭。見其使至。甚悅。遣黃門侍郎褚遂良。引于縣廳。浮觴積戡。以禮之。夜分乃已。異日。召鐵勒等。並入行宮。張樂以宴之。拜爲郎將。及昭武校尉等官。乃降璽書。勞其酋長。及齋綾錦等。以將厚意。仍遣與乘輿會于靈州。并使右領軍中郎將安永壽往報焉。十一月。太宗至靈州。鐵勒諸部俟斤。頡利發等諸姓。至靈州數千人。咸請列其地爲州縣。又曰。願得天至尊爲奴等作可汗。子孫嘗爲天至尊作奴。死無恨。於是北荒悉平。太宗爲賦詩以敘其事。公卿

咸請勒於石。從之。二十一年正月，鐵勒迴紇、俟利紇等諸姓，並同詣闕朝見。太宗親賚以緋黃瑞錦，及標領袍，鐵勒等覩而驚駭，以爲未嘗聞見，捧戴拜謝，盤叫於塵埃中。及還蕃，太宗御天成殿，陳十部樂而遣之。麟德中，餘黨復叛。

乾封元年三月，鐵勒道行軍大總管右武衛大將軍鄭仁泰、左武衛大將軍薛仁貴，破鐵勒之衆於天山。初，秦等將發京內宴，以餞之，積甲於殿前，令仁貴試之。帝曰：古之善射，能有穿七札者，卿且射五重。仁貴射而徹之，帝大驚賞，更取堅甲以賜之。時九姓有衆十餘萬，令驍健數十人，逆來挑戰，仁貴發三矢，射殺三人，其餘一時下馬請降。仁貴恐爲後患，並坑殺之，更就磧北安撫餘衆，擒其僞葉護兄弟三人而還。軍中歌曰：將軍三箭定天山，戰士長歌入漢關。是後遂絕邊患。

### 薛延陀

薛延陀者，自云本姓薛氏，其先擊滅延陀而有其衆，因號薛延陀。其風俗與突厥同。延陀乙夫鉢之孫曰夷男，率其部落七萬帳，附于頡利。頡利亂，磧北諸姓多歸夷男，共推爲可汗。

貞觀二年，太宗使喬師望冊爲眞珠毗伽可汗，贈之鼓纛，大喜。遂建庭于大漠之北，鬱督軍山下。三年，遣其弟纁特勒來朝，上賜以寶刀及寶鞭，謂曰：汝所有部，有大罪斬之，小罪鞭之，及平頡利，夷男東反，故國建庭于都尉韃北山，猶邏河之南，卽古匈奴之故地，勝兵二十萬，仍立其子爲南北部。太宗恐其太盛，冊

其子皆爲小可汗。外示優崇。實欲分其勢也。會朝廷立李思摩爲可汗。處其部衆於漠南之北。夷男心不悅。

十五年。太宗將有事太山。夷男謀於國曰。天子東封。士馬皆集。我乘此擊思摩。若拉朽耳。因命其子大度設勒兵二十萬寇白道川。詔李勣薛萬徹討之。大敗其衆。

十六年。遣使謝罪請婚。許妻以新興公主。仍令備親迎之儀。太宗欲幸靈武以會之。夷男竟後期不至。乃絕其婚。太宗以其數與思摩交兵。乃降璽書責讓之。又謂其使曰。語爾可汗。我父子並東征高麗。汝若能寇邊者。但當來也。可汗遣使致謝。請發兵來助。太宗答以優詔而止其兵。及太宗拔遼東謝城。破駐蹕之陳。降高延壽。聲震戎狄。而莫離支潛令靺鞨誑惑延陀。啗以厚利。延陀氣懾不敢動。太宗在安市城。謂邊臣曰。以我量之。夷男其死矣。聞者莫測。俄然真珠毗伽可汗死。其少子四葉護殺其兄突利失。可汗而立。是謂頡利俱利薛娑。多彌可汗。而車駕尙在遼東。邊境闕備。遂發兵寇夏州。執失思力擊敗之。多彌可汗輕騎遁走。部內騷然矣。多彌可汗馭下少恩。廢其父時貴臣。任己親昵。多所殺戮。其下不附。國中震恐。皆不自安。時太宗別令校尉宇文法詣烏羅護靺鞨部。適遇延陀阿波設比於東境。法令率靺鞨進擊破之。阿波設謂其國人曰。唐兵至矣。其衆轉相驚擾。如是二旬。諸部大亂。多彌可汗與數十騎往投阿史那時健部落。尋爲迴紇所殺。宗族殆盡。其餘尙存五萬。竄於西域。而立真珠毗伽可汗。猶子咄摩支爲酋帥。



乃去可汗之號。遣使奉表請居鬱督軍山之北。使兵部尚書崔敦禮、英國公李勣就安輯之。太宗謂曰：「叛則擊之，勣等既至，咄摩支惶駭不知所爲，潛謀拒戰，持兩端，勣因縱兵遣擊，前後斬五千餘級，虜男女二萬餘人，後咄摩支入朝，拜爲右武衛將軍。及卒，太宗爲發哀。初，延陀請以其庶長子曳莽爲突利失可汗，居東方，所統者雜種，嫡子拔灼爲四葉護可汗，居西方，所統者皆延陀，詔許之，並禮以冊之。曳莽自知非正嫡，部落又少，意常不協，性又踈擾，而輕用兵，白道之役，卽曳莽倡首，拔灼二之，夷男之卒皆來會葬，焚屍卒哭，曳莽懼，拔灼圖已，先還，拔灼引兵自後襲殺之。延陀以貞觀初建衙於磧北，歷三主，凡二十年，李勣、崔敦禮滅之。」

總章二年十二月，延陀部落餘衆擾亂，詔發突厥進襲，至烏羅德健山，大破之。

# 唐會要卷九十七

## 吐蕃

吐蕃者在長安西八千里。本漢西羌之種也。不知有國之所由。

或云南涼禿髮利鹿孤之子曰樊尼。國滅之後。西奔於羌中。建國爲衆所懷。故姓竇。勃野。或云以禿髮爲

國號。語訛謂之吐蕃。歷魏及隋。隔關諸羌未通中國。

號其王爲贊普。自中國出鄯城五百里。過烏海。入吐谷渾部落。彌多彌蘇毗及白蘭

等國。至吐蕃界。其國風雨雷電。每隔日有之。盛夏氣如中國。暮春之月。山有積雪。地有冷瘴。令人氣急。不甚爲害。其俗重漢繒而貴瑟瑟。男女用爲首飾。其君長或居拔布川。或居邏婆川。有小城而不居。坐大氊帳。張大拂廬。其大可容數百人。兵衛極嚴。而衙府甚狹。俗養牛羊。取乳酪供食。兼取毛爲褐而衣焉。不食驢馬肉。以麥爲麵。人死。殺牛馬以徇。取牛馬頭壘於墓上。其墓正方。壘石爲之。狀若平頭屋焉。其臣與君自爲友。號曰共命人。其數不過五人。君死之日。共命人皆日夜縱酒。葬日。於腳下刺血。出盡及死。便以殉葬。又有親信人。用刀當腦縫鋸。亦有將四尺木。大如指。刺兩肋下。死者十有四五。亦殉葬焉。設官。父死。子代。絕嗣則近親襲焉。非其種類。輒不相代。其官章飾有五等。一謂瑟瑟。二謂金。三謂金飾銀上。四謂銀。五謂熟銅。各以方圓三寸。褐上裝之。安膊前。以辨貴賤。其戰必下馬列行而陣。死則遞收之。終不肯退。槍

細而長於漢者。弓矢弱而甲堅。人皆用劍。不戰亦負劍而行。其驛以鐵箭爲契。其箭長七寸。若急驛。膊前加一銀鶻。有草名速古芒。葉二寸。狀若斜蒿。有鼠尾長於常鼠。其國禁毀鼠。殺之者加其罪。有可跋海。去赤嶺百里。方圓七十里。東南流入蠻。與西洱河合流而東。號爲漾鼻水。又東南出會川。爲瀘水焉。自赤嶺至邏婆川。絕無樹木。唯有楊柳。人以爲資。國置大論。統理國事。無文字。刻木結繩爲約。徵兵用金箭。寇至舉燧。與臣下一年一小盟。用羊狗三年一大盟。用犬馬以麥熟爲歲首。其國都號爲邏些城。用法則嚴整。議事則自下而起。因人所利而行之。此其所以強且久也。重壯賤老。母拜於子。重兵死。惡病終。以累世戰沒者。以爲甲門。臨陣奔逃者。懸狐尾於其首。表其似狐之怯。其贊普弄讚。雄霸西域。

貞觀八年九月。朝貢使至。十四年。遣其相祿東贊致禮。請婚姻。獻金五千兩。自餘寶玩數百事。十五年。以文成公主妻之。弄讚至柏海。親迎於河源。見王人。執子壻之禮甚恭。而歎大國禮儀之美。俯仰有媿沮之色。及與公主歸國。謂所親曰。我祖父未有通婚上國者。今我得尙大唐公主。爲幸實多。當爲公主築一城。以誇示後代。遂築城立棟宇。以居處焉。公生惡其赭面。弄讚令國中權且罷之。身釋氊裘。襲紈綺。漸慕華風。仍遣酋豪子弟。請入國學。以習詩書。又請中國識文字之人。典其表疏。上征遼還。獻大鵝。黃金鑄成高七尺。可受酒三斛。高宗卽位。拜駙馬都尉。封西海郡王。致書於長孫無忌云。天子初卽位。若臣下有不忠之心者。當勒兵以往。並獻金銀珠寶十五種。請置太宗靈座之前。高宗進封賓王。因請蠶種及造酒碾磑。

紙筆之匠，並許之。

永徽元年，弄讚卒。其子早卒，立其孫。立年幼，國事皆委祿東贊。祿東，姓築氏，有謀略。初，太宗許降文成公主，東贊來迎，召見，顧問進對，合旨，乃拜爲右衛大將軍。又以琅邪公主孫女妻之。東贊辭曰：「臣本國有婦，父母所聘，情不忍乖。」且贊普未謁公主，陪臣安敢妄婚。上嘉之。東贊有子五人，長贊悉若，早卒。次欽陵，三贊婆，四悉多于，五勃論。及東贊死，欽陵兄弟復專其國。

通天元年，薛仁貴爲欽陵所敗於大非川。

上元二年，李敬元又敗於青海。欽陵多居中，諸弟分鎮方面，贊婆則專在東境，與中國爲鄰，三十餘年，恆爲邊患。

儀鳳三年，上以李敬元初敗，吐蕃爲患轉甚，召侍臣曰：「吐蕃小醜，屢犯邊境，置之則疆場日駭，圖之則未聞上策，宜論其得失。」各書所懷，給事中劉景先曰：「攻之則兵威不足，鎮之則國力有餘，且撫養士卒，守禦邊境，中書舍人郭正一曰：「吐蕃作梗，年歲已深，興師不絕，非無勞費，近討則徒損兵威，深入則未窮巢穴，臣望少發兵募，且遣備邊，明立烽候，勿令侵掠，待國用豐足，一舉而滅之。」給事中皇甫文亮曰：「且令大將鎮撫，畜養將士，仍命良吏營田，以收糧儲，必待足兵足食，方可以舉而取之。」上曰：「宿將舊人多從物故，自非投戈俊傑，安能克滅兇渠。」中書舍人劉禕之曰：「臣觀自古聖主明君，皆有夷狄爲梗，今吐蕃憑陵，未足

爲恥。願暫戢萬乘之威。以寬百姓之役。給事中楊思忠曰。聖人御物。貴在從時。今兇寇不能懷德。未肯畏威。和好之謀。臣謂非使中書侍郎薛元超曰。臣以爲敵不可縱。縱敵則患生。邊不可守。守邊則卒老。不如料簡士卒。一舉滅之。上顧謂黃門侍郎來恆曰。李勣已後。實無好將。當今以張虔勛紀及善等。差爲優耳。恆曰。昨者洮河兵馬。足堪制敵。但爲諸將失於部分。遂無成功。今無好將。誠如聖旨。

聖歷二年。贊普器弩悉弄年漸長。不平。乃與大臣論巖密計去之。召欽陵。執其親黨二千餘人。殺之。欽陵自殺。

神龍元年。其贊普器弩悉弄卒。其子棄肆。躡贊嗣位。贊時年七歲。使來告喪。中宗爲之舉哀。廢朝一日。俄而棄肆祖母。遣使獻金二千兩。爲棄肆求婚。中宗以所養雍王女降嫁之。自是頻歲貢獻。然亦時犯西邊。景龍四年。來請婚。以左衛大將軍楊矩爲送金城公主使。後矩爲鄯州都督。吐蕃厚賂之。因請河西九曲之地。以爲公主湯沐之邑。矩遂奏與之。吐蕃旣得九曲。其地肥良。又與唐境接近。自後復叛。楊矩懼。飲藥而死。

先天元年十月二十六日。吐蕃遣使來朝。

開元二年五月。吐蕃宰相空達延陀獻書於宰相曰。兩國地界。事資早定。界定之後。然後立盟。其月。吐蕃使其宰相尙欽藏及御史名悉獵來獻盟書。元宗御承天門樓。命有司引見。置酒於內殿。宴遣之。其月。空

達延陀率衆侵我渭源。帝下制親征。會薛訥遇賊數萬衆。戰於武階驛。大破之。乃罷。自五年至十年。凡八來朝。並貢方物。十三年。遣使來賀。不許。

十七年。復遣使來朝。詔忠王及皇甫惟明及內侍張元方使於吐蕃。惟明既見贊普及公主。皆欣然請和。盡出貞觀以來勅書。以示惟明。及遣其重臣名悉獵隨惟明入朝。贊普既獻寶。公主又獻盤雜盞器等物。悉獵頗曉書記。先是。迎公主至長安。當時朝廷。皆稱有才辨。及引入賜宴。與語甚禮之。詔御史大夫崔琳充使宣諭於赤嶺各樹分界之碑。約不相侵。

二十一年二月。金城公主上言。請以今年九月一日。樹碑於赤嶺。定蕃漢兩界。時李嵩使於蕃。金城度其還期。當在暮秋。故有是請。及樹之日。詔張守珪李行禕與其使莽布支同訖其事。是月。遣其大臣屬盧論莽藏來朝。及獻方物。自二十二年。每歲遣使賀正。並貢獻。至二十九年七月。金城公主薨。遣使告哀。仍請和不許。使到數月。始命有司爲公主於光順門發哀。輟朝三日。天寶中。連事西討。進收黃河九曲。拔其石堡城。

至德二載三月。復遣使請和。且助國討逆。詔遣南巨川報之。明年二月。又遣使來朝。復請盟。詔從之。大歷元年至十年。七來朝貢。十三年正月。遣將馬重英率衆四萬侵靈州。奪我水口。填漢渠。御史渠。以弊屯田。

建中元年正月入蕃使太常少卿韋倫至。自大歷已後吐蕃陷我河隴諸州。聘使前後數輩。皆留之不遣。邊上每俘獲其人。亦令中官部統徙之江嶺。德宗初即位。務以德綏遠方。徵其俘囚五百人。給衣一襲。使韋倫給還其國。與之約和。仍勅邊將無得侵伐。吐蕃始聞歸其人。不之信。及蕃俘入境。部落皆畏威懷惠焉。又命倫爲太常卿。復使吐蕃。其年十二月。倫至自蕃中。與其宰相論欽明思等五十五人皆至。獻其方物。吐蕃見倫再至。甚歡。既就館。聲樂以娛之。留九日而旋。兼遣其渠帥報命。倫一歲再往絕域。戎夷奉教。無此之速也。

二年三月。以萬年縣令崔漢衡爲殿中少監。持節使西戎。初吐蕃遣使求沙門之善講者。至是遣僧良琇。文素二人行。每人歲一更之。其年十二月入蕃。使判官監察御史常魯與吐蕃使論悉諾羅等至自蕃中。奏請改勅書以貢獻爲進。以賜爲寄。以領取爲領之。優詔降諭曰。前相楊炎不循故事。致此誤耳。並從之。三年九月。崔漢衡與蕃使區類贊至自吐蕃。乃約靈州以賀蘭。涇州以彈箏峽西口。隴州以清水爲漢界。皆建碑以誌之。期以是年十月十五日。相與同盟於境上。其年十月。以都督員外郎樊澤兼御史中丞。充吐蕃計會使。約以來年正月十日。會盟於清水。

四年正月。詔隴右節度使張鎰與吐蕃使尙結贊等於清水會盟。官崔漢衡等七人。與結贊及宰相等七人。俱昇壇爲盟。夏四月。吐蕃將先沒蕃將士僧尼等至自沙州。凡八百人。報元年之德。

貞元元年九月遣左監門衛將軍康成使於蕃中且定界十月鳳翔節度使李晟遣兵襲吐蕃於推沙堡大破之焚其儲積斬蕃酋扈屈律設贊等七人傳首京師結贊等聞而大懼累遣使請和仍約盟會上皆不許會馬燧自河東至且保明其誠至乃許之

二年九月吐蕃遊騎及於好時京師戒嚴上遣左金吾衛將軍張獻甫等統兵屯於咸陽其月二萬餘衆又寇鳳翔城下李晟出兵禦之一夕而退其年十一月吐蕃陷我鹽州初賊之來寇也刺史杜彥光使以牛酒犒之吐蕃謂曰我欲州城居之聽爾率其人而去彥光乃率衆奔鄜州其年十一月吐蕃陷夏州亦令刺史拓拔乾曜率衆而去復據其城自是又寇銀州銀州素無城壁居者奔散蕃亦棄之

三年二月以前太子右諭德崔澣爲檢校左庶子兼御史中丞充入蕃使四月至自鳴沙不數日澣復以鴻臚卿兼中丞又充入蕃使令澣報蕃宰相尙結贊曰杜希全職在靈州不可出境李觀又已改官遣侍中渾瑊充盟會使約以五月二十四日復盟於清水又令告尙結贊以鹽夏二州歸於我然後就盟會其年夏吐蕃背盟於平涼城

八年九月劍南西川節度使韋臯攻吐蕃之維州獲大將軍輪贊熱以獻十一月山南西道節度使嚴震奏擊破吐蕃於芳州及黑水堡焚其積聚并獻首俘

十年五月劍南西川節度使韋臯又奏西山峨和城擊破吐蕃二萬餘衆攻拔城柵斬首三千八百餘級



獲其器械牛馬。其年八月。先沒蕃中使李朝清歸自吐蕃。

十三年正月。贊普遣使農索昔齋表請和好。帝以其豺狼之性。數負恩約。不受表狀。任其使卻歸。七月。韋臯奏。去年二月十七日。吐蕃於劔山馬嶺三路分軍下營。僅住一月。進軍逼臺登城。嵩州刺史曹高任。率諸軍將士。并東蠻子弟。合勢接戰。自朝及午。大破之。生擒大籠官七人。陣上殺獲甚衆。

十七年七月。吐蕃陷我麟州。殺刺史郭鋒。毀城隍。大掠居人。驅黨項部落而去。次鹽州西九十里。橫槽烽。頓軍。有蕃卒傳呼延州僧延素輩七人。稱徐舍人召。其火隊吐蕃沒勒遽引延素等疾趨至帳前。皆馬革。楛手。麻繩縲頸。見一吐蕃年少。身長六尺餘。朱髭大目。乃徐舍人也。命解縛坐帳中。曰。師勿懼。予本漢人。司空英公五代孫也。屬武后。斲喪王室。余高祖建義中。泯子孫流播絕域。今三代矣。雖代居戎職。位掌兵要。思本之心無涯。故血族無由自拔耳。此蕃漢交境也。復九十里至安樂州。師無由束矣。延素曰。僧身孤親老。敢祈全活。悲不自勝。又曰。余奉命率師備邊。因求資食。遂涉漢疆。展轉東進。至麟州城下。城既無備。援兵又絕。是以拔之。知郭使君是勳臣子孫。必將活之。不虞爲亂兵所害。適有飛鳥使至。飛鳥猶中國驛騎也。云術者上變。召軍亟還。遂解縛歸之。時詔命韋臯分遣偏將。勒步騎合二萬。出成都西山。南北九道。並進。逼棲雞老翁。故維州保州松州諸城。以紆北邊故也。其年九月。韋臯又奏大破吐蕃於維州。十八年正月。韋臯又破吐蕃。生擒大首領論莽熱來獻。至二十年三月。以吐蕃贊普卒。廢朝三日。命工部

侍郎兼御史大夫張薦弔祭之。四月吐蕃使臧河南觀察使論乞冉等五十四人來朝貢。至二十一年七月贊普使論乞縷勃藏來奉獻德宗皇帝山陵金銀衣服牛馬等。陳於太極殿庭。元和元年七月遣使論勃藏等來朝并獻方物。

五年春以吐蕃俘人歸於西蕃虜遣使論思邪熟來朝并歸鄭叔矩路泌之柩及叔矩男文延等一十三人叔矩貞元初平涼背盟所陷凡二十餘年竟不屈節。

其年五月命宰臣杜佑等與吐蕃使議事於中書令廳且言歸我秦原安樂州地自六年至十年遣使朝見并獻方物相繼不絕。

十一年西川奏吐蕃贊普卒。

十二年吐蕃告哀使論乞冉獻馬十匹玉帶金器等。

十三年宴吐蕃使於中書八月吐蕃使論司熱等七人辭於宣政衙已事不退且徵國使詔有司諭之方出勅今後入迴鶻吐蕃南詔使所奏隨從不得過三十人新羅使不得過二十人迴鶻吐蕃使下合授正官不得過十人南詔不得過五人其年十月吐蕃圍我宥州命夏州兵擊退之。

十四年三月詔蕃使論矩立藏等并後般來使並宜放歸本國八月寇我鹽州及慶州方渠下營大軍至河州界其年復遣論矩立藏來朝貢立藏自稱曰和好詔納其請遣還其年十月以太子中允張賈爲太

府少卿攝御史中丞持節充入蕃答請和好使尋貶賈爲撫州責其逗留不行也以邵同代之至其年十二月靈武奏吐蕃大軍營於黃河北煙塵數十里鳳翔進吐蕃表函一封西川奏吐蕃入雅州界時方鎮鄰接蕃界者皆奉詔備禦東川節度使王涯上言臣道當出軍徑入賊腹有兩路一路從龍州青川鎮入吐蕃界直抵故松州城是吐蕃舊置節度之所一路從緜州威蕃柵入蕃界直抵柵雞城是吐蕃險要之地涯又陳備禦吐蕃要略曰臣伏願陛下不愛金帛之費以釣北虜之心遣信臣與之定約曰犬戎爲邊患者數矣能制而伏者惟有北蕃如能發而深入殺若干人取若干地則投若干之賞開懷以示之厚利以啗之一戰之後西戎亦衰矣

長慶元年四月遣尙綺力陀思來朝并獻國信其月吐蕃使郭居簡朝貢兼遣宰臣馬又遣使論納羅來請盟

其年八月吐蕃請盟許之宰相欲重其事請告太廟太常禮院奏謹按肅宗代宗故事與吐蕃會盟並不告廟惟德宗建中末會盟於延平門欲重其誠信特令告廟至貞元三年會於平涼亦無告廟之文伏以事出一時又非經制求之典故亦無其文今參詳不合告從之十月命宰相崔植等十四人與吐蕃使論納羅盟於郡城西王會寺十一月又遣使論答熟等來朝

二年五月又遣使論贊等來朝并進馬六十四羊二百口及銀器玉帶等七月入蕃會盟使劉元鼎奏以

五月六日與吐蕃盟於悶懼盧川。是川蓋贊普之夏衙也。中有臧河流焉。滿川多紫薇樹。其月吐蕃使論悉諾息等隨元鼎來謝。十月命太僕少卿兼御史中丞杜載持節充答吐蕃謝會盟使。

三年正月遣使論答熟來賀正朔。并進羊六百口。

四年遣使來求五臺山圖。

寶歷元年三月遣尙綺立熟來朝。且請和好。

二年十一月詔遣光祿卿兼御史大夫李銳持節入蕃。充答和好使。

太和五年正月遣使論乞熟來朝。

六年又遣使論董勃藏來朝。

九年正月遣使論籠熟來朝。

開成元年遣使論悉立熟來朝。正并獻國信及馬。

二年遣使論監通來朝。先是遣宗正少卿兼御史中丞李從簡入蕃。其年五月。至自蕃中。進國信金銀器。玉帶。獺褐。犛牛尾。朝霞氍。雜藥。并馬牛橐駝等。詔以其信物頒賜宰臣已下。

四年遣使論焦熟等來朝。

會昌二年贊普卒。至十二月遣使論贊熟等來告喪。詔廢朝三日。仍令文武常參官四品已上。就鴻臚寺弔。

其使者詔遣將作少監兼御史中丞李璟持節入西蕃充弔祭使。

三年正月璟至自吐蕃。

大中三年春吐蕃宰相尙恐熱殺東道節度使以秦原安樂等三州并石門木峽等七關款塞涇原節度使康季榮以狀聞上命太僕卿陸耽往勞焉其年七月河隴耆老率長幼千餘人赴闕下上御延喜樓觀之莫不歡呼作舞更相解辯爭冠帶於康衢然後命善地以處之觀者咸稱萬歲八月勅曰自昔王之有國也何嘗不文以守成武以集事參諸二柄歸乎太寧朕猥荷丕圖思宏景業憂勤戒惕四載於茲每念河湟土疆絲互遐闊自天寶末犬戎乘我多難無力禦茲遂縱腥羶不遠京邑事更十葉時近百年進士試能靡不竭其長策朝廷下議亦皆聽其直詞盡以不生邊事爲永圖且守舊地爲明理荏苒於是收復無由今者天地儲祥祖宗垂佑左衽輸款邊壘連降創業建功所謀必克實賴樞衡妙算將帥雄俊副元元不爭之文絕漢武遠征之悔甌脫頓空於內地斥堠全據於新封莫大之休指期而就況將士等櫛風沐雨暴露郊原披荆棘而刁斗夜嚴逐豺狼而穹廬曉破動皆如意古無與京念此誠勤宜加寵賞涇原宜賜絹六萬匹靈武五萬匹鳳翔邠寧四萬匹並以戶部產物充仍待季榮叔明玘君緒各領征師到本鎮度支差腳兩司各差人押領送至本道分付令充節級優賞四道牧州牧有功勞軍將各宜具名銜聞奏當議甄獎原州秦州威州并七關側近訪聞土地肥沃水草豐美如有百姓要墾闢耕種五年不加賦

稅五年已後。量定戶籍使。任爲產業。溫地有鹽。頗開厚利。如置權稅。可贖邊陲。仍委度支計度制置開奏。四道長吏如能各於鎮守處遣官健營田。度支出牛糧種子。每年量得多少充軍糧。亦不限約定數。原州秦州威州并七關鎮守官健。每人各給衣料兩分。一分依常年例支給。一分度支加給。仍二年一度替換。其家口委長吏切加安存。官健有莊田戶籍者。仰州縣放免雜差役。秦州至隴州已來道路。要置堡柵。與秦州應接。季李玘與劉臯卽便計度開奏。如商賈往來。興販貨物。任澤利潤。一切聽從。關鎮不得邀詰。其官健父兄弟來往。通傳家信。不限多少任去。如要墾闢種田。依百姓例處分。三州七關。如要器械。長吏與量據所要申奏。除授刺史關使後三五月內。差人巡檢。有如修築部署。課績殊尤。并訓練有度者。其刺史關使雖新授官爵。亦更與超昇。其官健節級更與優賞。山南西道劔南西川邊界沒蕃州縣。量力收復。其兵士委本道差遣。如要錢物接借。亦具聞奏。三州七關創置戍卒。且要務靜。如有羌戎潛來博易。輒不得容受。委刺史關使切加禁斷。或有投降吐蕃到邊上收取。本道令長吏奏取進止。其京城有犯事合流役囚徒。從今已後。一切配在十處收管。嗚呼。七關要害。三郡膏腴。候館之長址可尋。唐人之遺風尙在。遡懷往事。良用興嗟。夫取不在廣。貴保其金湯。得必有時。詎計於遲速。今則便務修築。不逞干戈。必使足食足兵。有備無患。載洽亭育之道。永致生靈之安。遠邇臣僚。宜體朕意。

咸通七年十月。沙州節度使張義潮奏。差迴鶻首領僕固俊與吐蕃大將尙恐熱交戰。大敗蕃寇。斬尙恐

唐會要  
卷九十七  
熱傳首京師。

# 唐會要卷九十八

## 迴紇

迴紇在薛延陀北境。居近婆陵水。去京師六千九百里。勝兵五萬人口十萬。先屬於突厥。初有特健俟斤死。有子曰菩薩。部落以爲賢而立之。由是大振。菩薩勁勇有膽氣。善籌策。常以少制衆。其母烏羅渾主知爭訟之事。平反嚴明。其地沙鹵有大羊而足長五寸。貞觀二十一年正月。率衆內附。

顯慶三年十二月。以迴紇故燭龍州刺史吐迷度子婆閏授左衛大將軍。

龍朔三年二月。移燕然都護府於迴紇部落。仍改名瀚海都護府。其瀚海都護府移雲中古城。改名雲中都護府。仍以磧爲界。磧以北諸州爲蕃州。悉隸瀚海。磧南並隸雲中。婆閏卒。子比來栗代立。比來栗卒。子獨解支立。其都督親屬及部落征戰有功者。並自磧北移居甘州界。故天寶末。取驍壯以充赤水軍騎士。在磧北者。自則天後。並爲默啜所役屬。仍別立都督以統之。獨解支卒。子伏帝匍立。爲河西經略副使兼赤水軍使。

開元七年。伏帝匍卒。贈特進。遣使弔祭。子承宗立。承宗爲涼州都督王君奭誣奏。長流灤州而死。其部落猶存。天寶初。迴紇葉護逸標苾襲滅突厥。厥小殺之孫烏蘇米施可汗未幾自立爲九姓可汗。由是至今兼



九姓之號。因而南徙。居突厥舊地。依烏德健山。盟昆河居焉。雖行逐水草。大抵以北山比中國之長安城。

直南去西城一千七百里。

西城卽漢之高闕塞。

北去磧口三百里。有十一都督。九姓部落。一部落置一都督。於本族中。

選有人望者爲之。破拔悉密及葛邏祿。皆收一部落。各置都督一人。每行止戰鬪。以二客部落爲鋒。其九

姓。一曰迴紇。二曰僕固。三曰渾。四曰拔曳固。

卽拔野古。

五曰同羅。六曰思結。七曰契苾。以上七姓部。自國初以

來。著在史傳。八曰阿布思。九曰骨崙屋骨恐。此二姓天寶後始與七姓齊列。天寶三載三月。朝廷以逸標

苾有誅烏蘇米施功。封爲奉義王。及破拔悉密。自稱骨咄祿毗伽闕可汗。又遣使朝貢。四載。加授特進。五

載。册爲懷仁可汗。六年。逸標苾卒。子磨延啜立。國人號爲葛勒可汗。磨延啜勇悍善用兵。十五載。迴紇吐

蕃遣使請和親。助國討逆。葛勒可汗太子葉護以精騎三千。隨朔方節度使郭子儀討賊。

至德元年七月。肅宗卽位於靈武。二載五月朔。駕在彭原。四月。官軍爲賊將安守忠所敗於清渠北。乃遣

中官竇議使於迴紇。令發其兵。九月。迴紇遂遣太子葉護領蕃兵四千餘人來助討賊。葉護入見肅宗。親

宴慰。賜以金帛。廣平王俶領朔方安西迴紇南蠻大食之衆十五萬。討安慶緒。旣戰。大敗逆賊。遂收東京。

十一月。迴紇至東京。勅百官于長樂驛迎。上御宣政殿。引葉護宣慰。其餘酋長列于階下。賜錦繡繒綵銀

品物甚多。葉護辭歸。帝謂曰。能爲國家就大事者。卿方也。何遽去耶。葉護奏曰。迴紇戰兵留在沙苑。欲更

爲陛下收范陽。馬少不足以討除餘孽。請且歸靈夏。已北取馬。用濟其事。優詔答之。仍許和親。

乾元元年六月遣達亥阿波來迎公主拜開府儀同三司並獻馬五百匹貂裘白氍毹等又遣宰相帝德領驍將三千人助國討賊七月册命葛勒可汗爲英武威遠毗伽可汗封幼女爲寧國公主以降焉八月遣三子骨噉特勒來朝九月遣大首領蓋將軍等謝主下降又遣三婦人來謝二年四月英武威遠毗伽可汗卒長子葉護先被害少子移地健立是爲牟羽可汗

寶應元年四月迴紇演者裴羅等十八人來朝八月可汗自將精騎五千南踰太原晉絳屯兵于陝州平陸縣遣使奏請助王師討平殘寇是日引其使宴於延英殿賜物有差命左散騎常侍兼御史大夫尙衡使於迴紇軍宣慰可汗遣弟右殺領精騎三千與行營節度使僕固懷恩破逆賊史朝義于北邙山二年正月可汗辭還蕃六月册命爲頡咄登里骨噉密施合俱錄英義建功毗伽可汗

大歷十三年正月迴紇寇太原河東節度留後鮑防出師與迴紇戰於陽曲我師敗績死萬餘人三月河陽將士劫迴紇輜重因大掠河陽坊市迴紇格戰死數千人

十四年英義建功可汗爲其下所殺

建中元年六月册迴紇合骨咄祿毘伽可汗爲武義成功可汗命京兆尹源休持節册立初德宗遣中官梁文秀告哀於迴紇且修舊好可汗移地健不爲禮而九姓胡素屬於迴紇者又陳中國便利以誘其心其相頓莫賀達干諫不聽因大怒擊殺之并殺其親信及九姓胡所誘來者凡三千人頓莫自立號爲合

骨咄祿毗伽可汗使其酋長聿達于隨文秀來朝。故命休冊拜焉。

二年六月以兼光祿卿李涵爲散騎常侍充弔冊迴紇使。

貞元三年八月迴紇使合闕將軍歸蕃。初合闕將虜命請婚於我。許以咸安公主嫁之。命公主見合闕于麟德殿。又令中謁者齋公主畫圖賜之。可汗四年十一月迴紇公主及使至自本藩。德宗御延喜門以觀之。可汗喜于和親。其禮甚恭。乃言曰。子塔半子也。父患于西。我子也。當遣兵除之。又罵辱吐蕃使。乃使其宰相等率衆千餘人及妹吐骨祿毗伽公主。姨迷叔咄祿公主及職使大首領等妻妾凡五十六婦人來迎。可敦聘馬三千匹。勅令朔州及太原分留迴紇七百餘人。其宰相大首領等至者。館于鴻臚寺。召迴紇公主及使者對於麟德殿。頒賜有差。詔以咸安公主出降。迴紇可汗仍特置府。官屬並同親王府。十一月冊令骨咄祿武義成功可汗爲天親可汗。

五年七月公主至衙帳。迴紇使李義進請因咸安公主下降。改紇字爲鶻字。蓋欲誇國俗俊健如鶻也。德宗允其奏。自是改爲迴鶻。其年九月天親可汗卒。子多邏斯立。國人謂之判官特勒。詔冊爲登里邏沒密施。俱錄忠貞毗伽可汗。以鴻臚卿兼御史中丞郭鋒爲弔冊迴鶻使。至六年四月忠貞可汗卒。子阿斲立。十月郭鋒至自迴鶻。初鋒奉使冊忠貞可汗。是歲忠貞爲弟所殺而篡立。時迴鶻大將頡于迦斯西擊吐蕃。未迴。及四月其次相率國人殺篡者而立忠貞之子爲可汗。方年十七歲。及六月頡于迦斯西討迴。將

至牙帳。次相等懼其復有廢立，不欲漢使知之。留鋒數月而迴。及頡于迦斯之至也，可汗等迎于郊野，盛陳鋒所送國信器幣。可汗與次相等皆俯伏，自言廢立之由，且請命曰：今日惟大臣生死之，悉以所陳器幣贈頡于迦斯以悅之。可汗又拜泣曰：兒愚幼無知，今幸得立，惟仰食阿爹。國政悉不敢聞也。迴鶻謂父曰：阿爹七年二月，詔冊阿啜爲奉誠可汗，遣鴻臚少卿御史大夫庾鋌持節弔祭冊命之。四月，迴鶻遣使律支達于等來朝，且告小寧國之喪。

小寧國榮王琬之女，寧國將有行，肅宗念其遠去，故遣媵之。及歸寧，遂留虜中國人號爲小寧國公主也。

九月，敗吐蕃于北庭，使獻

捷。十年四月，奉誠可汗卒，奉誠無子，國人立其相骨咄祿將軍。詔冊冊爲滕里邏羽祿沒密施合祿胡毗伽懷信可汗。五月，令祕書少監兼御史中丞史館修撰張薦持節弔祭冊立之。其骨咄祿將軍本姓跌跌少孤，爲迴鶻大首領所養。及長，有武藝辯慧，自天親可汗時已掌兵馬衙官。諸大首領多敬服之，奉誠無嗣。國因奉爲王。其天親以上諸可汗有子見幼小者，並送闕庭。至德後，迴鶻于中原有功，故懷信可汗不敢言奉誠，從人望也。

永貞元年，懷信可汗卒，使來告喪。十一月，奉冊命可汗爲愛登里邏羽德密施俱錄毘伽可汗。未詳愛登里邏與懷信何親，史並不載。以鴻臚少卿兼御史中丞孫杲持節充弔祭冊立使。至元和元年二月，凡三朝貢。三年二月，迴鶻

使來告咸安大長公主之喪，廢朝三日。公主，德宗第八女也。本降天親可汗，卒，子忠貞可汗立。忠貞可汗

卒。子奉誠可汗立。奉誠可汗卒。國人立其相。是爲懷信可汗。皆從胡法。繼尙公主。在蕃凡二十一年。卒。冊贈燕國大長公主。賜諡曰襄穆。三月。御麟德殿。對迴鶻使多覽將軍等。賜白綵錦衣服銀器有差。自迴鶻請修蕃臣之禮。五年後。累遣使朝貢。六年。迴鶻可汗卒。遣使掘野居葛勒將軍來告喪。七年正月。冊命可汗爲軍登里邏骨德密施合昆伽可汗。命檢校工部尙書鴻臚卿兼御史大夫張茂宣持節弔祭。冊立之。八年四月。迴鶻請和親。伊珠難還蕃。宴于三殿。贈銀器繒帛。九年。僕固昌來朝。十一年正月。御麟德殿。引對迴鶻使。賜錦綵銀器有差。三月。又遣使押進橐駝九頭馬八十四匹。十一年。迴鶻可汗卒。遣使來告喪。十一月。冊迴鶻可汗爲愛登里邏骨沒密施合毗保義可汗。命宗正少卿兼御史中丞李孝誠持節弔祭。冊立之。十五年三月。御麟德殿。引見迴鶻使合達于等。許其尙主。其月。封第九妹爲永安長公主。降嫁迴鶻可汗。

長慶元年三月。保義可汗卒。輟朝三日。四月。冊迴鶻可汗爲君登里邏羽祿密施勾主祿毗伽崇德可汗。五月。迴鶻宰相都督公主摩尼等至。迎所降公主也。初。保義可汗求婚。許降以永安公主。保義旣卒。則宜改定。而酋人固請永安。尋以第五妹封太和公主。出降迴鶻。命中書舍人王起就鴻臚寺宣諭焉。上御麟德殿。對迴鶻使及公主五十人等。賜錦繒銀器有差。六月。勅太和公主宜特置府。命宰相杜元穎充五禮使。迴鶻宰相并公主獻駝褐白錦白練貂鼠裘鴨頭子玉腰帶等馬一千匹。駝五十頭。至七月。冊太和公

主爲仁孝端麗明智上壽可敦命左金吾衛大將軍兼御史大夫胡証爲送公主及册可汗使光祿卿兼御史大夫李憲爲之副三年崇德可汗卒其從父弟曷薩可汗立遣使來告喪册曷薩可汗爲愛登里囉汨沒密施合毗伽昭禮可汗命工部尙書兼御史大夫鄭權弔祭册立之寶歷中頻使朝貢至太和六年爲其下所殺其從子胡特勒立遣使告喪爲之廢朝詔册胡特勒爲愛登里邏汨沒密施合毗伽彰信可汗命左驍衛將軍兼御史大夫唐宏實持節弔祭册立之

開成四年其相掘羅勿薦公引山北沙陀攻圍之可汗自殺國人立勿薦公爲匿颯可汗未受册命連年饑疫羊馬死者被地又大雪爲災武宗卽位遣嗣澤王溶告喪始知易代其年爲黠戛斯所害其國分散有烏介特勒者曷薩之弟胡特勒之叔也亦率衆南奔至錯子山乃自立爲可汗居塞上朝廷遣鴻臚卿張賈右金吾將軍王會往宣諭分邊備以振食之兼就大同川還其馬價絹且册爲可汗遣將作少監兼御史中丞苗鎮持節駐于河東待其底定然後受之而可汗違背恩德侵劫諸部落旋又擅入雲州將入振武上以爲天亡數盡不可容也乃命河東等遣兵討之

會昌三年正月諸軍大破迴鶻於殺湖山就虜帳中奉太和公主歸於我軍其特勒以下大衆數萬人盡降獲其前後所賜勅書可汗亦被瘡與百騎踰山遁走捷書至宰相率百僚閣中稱賀先是迴鶻宰相嗚沒斯特勒將其家屬及麾下數千人來降上嘉之降書撫納仍賜姓李氏封懷化郡王改名思忠賜甲第

於永樂坊并家屬遺所在給傳赴闕其軍士分子諸鎮收管用壯騎兵。

西爨

西爨者南寧之渠帥。自云本河東安邑人。七世祖事晉爲南寧州太守。屬中國亂。遂王蠻夷。梁元帝時。南寧州刺史徐文盛徵詣荊州。有爨瓚者。遂據南寧之地。延袤二千餘里。俗多華人。旣死。其子震翫統其衆。高祖受禪。拜翫子宏達昆州刺史。令持其父屍歸葬本鄉。益州刺史段綸又遣俞大施至南寧諭之。由是部落歸款。武德七年七月二十四日來貢方物。

昆彌國

昆彌國者。一曰昆明。西南夷也。以爨之西洱河爲界。卽葉榆河也。其俗與突厥略同。去京師九千里。勝兵數萬人。相傳云與匈奴本是兄弟國也。漢武帝得其地。入益州郡部。其後復絕。諸葛亮定南中。亦所不至。武德四年。蕪州治中吉宏偉使南寧。因至其國諭之。至十二月。遣使朝貢。因求內附。自是每歲不絕。其使多由黔南路而至。近又封其別帥爲滇王。世襲其國。貞觀十九年四月二十日。右武侯將軍梁建方討蠻。降其諸屯七十二所。戶十萬九千三百。遣使往西洱河。有數十百部落。大者五六百戶。小者二三百戶。無大君長。有數十姓。以楊李趙董爲名。家各擅一州。不相統攝。自云其先本漢人。有城郭村邑。自夜郎滇池以西。皆云莊蹻之餘種也。其土五穀與中夏同。以十二月爲歲首。

林邑國

林邑漢日南象郡之地。其先因漢女子徵則之亂。縣功曹子區連殺縣令。自號爲王子孫相承。後王無子。其甥范熊代立。晉宋已來。恆通中國。其地恆溫。不識冰雪。常多霧雨。人能用弩。以藤爲甲。王出則列象千頭。信佛法。以二月爲歲首。稻歲再熟。有結遼鳥。能解人語。亦謂之結了鳥。蓋夷音訛也。

武德六年二月。其王范梵志遣使朝貢。至貞觀四年。又貢火珠。大如雞卵。圓白皎潔。狀若水晶。正午向日。以艾承之。卽火燃。五年。又獻白鸚鵡。精識辨慧。善於應答。太宗憫之。並付其使。令放歸林。數十四年。其國獻通天犀一十枚。諸寶稱是。永徽總章中。其王鉢迦舍波摩累獻馴象。先天開元中。其王建多達摩。又獻馴象沈香琥珀等。

天寶八載。其王盧陀羅使獻真珠一百條。沈香三十觔。鮮白氎。馴象二十隻。自至德後。遂改稱環王國。不以林邑爲號。貞元九年。環王因遣使貢犀牛。上令見於太廟。

元和四年八月。安南都護張舟奏。破環王國僞驩愛州都督。殺三萬餘人。獲其王子五十九人。器械戰船。戰象稱之。

咸通二年十二月。寇安南府。遣神策將軍康承訓率禁軍并江西湖南之兵赴援。

先是大中末。安南都護李琢貪暴。侵刻獠民。羣獠引蠻攻



安南。至咸通三年。大徵兵赴援。  
天下騷動。其年東蠻竟陷交趾。

真臘國

真臘在林邑之西南。本扶南之屬國也。南接車渠。西接朱江國。其王姓刹利氏。其俗東向開門。國以東爲上。有戰象五千頭。梁大同中。始并扶南而有其國。都伊奢那城。風俗與林邑同。

武德六年十月。遣使來朝。

貞觀二年十一月。又與林邑國俱來朝貢。太宗嘉之。賜賚甚厚。今南方人謂真臘國爲吉蔑國。自神龍已後。真臘分爲二半。以南近海多陂澤處。今謂之水真臘。半以北多山阜處。今謂之陸真臘。亦謂之文單國。貞觀中。累遣使朝貢。永徽二年。遣使獻馴象。

聖歷元年。開元五年。天寶九年。並遣使朝貢。并獻犀牛。水真臘國者。其境東西南北。約皆八百里。東至奔陀浪洲。西至墮羅鉢底國。南至小海。北至陸真臘國。其王所處城。號娑羅提拔城。國之東有小城。皆謂之國。其國甚多象。餘所出物產及言語。與真臘同。  
元和八年。遣使李摩那等來朝。

白狗羌

白狗羌。西羌之別名。與會州連接。勝兵一千。白蘭羌。亦西羌之別種。風俗並與黨項國同。

武德六年十二月遣使朝貢。

貞觀五年十二月其渠帥並來朝。

永徽二年十一月特浪生羌卜樓莫各率衆萬餘戶詣茂州歸附其年正月生羌大首領凍就率部落內附以其地置建州顯慶中白蘭爲吐蕃所併收其兵以爲軍鋒。

開元二十九年益州長史章仇兼瓊發其國及索摩等諸州籠官三百餘出至奉川望準女國等例簡擇許令入奏餘並就奉川宴賞放還從之其年十月白狗國四品籠官蘇唐封及狗十川五品籠官薛阿封管至各賜紫金及帛以遣之。

貞元九年七月其王羅陀忽逋租又與女國等詣劍南西川節度使韋臯內附謁授試太常卿兼保州司馬至今子孫承襲其爵。

### 曹國

曹國居埋邨密水南古康居之地俗與康國同附于突厥勝兵千餘人好淫祠罄資產而無悔去瓜州六千里。

武德七年七月朝貢使至云本國以臣爲健兒聞秦王神武願在麾下高祖大悅。

貞觀十一年至開元中朝貢不闕。

天寶元年。其王哥邏僕羅使獻方物。三載。詔封其王爲懷德王。四載。哥邏僕羅上表。自陳曾祖以來。奉向天可汗。忠赤。常受徵發。望乞恩慈。將奴土國。同於唐國。小子所須。驅遣。奴身一心。爲國征討。十一載。其王設阿忽。與國副王野解。及九國王。並上表。請同心。擊黑衣大食。元宗宴賜。慰諭遣之。又有中曹國。在西曹國之東。康國之北。其所治。謂之迦布底真城。在平川。其人長大。工於戰鬥。又有西曹國。治卹密水南。瑟底痕城。東南去康國一百里。西北至何國二百里。南與史國界接。北與波覽國界接。其城東北四十里。有越於底城。內有得悉神。遠近敬信之。有金人金頗羅。闊一丈五尺。每日所祭羊馬。千人食之不盡。并有金銀器。胡書題云。漢天子所賜神器。隋大業中。始通武德。以後常修蕃禮。

殊柰國

殊柰。崑崙人也。在林邑南。去交趾海行三月餘日。習俗文字。與婆羅門同。絕遠未嘗朝中國。貞觀二年十月。使至朝貢。

拔野古國

拔野古。在僕骨東境。勝兵一萬。口六萬人。皆殷富。其地東北一千里。曰康干河。有松木入水。一二年而化爲石。其色青。有國人居住。其人謂之康干石人。皆著木腳。冰上逐鹿。其國東北六日。行至鞠國。有樹無草。無羊馬。有鹿如中國牛馬。使鹿牽車。可勝三四人。衣鹿皮。鹿食地苔。自鞠國東行十五日。並僉折國。土地

廣大。百姓多。風俗與拔野古同。少牛馬。地多豹鼠。骨吐鞠國北有大漢國。饒羊馬。其人極長大。長者至丈三四尺。其國云北有骨帥國。與大漢國相接。戶萬五千。勝兵三萬。

### 霽洗國

霽洗。匈奴之別種。居鮮卑故地。亦與靺鞨爲鄰。勝兵萬人。並臣於頡利。習俗與突厥略同。其渠帥號爲俟斤。

貞觀三年朝貢。至二十一年。列其地爲賓顏州。卽以其酋長爲刺史。先是。太宗蕩平突厥。其番望多授以侍衛之官。沙漠之人。素愛錦罽。太宗旣招來遐域。特賜其好者。用文錦。析用舊縷。而錯綜其色。花葉翔走。事多殊形。每頒賜。其酋長大爲榮寵。

顯慶五年。以其首領李含珠爲居延都督。含珠死。以其弟厥都爲居延都督。自後無聞焉。

### 黨項羌

黨項在古析支之地。漢西羌之別種。魏晉已降。西羌微弱。自周滅宕昌鄧至之後。黨項始強。南雜春桑迷桑等羌。北連吐谷渾。其種每姓別。自爲部落。一姓之中。復分爲小部落。大者萬餘騎。小者數千騎。不相統一。有細封氏。費聽氏。往利氏。頗超氏。野辭氏。旁當氏。米擒氏。拓拔氏。最爲強族。俗皆土著。有棟宇。織犂牛及羊毛覆之。俗尙武。無法令賦役。其人多壽。年至百五六十歲。不事生產。好爲竊盜。互相凌劫。尤重復讎。

若讎人未得。必蓬頭垢面。跣足蔬食。要斬讎人而後復故常。男女並皆衣裘褐。仍被大氈。不知耕稼。土無五穀。氣候多風寒。以犛牛馬騾羊豕爲食。五月草始生。八月霜雪降。求大麥于他界。醞以爲酒。妻其庶母。及伯叔母。嫂子弟之婦。淫穢蒸報。諸夷中最爲甚。然不婚同姓。老死者。以爲盡天年。親戚不哭。少死者。則云天枉。而悲哭之。死則焚屍。名爲火葬。無文字。但俟草木以記歲時。

貞觀三年。南會州都督鄭元璿遣招諭。其長細封步賴舉部內附。亦自入朝。列其地爲軌州。拜步賴爲刺史。其後諸部相次內附。列其地爲峒峩奉巖遠四州。各拜首領爲刺史。五年。詔遣使開其河曲地爲六十州。內附者三十四萬口。有羌酋拓拔赤詞者。甚爲渾主伏允所暱。與之結婚。屢抗官軍。後與其從子思頭並率衆與諸首領歸款。列其地爲懿嵯麟可等三十二州。以松州爲都督府。羈縻存撫之。拜赤詞爲西戎州都督。賜姓李氏。自是。從河首大磧石山已東。並爲中國之境。後吐蕃強盛。拓拔氏漸爲所逼。遂請內徙。始移部落于慶州。因置靜邊等州以處之。故地陷于吐蕃。其處者爲其役屬。吐蕃謂之弭藥。又有黑黨項。在赤水之西。李靖之西討也。渾主乞伏允奔之。處以空閑之地。及吐谷渾國舉國內屬。其黑黨項首領號敦善王。因貢方物。其雪山黨項。姓破丑氏。居雪山之下。貞觀初。亦常朝貢。又有白狗春桑白蘭等諸羌。自龍朔以後。並爲吐蕃所破。而服屬焉。其在西北邊者。天授三年內附。凡二十萬口。分其地置朝吳浮歸等十州。仍散居靈夏等界內。自至德已後。常爲吐蕃所誘。密以官告授之。使爲偵導。故時或侵叛。尋亦底寧。至

寶應初，其首領來朝，請助國供靈川軍糧，優詔贊美。其在涇隴州界者，至後上元元年，率其衆十餘萬詣鳳翔節度使崔光遠請降。

寶應元年十二月，其歸順州部落、乾封州部落、歸義州部落、順化州部落、和寧州部落、和義州部落、寶善州部落、寧定州部落、羅云州部落、朝鳳州部落，並詣山南西道都防禦使梁州刺史臧希讓請冊印，希讓以聞，詔從之。

貞元三年十二月初，禁商佔以口馬器械于黨項部落貨易。十二年二月，六州黨項自石州奔過河西，黨項有六府部落，曰野利越詩、野利龍兒、野利厥、律兒黃、野海、野宰等，居慶州者，號爲東山部落，居夏州者，號爲夏平部落，永泰大歷以後，居石州依水草，至是，永安城鎮將阿史那思昧擾其部落，求取駝馬無厭，中使又贊成其事，黨項不堪其弊，遂率部落奔過河。

元和元年七月，宰相杜佑上疏曰：伏見近者黨項與西戎潛通，屢有降人指陳事蹟，而公卿廷議以爲宜當謹兵備，戒戎軼，益發甲卒，邀其寇暴，此蓋未達事機，匹夫之常論耳。夫蠻夷猾夏，唐虞已然，周宣中興，獫狁爲害，但命南仲往城朔方，驅之太原，及是而止，誠不欲弊中國，怒遠夷也。秦平六國，恃其兵力，北築長城，以拒匈奴，西逐諸羌，出於塞外，勞力擾人，結怨階亂，中國未靜，賊徒競起，海內雲擾，實生譎戍，漢武因文景之富，命將興師，遂至戶口減半，竟下哀痛之詔，罷田輪臺，前史書之，爲嘉其先迷而後復，蓋聖王

之治天下也。惟務綏靜蒸民。故西至流沙。東漸於海。在南與北。示存聲教。不以遠物爲珍重。求遐方入貢。蓋疲內而事外。終得少而失多。故前代納忠之臣。並有諫君之議。淮南王請息師于閩越。賈捐之願棄地於珠崖。安危利害。高懸前史。昔馮奉世矯漢帝之詔。擊莎車。傳其王首于京師。威振西域。宣帝大悅。議加爵土之賞。蕭望之獨以爲矯制違命。雖有功效。不可爲法。恐後之奉使者。遂爭發兵爲國家生事。述理明白。其言遂行。國家自天后以來。突厥默啜。兵強氣勇。屢寇邊城。爲害頗甚。開元初。邊將郝靈荃親捕斬之。傳首闕下。自以爲功。世莫有二。自望寵爵。宋璟爲相。慮武臣邀功爲國生事。止授以郎將。由是訖開元間。無人復議開邊。中國遂寧。外夷亦靜。此皆成敗可徵。鑒誠非遠。其黨項小蕃。雖處中國。本懷我德。當示撫綏。間者邊將非廉。亟有侵刻。或利其善馬。或取其子女。使賄其方物。徵爲役徒。怨苦旣多。叛亡遂起。或與北狄通使。或與西戎連寇。有爲使然。固當懲革。傳曰。遠人不服。則修文德以來之。管子曰。國家無使勇猛爲邊境。此誠聖哲識微。知著之遠略也。今戎醜方強。邊備未實。誠慎擇良將。誠之完葺。使知誠信。絕其求取。用示懷柔。來則懲禦。去則謹備。自然彼懷我德。革其奸謀。何必遽圖興師。坐致勞費。陛下上聖至仁。覆育羣類。動必師古。謀無不臧。伏望堅保永圖。置兵衽席。實天下幸甚。上深嘉納之。

九年五月。復置宥州。以護黨項。

十五年七月。鹽州送劫烏白池鹽女子。拓拔三娘并婢二人。詔入內詰之。赦罪。送本州。其年十一月。命太

子中允李寮爲宣撫黨項使以部落繁富至今遠近商賈齎雜繒諸貨入其部落買其牛馬至太和開成之際其蕃鎮統領無緒恣其貪恠不顧危亡或強市其羊馬者不時償其直以是部落苦之遂相率爲盜靈鹽之路小梗會昌初上頻命使安撫之兼命憲臣爲使分三印以統之在邠寧鄜延者以侍御史內供奉崔君會統之在鹽夏長澤者以侍御史內供奉李樗主之在靈武麟勝者以侍御史內供奉鄭賀主之仍各賜緋以重其事久而無狀尋皆罷之大中四年內掠邠寧詔鳳翔李業河東李拭討之羌乃破殄





# 唐會要卷九十九

## 東謝蠻

東謝蠻在黔州之西數百里。南接守宮獠。西連夷子。北至白蠻。土宜五穀。無文字。刻木爲契。散在山谷。依樹爲居。無稅賦之事。皆自爲生業。刀劍不離身。男女椎髻。以緋束之。後垂向下。其首領謝元深。世爲酋長。謝氏一族。法不育女。自云高姓。不可下嫁也。

貞觀三年。元深入朝。冠烏熊皮冠。若今之旄頭。以金絡額。身披毛帳。韋皮行膝。而著履。中書侍郎顏師古奏。言昔武王時。天下太平。遠

國歸款。周史其事爲王會篇。今萬國來朝。至如此輩。章服實可圖寫。今請撰爲王會圖。從之。以其地爲應州。拜元深刺史。隸黔州都督府。又有南謝首領謝強。與

西謝蠻連接。共元深俱來朝。拜爲南壽州刺史。後改爲蔣州。

貞元十三年正月。西南蕃大會長。正義大夫。檢校蠻州長史。繼襲蠻州刺史。貴陽郡開國公。賜紫金魚袋。宋鼎。左右大首領。朝散大夫。前檢校邛州刺史。賜紫金魚袋。謝汕。左右大首領。繼襲攝蠻州。巴江縣令。借紫金魚袋。宋萬。傳界首子。弟大首領。朝散大夫。牂州錄事參軍。謝文。經黔中。經略招討觀察使。王礎。奏前件刺史。建中三年。一度朝賀。自後更不許隨例入朝。今年懇訴。稱州接牂牁。同被聲教。獨此排擯。竊自慚恥。謹遣隨牂牁等朝賀。伏乞特賜優諭。兼同牂牁刺史。授官。其牂牁兩州。戶口殷盛。人力強大。鄰側諸蕃。

悉皆敬憚。請比兩州。每年一度朝賀。仍依牂牁輪環差定。并以才幹位望爲衆所推者充。勅旨。宋鼎等已改官訖。餘依奏。

西趙蠻

西趙蠻在東謝之南。其界東至夷子。西至昆明。南至西洱河。山洞深阻。莫知里數。南北十八日行。東西二十三日行。其風俗物產與東謝同。趙氏世爲酋長。有萬餘戶口。貞觀三年。遣使入朝。二十一年。以其地爲明州。以首領趙摩爲刺史。

牂牁蠻

牂牁蠻亦姓謝氏。其地北距兗州。東至辰州。南至交州。西至昆明。土氣鬱熱。稻粟再熟。無徭役。刻木爲契。風俗與東謝同。貞觀二年。首領謝龍羽遣使朝貢。授牂牁州刺史。封夜郎郡公。四年十二月。遣使朝貢。開元十年閏五月。大酋長謝元齊死。詔立其嫡孫嘉藝。襲其官。封至二十五年。其大酋長趙君道來朝。正獻方物。大歷中。每歲遣使朝貢。及貞元初。朝獻不絕。至七年二月。授其酋長趙王俗官。以其歲初朝貢不絕。褒之也。自七年後。至十八年。凡五遣使來朝貢。

元和三年五月。勅自今以後。委黔南觀察使。差本道軍將充押領牂牁昆明等使。至四年正月。又遣使來朝。是月。遣中使魏德和領其使。并齎國信物赴牂牁國。仍降璽書。賜其王焉。七年十二月。遣使朝貢。九年。

復遣使謝注二十人朝貢。十一年正月遣使來朝拜其酋長等官仍賜告身一十六通。遣還十二月又遣使二十五人賀正。召對於三殿仍賜宴及銀器錦綵等。長慶中朝貢不絕。凡外夷使將至遣中使郊驛迎勞。既至恩禮甚厚。將歸亦送之以懷遠人。今悉不書省文也。

寶歷元年十二月遣使謝良震來朝。自太和五年至會昌二年凡七遣使朝貢并賀正。皆寵以宴賜。

### 南平蠻

南平蠻者東與智州南與渝州西南州北涪州接。部落四千餘戶。山有毒草沙蟲及蝮蛇。人並樓居。登梯而上。號爲干欄。其人美髮爲椎髻。土多女少男。爲婚法。女氏必先貨求男族。貧人無以嫁女。多賣與富人爲婢。俗皆婦人執役。其王姓朱氏號爲劍荔王。

貞觀三年遣使內附。以其地隸渝州。

### 南詔蠻

南詔蠻本烏蠻之別種也。姓蒙氏。蠻謂王爲詔。其先有六詔。各有君長。蒙舍龍世長蒙舍州。高宗時細奴邏來朝。開元二十六年封其子皮羅閣越國公。賜名歸義。其後以破西洱蠻功。勅授雲南王。歸義漸強。五詔浸弱。劍南節度使王昱受其賂。送六詔爲南詔。歸義日以驕大。每入覲朝廷亦加禮。天寶七載歸義卒。其子閣羅鳳立。與節度使鮮于仲通不相得。雲南太守張虔陀復私其妻。九載因發兵反。鮮于仲通爲南

詔所敗。自是南詔北臣吐蕃十二載復徵天下兵。俾李宓將之。復敗於太和。寇陷巂州及會同軍。大歷十四年十月。吐蕃率南蠻衆十萬衆來寇。一入茂州。過汶川及灌口。一入扶文。掠方維白壩。一入黎雅。過邛邛。連陷郡邑。乃發禁兵四千人及幽州兵馬五千人同討。大破之。

貞元十年三月。劔南節度使韋皋奏。雲南蠻王異牟尋。領部落兵馬破吐蕃。并收鐵橋以來城壘一十六。擒吐蕃王五人。歸降百姓一十二萬人。約計三萬餘戶。大小城一十六所。勅旨宣付所司。其年七月。詔賜南蠻異牟尋鑄印一用黃金銀爲窠。其文曰。貞元冊南詔印。先是劔南西川節度使韋皋奏。南詔前遣清平官尹仇寬獻所授吐蕃印五。二用黃金。今賜印請以黃金。從蠻夷所重。從之。九月。南詔又使蒙湊羅棟及清平官尹仇寬來獻鐸槩浪人劔及吐蕃印八。蒙湊羅棟異牟尋之弟也。旣朝見於麟德殿。上所賜賚甚厚。其年十月。以南詔朝貢使尹仇寬爲檢校左散騎常侍。其餘授官各有差。至十一年九月。南詔異牟尋獻馬六十四。至十二年。韋皋奏。於雅州會野路招受得投降蠻首領高萬唐等六十九人。蠻約七千戶。二萬口。其萬唐等先授吐蕃金字告身五十片。至十四年十二月。南詔異牟尋遣酋望大將軍王邱等各賀正。兼獻方物。至十九年春正月癸丑朔。上御含元殿。授南詔朝賀使楊鏐龍武試太僕少卿兼御史。授黎州廓清道蠻酋領襲恭化郡王劉志寧復試太常卿。

永貞元年。南詔遣使趙迦寬來赴德宗山陵。

元和二年八月授南詔使者鄧榜傳試殿中監其年十二月復遣使朝賀三年十一月以南詔異牟尋卒廢朝三日辛未以諫議大夫段平仲兼御史中丞持節充冊立南詔及弔祭使仍命鑄元和冊南詔印司封員外郎李逢吉副之至四年正月以太常卿武少儀兼御史中丞充冊立及弔祭使先是諫議大夫段平仲充使朝廷以爲諫官不合離闕因罷平仲使少儀遂有是行冊異牟尋之子驃信宜蒙閣勸爲南詔王七年十二月南詔遣使朝貢十年十一月南詔蠻使楊還奇等二十九人來朝至十三年四月劍南西川節度使奏南詔請貢獻助軍牛羊奴婢等上發詔褒之不令進獻

太和三年宰臣杜元穎鎮守西川以文儒自高不練戎事南蠻乘我無備入寇黎州牧屢陳皆不信之十月黎州陷十一月犯我西川驅劫玉帛子女而去即日鄰境以狀聞上大怒貶元穎爲韶州刺史丁卯又貶爲循州司馬命東州節度使郭釗代焉明年春正月其王蒙嵯顛以表自陳請罪兼疏元穎過失國家方事柔遠尋宥其過自後賦貢不絕

開成四年正月上御龍德殿入對朝賀正南詔酋趙莫三十七人賜官告并金綵銀器金銀帶衣服等有差至五年十二月上御三殿對歸國南詔使等十六人

會昌二年正月三殿對還蕃南詔酋望張元佐等二十五人大中八年二月南蠻遣使進犀牛詔還之咸通十年十一月南蠻驃信綽綽酋龍率衆二萬寇雋州定邊軍節度都頭安再榮守清溪關爲賊所攻

再榮退保大渡河。北去清溪關二百里。隔水相射。凡九日八夜。定邊軍節度使竇滂勒兵拒之。十二月。驃信遣清平官十餘人來僞和。與竇滂語次。蠻軍船筏競渡。忠武武寧兵士結陣抗之。接戰自午及申。蠻軍稍卻。竇滂懼。將自縊於帳中。徐州將苗全緒止之。滂乃宵遁。全緒乃夜入蠻軍。萬弩亂發。蠻衆大駭。全緒等保軍而還。蠻軍乘勝進攻西川。朝廷以顏慶復駐大渡河。制劍南。應接等使宋威將兵數萬。與忠武武寧之軍合勢。戰於漢州之毗橋。大捷。蠻軍走。解西川之圍。

乾符元年十二月。南蠻復寇西蜀。詔河東。河西。山南。西道。東川。徵兵赴援。西川節度使高駢奏。西川新舊軍差已衆。況蠻蝥小醜。必易枝梧。今已道路崎嶇。館驛窮困。更有軍頓。立見流移。其左神策長武鎮。鄜州。河東所抽兵中。人數不少。況備辦軍食。費損尤多。又緣三道藩鎮。盡扼羌戎。邊鄙未寧。望不差發。詔除河東兵士。令竇瀚不要差發外。餘三處兵士。委高駢。到日分布驅使。三年十一月。邕州節度使辛讜奏。南詔遣使段璫寶等四人通和。詔令答使許之。至五年七月。讜遣從事徐雲叟通和。凡水陸四十七程。至善闡府。遇驃信。華言君上也。遊獵。尙去雲南一十六程。叙好而還。進南詔錄三卷。

### 東女國

東女。西羌之別種。以西海中有女國。故稱東女國也。俗以女爲王。東與茂州黨項接界。隔羅女蠻及白狼夷。有八十餘城。王

所居名康延川。中有弱水南流。用牛皮爲船。以渡。戶口四萬。女王號爲賓。就有女官。號曰高霸。評議國事。在外官寮。並男夫爲之。五日一聽政。女王若死。國中多斂錢。動至數萬。更於王族求令女二人而立之。大者爲大王。小者爲小王。若大王死。則小王立。或姑死而婦繼。無有篡奪。其所居皆起重屋。王至九層。國人至六層。其王服青毛綾裙。下領衫。上披青袍。其袖委地。冬則羔裘。飾以紋錦。爲小環髻。飾之以金。耳垂璫。足履鞮。輶。俗重婦人而輕丈夫。文字同於天竺。以十一月爲正。每至十月。令巫者齋酒。殺詣山中。散糟麥於空。大咒呼鳥。俄頃。有鳥如雉。飛入巫者懷中。因刳其腹視之。有一穀。來歲必登。若有霜雪。必多異災。其俗信之名爲鳥卜。武德中。女王湯滂氏遣使貢方物。

永徽七年正月。其國遣女使高霸黎文。并其主男三盧等來朝。

垂拱五年。其王斂臂遣大臣湯翹左來朝。仍請官號。則天拜斂臂爲左玉鈐衛員外將軍。仍以瑞錦製蕃服賜之。

天授三年。其主俄衍兒爾來朝。萬歲通天元年。又遣使來朝。

開元二十九年十二月。其王趙曳夫遣子獻方物。

天寶元年五月。命有司宴之於曲江。令宰臣以下同宴。又封曳夫爲歸昌王。授左金吾衛大將軍。賜其子帛八十四。放還。後復以男子爲王。



貞元九年。其王湯立悉。與哥鄰國王董臥庭。白狗國王羅陀。忽逋租國王弟鄧吉知。南水王國王姪薛尙。悉曩。弱水國董辟和。悉董國王湯悉贊。清遠國王蘇唐磨。咄霸國王董藐蓬。各率其種落。詣劍南四川內。附其哥鄰等國。皆散居西山。弱水王卽國初女國之弱水部落。其悉董國在弱水之西。故亦謂之弱水西。悉董王舊皆分隸邊郡。祖父例授將軍中郎果毅等官。自中原多故。皆爲吐蕃所役屬。其部落大者不過二三千。各置縣令十數人理之。土有絲絮。歲輸於吐蕃。至是立悉與之同盟。相率獻款。兼齎天寶中國家所賜封告。共三十九通以進。節度使韋皋處其衆於維霸保等州。給以種糧耕牛。咸樂生業。立悉等數國王自來朝。召見於麟德殿。授立悉銀青光祿大夫。歸化州刺史。鄧吉知試大府少卿。兼丹州長史。薛尙悉曩。試少府少監。兼霸州長史。董臥庭行至緜州卒。贈武德州刺史。命其子利羅爲保寧都督府長史。龔哥鄰國王立悉妹乞悉漫。頗有才智。從其兄來朝。封和義郡夫人。其大首領董臥卿等。皆授以官。俄又授女國王兄湯厥。銀青光祿大夫。試大府卿。清遠王弟蘇歷顛。銀青光祿大夫。試衛尉卿。南水國王薛莫庭。及湯悉贊。董藐蓬。女國唱後湯佛庭。美玉鉢。南郎唐。並授銀青光祿大夫。試太僕卿。其年。西山松州生羌等二萬餘戶。相率內附。其黏信部落主董夢葱。龍諾部落主董辟忽。皆授試衛尉卿。立悉等並赴明年元會。詔賜以金帛。各遣還。八月。詔加韋皋統押近界諸蠻及西山八國使。其部落至今猶代襲刺史等官。然亦潛通吐蕃。故謂之兩面羌。

## 婆利國

婆利者南荒之國也。在林邑東南。海行可萬里。地延袤數千里。暑熱恆如中國盛夏時。穀一歲再熟。王姓利利邪伽。名護路那婆。世有其位。人皆黑色。穿耳附璫。其王服花冠。飾以真珠瓔珞。身坐金牀。行則駕象。鳴鼓吹蠡。

貞觀四年四月。使至婆利界。有羅刹國。其人極陋。朱髮黑身。獸牙鷹爪。時與林邑人作市。市以夜而自掩其面。其國出火珠。狀如水晶。日正午時。以珠承影。取艾承之。卽火出。其年林邑國來獻。云羅刹得之。或云出獅子國。國在西南海中。有稜伽山。出奇寶。人到初無所見。但署寶物價值。賣於洲上商舶。依價貨之而去。其國以能馴養獅子。故以爲國名。

## 倭國

古倭奴國也。在新羅東南。居大海之中。世與中國通。其王姓阿每氏。設官十二等。俗有文字。敬佛法。椎髻無冠帶。隋煬帝賜之衣冠。今以錦綵爲冠飾。衣服之制。頗類新羅。腰佩金花。長八寸。左右各數枚。以明貴賤等級。

貞觀十五年十一月。使至。太宗矜其路遠。遣高表仁持節撫之。表仁浮海。數月方至。

自云路經地獄之門。親見其上氣色蒼鬱。又聞呼叫

鑿鍛之聲。甚可畏懼也。

表仁無綏遠之才。與王爭禮。不宣朝命而還。由是復絕。

永徽五年十二月遣使獻琥珀瑪瑙。琥珀大如斗。瑪瑙大如五升器。高宗降書慰撫之。仍云。王國與新羅接近。新羅素爲高麗百濟所侵。若有危急。王宜遣兵救之。倭國東海嶼中野人有耶古波耶多尼三國。皆附庸於倭。北限大海。西北接百濟。正北抵新羅。南與越州相接。頗有絲繇。出瑪瑙。有黃白二色。其琥珀好者。云海中湧出。

咸享元年三月遣使賀平高麗。爾後繼來朝貢。則天時。自言其國近日所出。故號日本國。蓋惡其名不雅而改之。

大歷十二年遣大使朝楫寧副使總達來朝貢。

開成四年正月遣使薛原朝常嗣等來朝貢。

### 大羊同國

大羊同。東接吐蕃。西接小羊同。北直于闐。東西千里。勝兵八九萬。辮髮氍裘。畜牧爲業。地多風雪。冰厚丈餘。物產與吐蕃同。無文字。但刻木結繩而已。酋豪死。抉去其腦。實以珠玉。剖其五臟。易以黃金鼻銀齒。以人爲殉。卜以吉辰。藏諸巖穴。他人莫知其所。多殺犍牛羊馬以充祭。其王姓姜葛。有四大臣。分掌國事。自古未通中國。

貞觀五年十二月朝貢使至。十五年聞中國威儀之盛。乃遣使朝貢。太宗嘉其遠來。以禮答慰焉。至貞觀

末爲吐蕃所滅。分其部衆散至隙地。

### 烏羅渾國

烏羅渾。蓋後魏烏洛侯也。今亦謂之烏羅護。東與靺鞨。南與契丹。北與烏丸爲鄰。風土與靺鞨同。貞觀六年。朝貢使至。

### 女國

女國。在葱嶺之西。以女爲王。每居層樓。侍女數百。五日一聽政。其王若死。無女嗣位。國人乃調斂金錢。還於死王之族。買女而立之。其俗貴女子。賤丈夫。婦人爲吏。男子爲軍士。女子貴者。則多有侍男。男子貴。不得有侍女。雖賤庶之女。盡爲家長。猶有數夫焉。生子皆從母姓。男子披髮。以青綠塗面。婦人辮髮而縈之。土宜六畜。多駿馬。

貞觀八年十二月。朝貢使至。

### 石國

石國。其俗善戰。多良馬。西北去瓜州六千里。

貞觀八年十二月。朝貢使至。

顯慶三年。以其地噉羯城爲大宛都督府。仍以其王職土屯攝舍提于屈昭穆爲都督。

開元初。其蕃王莫賀咄吐屯有功。封爲石國王。加特進。尋又册爲順義王。二十九年。其王伊吐屯屈勒遣使上表曰。奴自千代以來。於國忠赤。祇如突厥騎施可汗忠赤之中。部落安貼。後背天可汗。腳底大起。今突厥已屬天可汗。在於西頭爲患。惟有大食。莫踰突厥。伏乞天恩。不棄突厥部落。討得大食。諸國自然安貼。

天寶初。累遣朝貢。至五年。封其王子那俱車鼻施爲懷化王。并賜鐵券九載。安西節度使高仙芝奏。其王蕃禮有虧。請討之。其王約降。仙芝使部送去開遠門數十里。負約。以王爲俘。獻於闕下。斬之。自後西域皆怨仙芝所擒王之。子西走大食。引其兵至怛羅斯城。仙芝軍大爲所敗。自是西附於大食。至寶歷二年。及大歷七年。並遣使朝貢。

### 吐火羅國

吐火羅。在葱嶺之西數百里。與挹怛雜居。勝兵五萬。其國土著多男子。少婦人。故兄弟通室。婦人五夫。則首戴五角。十夫則首戴十角。男子無兄弟。則與他人結爲昆季。方始得妻。不然則終身無婦矣。被服文字。與于闐略同。其城北有頗黎山。南巖穴中。有神馬。國人每牧馬於其側。產名駒汗血馬。北界接西域大宛之地。

貞觀九年五月。朝貢使至。

永徽元年。獻大鳥。高七尺。其色元足如駝。鼓翅而行。日三百里。能噉鐵。夷俗謂之駝鳥。三年。其葉護那史烏涇波奉表告立。高宗遣置州縣使王名遠到其國。以所理阿緩大城爲月氏都督府。仍分其小城爲二十四州。以烏涇波爲都督。五年。烏涇波遣子伊室達官弩以朝獻。龍朔元年。授烏涇波使持節月氏等二十五州諸軍事。月氏都督。麟德二年。遣其弟祖紇多獻瑪瑙燈樹兩具。高三尺餘。

開元七年。其葉護支汗那帝賒上表。獻解支之人幕閭。請加試驗。八年。獻名馬驪及異藥。至十二年。遣使獻胡藥。乾陀婆羅等二百餘品。十七年。冊其首領骨咄祿頓達度爲葉護。其年。葉護遣使獻須那伽帝釋麥。十八年。遣使獻紅頗梨。碧頗梨。生馬腦。金精。及質汗等藥。

天寶八載。其葉護失理忙伽羅遣上表曰。臣鄰境有一胡。號曰羯師。居在深山。恃其險遠。違背聖化。親附吐蕃。於國內置吐蕃城。投勃律要路。與吐蕃擬將兵入境。臣每憂懼。思破兇徒。望請安西兵馬來載。五月到小勃律。六月到大勃律。伏乞允臣所奏。事若不成。請斬臣七段。緣失蜜王向漢忠赤。特望勅書宣慰。使其感恩。元宗覽表。許之。十二年。又遣使朝貢。

乾元元年七月。與西域九國遣兵助國討逆。肅宗令赴朔方行營。

### 曇陵國

曇陵吐火羅之屬國也。居大洲中。其風俗土宜。與吐火羅國同。  
貞觀十六年遣使朝貢。

康國

康國本康居之苗裔也。其王本姓溫氏。其人士著。役屬於突厥。先居祁連之北昭武城。爲匈奴所破。南依葱嶺。遂有其地。支庶強盛。分王鄰國。皆以昭武爲姓氏。不忘本也。俗多蒲萄酒。勝兵三千人。深目高鼻。多鬚髯。生子必以蜜食口中。以膠置手內。欲其成長。口嘗甘言。持錢如膠之粘物。習善商賈。爭分銖之利。男子二十。卽送之他國。來過中夏。利之所在。無所不至。以十二月爲歲首。有婆羅門爲其占星候氣。以定吉凶。至十月。鼓舞乞寒。以水相潑。盛爲戲樂。

武德七年。其王屈朮支遣使獻名馬。

貞觀九年七月。獻獅子。太宗嘉其遠來。使秘書監虞世南爲之賦。十一月。又獻金桃銀桃。詔令植於苑囿。永徽中。其國頻遣使告爲大食所攻。兼徵賦稅。

顯慶三年。高宗遣果毅董寄生列其所居城爲康居都督府。仍以其王拂呼縵爲都督。

萬歲通天元年。則天封其大首領篤婆鉢提爲王。鉢提尋卒。又冊立其子泥涅師師。神龍中。泥涅師師卒。又冊立其子突昏。

開元初。屢遣使獻鑱子甲。水晶椽。及越諾侏儒人。胡旋女子。兼狗豹之類。十九年。其王烏勒伽表請封其子咄曷爲曹國王。默啜爲米國王。許之。二十七年。烏勒卒。遣使册咄曷襲其父位。天寶三載。又封爲欽化王。其母可敦封爲郡夫人。十一載。十三載。並遣使朝貢。

### 盤盤國

盤盤國在林邑西南海曲中。北與林邑隔小海。自交州船行四十日。乃至。其國與狼牙脩國爲鄰。習俗與扶南略同。以路遠不與中國通。梁大同時。來朝貢。

貞觀九年。朝貢使至。

### 朱俱波國

朱俱波在葱嶺之北二百里。勝兵三千人。其俗崇飾佛法。文字同於婆羅門。西與渴盤陀爲鄰。去瓜州三千八百里。

貞觀十一年十二月。朝貢使至。

### 甘棠國

甘棠在大海之南。崑崙人也。

貞觀十年。與朱俱波國朝貢同日至。太宗謂羣臣曰。南荒西域。自遠而至。其故何哉。房元齡曰。當中國又



安帝德遐被也。太宗曰：誠如公言，向使中國不安，何緣而至？朕何以堪之？觀此蕃使，益懷畏懼，所望公等匡朕不逮也。

### 罽賓國

罽賓在葱嶺之南，其地川瀆，水皆南流，注於南海。人皆乘象，土宜種稻，多甘蔗、葡萄，草木凌寒不死，尤信佛法。南去舍衛國三千五百里，罕通上國。聞中夏有聖君，故遣使來朝。

貞觀十一年，遣使至上，謂長孫無忌曰：朕卽位之初，有上書者，或言人主必須威權獨運，不得委羣下，或欲耀兵振武，懾服四夷，惟魏徵勸朕偃武興文，布德施惠，中國旣安，遠人自服。朕從其語，天下大寧，絕域君長皆來朝貢。九夷重譯，相望於道，此皆魏徵之力也。朕之任用，豈不得人？二十二年，其國遣使獻俱物頭花，丹白相間，其香遠聞。

永徽二年，獻耨特鼠，喙尖尾赤，能食蛇，螫者以尿塗瘡卽愈。

顯慶三年，訪其國俗，云王始祖馨孽，今王曰曷撝支，父子傳位已十二代。其年，列其城爲修鮮都督府。龍朔初，授其王修鮮等十一州諸軍事，兼修鮮都督。

開元七年，遣使獻天文大經及秘方奇藥。八年，詔遣册其王爲葛羅支特勒。二十七年，其王烏散特勒灑以年老，上表請以嫡子拂菻闌婆嗣位，許之，仍降使册命。

天寶四載。又册其子勃荷準爲襲罽賓及烏菴國王。仍授右驍衛將軍。乾元元年。又遣使朝貢。

### 流鬼國

流鬼。去京師一萬五千里。直黑水靺鞨東北。少海之北。三面阻海。多沮澤。有魚鹽之利。地氣早寒。每堅冰之後。以木廣六寸。長七尺。施系於其上。以踐層冰。逐其奔獸。俗多狗。以其皮毛爲裘褐。勝兵萬人。南與莫曳靺鞨鄰接。未嘗通聘中國。

貞觀十四年。其王更三譯而來朝貢。授騎都尉。

### 史國

史國。居近獨莫水北。與康國同城。中有神祠。每祭牛羊口。自隋以來。國漸強盛。乃創置乞史城。都邑二萬餘家。

貞觀十六年正月。朝貢使至。

顯慶三年。遣果毅董寄生。列其所治爲陞沙州。以其王昭武失阿曷爲刺史。

開元十五年。其王阿忽必多延屯。遣使獻胡旋女子及豹。二十七年。其延屯卒。册立其子阿忽鉢爲王。二十九年。其王斯謹提立首領勃帝。未施朝貢。天寶中。詔使其國爲來威國。其那色波國亦謂之小史國。爲

史國役屬。

拂菻國

拂菻一名大秦國。在西海之北。東南與波斯接。地方萬里。列城四百。邑居連屬。其宮室柱椳。多以水晶琉璃爲之。有貴臣十二人。共治國政。常使一人將囊隨王車。百姓有事者。卽以事投囊中。王至宮省。發理其枉直。其王無常人。簡賢者立之。國有災異及風雨不時。卽廢之。有鳥似鶴。其色綠色。常在王邊。倚枕上坐。每進食有毒。其鳥輒鳴。戶十萬餘。南臨大海。城東面有一大門。高二丈。自外至王室。飾以黃金。凡有大門三重。第二大門之樓。懸一金杵。以金丸十二枚。屬於衡端。以候日之十二時焉。爲一金人。其大如人。立於側。每至一時。其金丸輒落。鏗然發聲。金人卽應聲引唱。以紀日時。毫釐無差。其殿以瑟瑟爲柱。黃金爲地。象牙爲門扇。香木爲棟梁。無瓦。以白石末塗屋上。光潤如玉石。至盛夏之時。引水潛流。上徧屋宇。機制巧密。人莫之知。觀者惟聞屋上鳴泉。俄見四簷飛溜。懸汲如瀑。激氣成涼風。其巧如此。有羊羔生於土中。其國人候其欲萌。乃築牆以護之。防外獸所食。然其臍與地連。割之則死。惟人著甲走馬。及擊鼓以駭之。其羔驚鳴而臍絕。便逐水草。諸珍寶多出其國。隋煬帝常欲通之。竟不能致。

貞觀十七年。其王波多力遣使獻赤玻璃石。綠金精等物。太宗降璽書答慰。自大食強盛。漸陵諸國。遣將伐其都。乃歲輸金帛。臣屬大食焉。

乾封元年遣使獻底也伽大足元年復遣使朝貢

開元十年正月遣吐火羅大首領獻獅子二羚羊二四月又遣大德僧來朝

### 烏菴國

烏菴國在中天竺南一名烏枝那地方千餘里百姓殷實人性懦弱頗詭詐尤工禁呪之術篤信佛法與天竺同而天竺不及之自古未通中國焉

貞觀十六年十一月朝獻使至

開元八年四月遣使册立其王時大食東與烏菴鄰境煽誘爲虐其王與骨咄王俱位王皆守節不應亦潛輸款誠元宗深美之故並降册名

### 耨陀洹國

墮和羅西北其王姓察失利名婆那子婆末其國海行五月至廣州土無蠶桑以白氎朝霞布爲衣穀有稻麥俗皆樓居謂之干欄父母死停喪在室輒數日不食燔屍之後男女並剔髮臨池先浴然後進食貞觀十八年遣使來朝貢又獻婆律膏白鸚鵡首有十紅毛齊於翅



# 唐會要卷一百

## 悉匿國

悉匿北接石國。其俗不好商賈。風俗與康國略同。

貞觀二十年三月。使至朝貢。與似沒役槃國。康國同鄰。出好馬。

## 悉立國

悉立在吐蕃西南。戶五萬。勝兵五千人。其地有城邑村落。咸依溪澗。男夫以繒綵纏頭。衣氍。婦人辮髮。著短裙。婚姻簡略。不行財禮。以蒸報爲俗。多水牛。宜秔稻。喪制以黑爲衣。一年就吉。羈事吐蕃。自古未通中國。

貞觀二十年閏三月。朝貢使至。

## 求拔國

求拔。或云章揭拔。本西羌種也。在悉立西南。居四山之內。近西移出山。西接東天竺。遂改衣服。變西羌之習。因而附焉。勝兵二千。無城郭。好爲寇掠。商旅患之。

貞觀二十五年。因悉立而朝貢使至。

俱蘭國

前亦名俱羅弩國。與吐火羅接。南底雪山。地險窄。物產惟出金精。

貞觀二十年閏三月。朝貢使至。

骨利幹國

骨利幹處北方瀚海之北。二俟斤同居。勝兵四千五百。口萬餘人。草多百合。地出名馬。其國北接冰海。晝長夕短。日沒後。天色正曠。煮一羊胛。纔熟。而東方已曙。蓋近日出之所也。貞觀二十一年正月內附。

訶陵國

訶陵在真臘之南海中洲。王之所居。堅木爲城。造大屋重閣。以象爲牀。以椰花椰子爲酒。飲之亦醉。有毒女。與常人居。止宿處。卽令身上生瘡。與之交會卽死。若旋液霑著草木卽枯。

貞觀二十二年。朝貢使至。

元和八年。遣使獻僧祇僮及五色鸚鵡。頻伽鳥。并異香。

十三年十一月。獻僧祇女二人。及玳瑁璫生犀等。

婆登國

婆登在林邑之南。海行二月。東與訶陵。西與迷黎連接。北鄰大海。風俗與訶陵國同。種穀每月一熟。亦有

文字書之于貝多葉。其死者口實以金。又以金釧貫于四肢。然後加以婆律膏及沈檀龍腦等香積薪以燔之。

貞觀二十一年六月。朝獻使至。

### 波斯國

波斯在京師西一萬五千里。東與吐火羅康國接。北鄰突厥之可薩部。西北距菲林。西南濱海。戶數十萬。其王初嗣位。便密選諸子。才堪承統者。書其名字。封而藏之。王死後。大臣與王之羣子。共發封而視之。奉所書名爲王焉。俗事天地水火諸神。西域諸胡事火祆者。皆詣波斯受法焉。其事神以麝香和蘇。塗鬚點額。及於耳鼻。用以爲敬。以六月一日爲歲首。繫囚無年限。惟王代立則釋之。地多名馬。駿者日行七百里。又多駿犬。今所謂波斯犬也。出驪及大驢。

貞觀二十一年。其王伊嗣候遣使朝貢。

龍朔元年。其國王卑路斯使奏。頻被大食侵擾。請兵救援之。詔遣隴州南由令王名遠充使西域。分置州縣。因列其地。疾陵城爲波斯都督府。授卑路斯爲都督。是後。數遣使貢獻焉。咸亨中。卑路斯自來朝貢。高宗甚加恩賜。拜右武衛將軍。

儀鳳三年。令吏部侍郎裴行儉將兵。冊送卑路斯還波斯國。行儉以路遠。至安西碎葉而還。卑路斯獨返。



不得入其國。漸爲大食所侵。客於吐火羅二十餘年。部落數千人。後漸離散。至景龍二年來朝。拜爲左威將軍。無何病卒。其國遂滅。西部衆猶存。自開元十年至天寶六載。凡十遣使朝貢。獻方物。夏四月。遣使獻瑪瑙牀。九載。獻火毛繡舞筵。長毛繡舞筵。無孔真珠。至大歷六年九月。遣使獻真珠等。

### 都播國

都播。鐵勒之別種也。其地北瀕小海。西暨昆。南迴紇。十三月行。前代未之通也。分爲三部。皆自統攝。其俗無歲時。結草爲廬。無牛羊。不知耕種。土多百合。取其根以爲糲。捕魚鳥食之。衣貂鹿之皮。貧者亦緝鳥羽爲服。婚姻富者用馬。貧者用鹿皮爲聘禮。國無刑罰。偷盜者徵其賦。聞骨利幹來通。亦遣使朝貢。貞觀二十一年十一月。朝貢使至。

### 結骨國

結骨在迴紇西北三千里。勝兵八萬。口數十萬。南阻貪漫山。有水從迴紇北流。踰山經其國。人並依水而居。身悉長大。皙面綠睛。朱髮。有黑髮以爲不祥。人皆勁勇。鄰國憚之。其大與突厥同。而婚姻無財聘。性多淫佚。與外人通者不忌。其壻死喪。刀斲其面。火葬收其骨。踰年而葬。以木爲室。覆以木皮。天每雨鐵。收而用之。以爲刀劍。甚銛利。若獵獸。皆乘木馬。升降山磴。追赴若飛。其北有驢馬國。鄰北海。畜驢馬而不乘。但取其酪充飧而已。貌類結骨。而不敦鄰好。交相侵伐。貞觀六年。遣王義宏將命鎮撫。二十二年。結骨國君

長遂身自入朝云。臣已一心歸國。望得國家官職。執笏而還。遂授左屯衛大將軍。堅昆都督。開元中。安西都護蓋嘉運撰西域記云。堅昆國人皆赤髮綠睛。其有黑髮黑睛者。則李陵之後。故其人稱是都尉苗裔。亦有由然。今有改稱紇圻斯者。亦是北夷舊號。臣按國史。敍鐵勒種類云。伊吾以西焉耆以北。旁白山則有契弊。烏護。紇骨子。其契弊卽契苾也。烏護則烏紇也。後爲迴鶻。其紇骨卽紇圻斯也。由是而言。蓋鐵勒之種。嘗以稱迴鶻矣。其轉爲黠戛斯者。蓋夷音有緩急。卽傳譯語不同。其或稱戛戛斯者。語急而然耳。訪於譯史云。黠戛是黃頭赤面義。蓋迴鶻呼之如此。今使者稱自有此名。未知孰是。

會昌三年。其國遣使注吾合索<sup>上聲呼之</sup>等七人來朝。兼獻馬二匹。以其久不修貢。且莫詳更改之名。中旨訪

求。唯賈耽所撰四夷述。具載黠戛斯之號。然後知耽之通習荒情。洽而不誤。先是。迴鶻背恩德。侵劫諸部落。又擅入靈州。以爲天亡不可容也。乃命河東等道遣兵討之。正月。命河東兵大破迴鶻於殺胡山。就帳中奉太和公主歸於我軍。可汗亦與數十騎踰山遁走。黠戛斯乘其破亡。遂有其國。二月。遣使注吾合索等七人來朝。并獻名馬。且憑大唐威德。求册命焉。四年。上命太僕卿兼御史中丞趙蕃持節宣慰。五年五月。勅我國家光宅四海。君臨八荒。聲教所覃。册命咸被。況乎族稱宗姓。地接封疆。爰申建立之恩。用廣懷來之道。有加常典。得不敬承。黠戛斯國王生窮陰之鄉。稟沍朔之氣。少卿之後。胄裔且異於蕃夷。大漠之中。英傑自雄於種落。日者居於絕徼。隔以強鄰。空馳向化之心。莫通事大之禮。旋能奮其武勇。清彼朔陲。

萬里歸誠。重譯而至。時既當於無外。義必在於固存。是用特降徽章。載明深懇。加其美號。錫以冊書。貽厥後昆。遂荒有北。舉茲盛典。彰示遠戎。祇服寵光。永孚恩化。可冊爲宗英雄武誠明可汗。命右散騎常侍兼御史中丞李棣持節充冊使。仍命有司擇日備禮冊命。六年九月勅去歲先帝冊立黠戛斯爲可汗。雖有成命。旋屬朝廷變故。未果遵行。今欲遣使。且展封告之儀。續行先帝之意。又慮深僻小國。不足與之抗衡。迴鶻向殘。不合遽有建置。事新體大。須歸至當。必詢於衆。方免有疑。宜令中書門下五品以上。御史臺尙書省四品以上。集議聞奏。大中元年。遂命鴻臚卿御史中丞李業持節再冊命焉。

天竺國

天竺。卽漢之身毒。或云摩伽佗。或云婆羅門。地在葱嶺之南。去月氏東南數千里。地方三萬餘里。其中分爲五。南天竺。南際大海。北天竺。北距雪山。四周有山爲壁。南面一谷。通爲國門。東天竺。東際大海。與扶南連。但隔小海而已。西天竺。與罽賓波斯相接。中天竺。據四天竺之間。國並有王。而俱以天竺爲名。隋煬帝志通西域。諸國多至。惟天竺不通。武德中國大亂。王尸羅逸多勒兵。象不解鞍。士不釋甲。六載而四天竺之君。皆北面以臣之。貞觀初年。中國沙門元奘至其中國。天竺王尸羅逸多謂元奘曰。吾聞中國有聖王出。作秦王。破陣樂。試爲我說。秦王之爲人也。元奘具言聖德。王曰。信如所言。我當自朝也。至十五年。自稱摩伽佗王。遣使朝貢。上乃遣雲騎尉梁懷璚往通其國。尸羅逸多驚問諸國人曰。自古亦有摩訶震旦使。

人至吾國乎。皆曰：未之有也。乃遣使隨懷璫來朝。至二十二年四月，遣使右衛長史王元策奉使天竺國。至尸羅逸多，死。其國大亂，發兵拒之。元策禦戰不敵，挺身宵遁。至吐蕃，發精銳千二百人，并泥婆羅國兵七千騎。元策與副使蔣師仁率二國兵大破之，虜其王以歸。太宗大悅，謂侍臣曰：夫人耳目玩於聲色，口鼻耽於臭味，此敗德之源。若天竺不刦我使人，豈爲俘虜耶？昔中山以貪寶取敵，蜀侯以金牛致滅，莫不由之。

是時就其國得方士那邏邇婆娑寐，自言年二百，云有長生之術。上深禮之，館於金廳門內，造延年藥，令兵部尙書崔敦禮監主之，使天下采諸奇藥異石，延歷歲月，藥成服之，無效，後放還本國。

天授三年，東天竺王摩羅枝摩西天竺王尸羅逸多南天竺王遮邏婆北天竺王婁其那那中天竺王地婆西那並來朝貢，及中宗睿宗兩朝並獻方物。

開元三年二月，遣使瞿雲惠成來朝。八年五月，南天竺遣使獻豹皮、五色能言鸚鵡。又奏請以戰象、兵馬、討大食、吐蕃，求有以名其軍，制書嘉焉。號爲懷德軍。九月，南天竺王尸利那羅僧伽寶多枝摩爲國造寺，上表乞寺額，勅以歸化爲名。賜十一月，遣使册利那羅僧伽寶多爲南天竺王。遣使來朝。十七年六月，北天竺國王三藏沙門僧密多獻質汗等藥。十九年十月，中天竺國王伊沙伏摩遣大德僧來獻方物。二十年三月，中天竺國王李承恩來朝，授遊擊將軍，放還。天寶中，累遣使朝貢。

### 葛邏祿國

葛邏祿，本突厥之族也。在北庭之北，金山之西，與車鼻部落相接。薛延陀破滅之後，車鼻人衆漸盛，葛邏

祿率其下以歸之。及高侃之經略車鼻也。葛邏祿相繼來降。仍發兵助討。後車鼻破滅。葛邏祿謀刺婆。踏實力三部落。並詣闕朝見。顯慶二年。置陰山大漠元池三都督府。以其首領爲都督。三族當東西兩突厥之間。常視其興衰。附叛不常。後稍南徙。自號三姓。兵彊勇於鬪。延州以西。突厥皆畏之。開元初。與迴鶻拔悉密等攻殺突騎施烏蘇米施可汗。三年。與拔悉密可汗同奉表。兼獻馬。至闕下。其年冬。又與迴鶻同擊破拔悉密部落。其可汗阿史那施奔北庭。後朝於京師。十三年。授阿史那施左武衛將軍。乾元中。率拔悉密可汗南奔。後。葛祿與九姓部落復立迴鶻。瞰葉護爲可汗。朝廷尋遣使封爲奉義王。仍號懷仁可汗。自此後。葛祿在烏德犍山左右者。別置一部。督隸屬九姓迴鶻。其在金山及北庭管內者。別立葉護。每歲朝貢。十一年。葉護頓毗伽生擒突厥帥阿布思。送於闕庭。授開府儀同三司。改封金山郡王。至德後。部衆漸盛。與迴鶻爲敵國。仍移居十姓可汗之故地。今碎葉。怛邏斯諸城。盡爲所踞。然阻迴鶻。近歲朝貢。不能自通。

### 泥婆羅國

泥婆羅。在吐蕃之西。樂陵川。土多赤銅。其俗剪髮與眉齊。穿耳。植以竹筩。緩至肩者。以爲妙麗。食用手。其器皆銅。多商賈。少田作。鑄銅爲錢。面文爲人。背文爲馬。牛不穿孔。衣服以一幅布蔽身。數日一盥浴。以板爲屋壁。皆雕畫。俗重博戲。頗解推測。益虛。皆通歷術。祀天神。鐫石爲像。每日清水浴神。烹羊而祭。其王那

陵提婆。身著珍珠諸寶垂纓。耳金鉤玉鐙。佩服莊嚴。坐師子牀內。管散花燃香。大臣皆坐地不藉。左右持兵數百人列侍。宮中有七重樓。覆以銅瓦。楹拱皆飾以珠寶。四隅置銅槽。下有金龍。口激水仰注槽中。初提婆之父爲其叔所殺。提婆出奔吐蕃。納之。遂臣吐蕃。貞觀中。使者李義使天竺。道其國。提婆大喜。延使者觀阿耨婆彌池。池週迴二十餘丈。以物投之。則生烟焰。懸釜而炊。須臾可熟。二十一年。遣使獻波稜菜。渾提葱。

永徽二年。其王尸利那連陀羅遣使朝貢。

### 大食國

大食本在波斯之西。大業中有波斯胡糾合亡命。渡恆曷水。劫奪商旅。其衆漸盛。遂割據波斯西境。自立爲王。其王姓大食氏。名噉密莫末尼。自云有國已三十四年。歷三主矣。其國男兒黑而多鬚。鼻大而長。女子白皙。行必障面。文字旁行。日五拜天神。不飲酒。舉樂有禮堂。容數百人。率七日王高坐爲下說法。曰。死敵者生天上。殺敵致福。故俗勇於戰鬥。土多沙石。不堪耕種。唯食駝馬。不食豕肉。西隣大海。常遣人乘船。將衣糧入海。經八年而未極西岸。海中有一方石。上有樹幹。赤葉青上。總生小兒。長六寸。見人皆笑。動其手脚。既著樹枝。若使摘取一枝。小兒便死。

永徽二年八月。大食遣朝貢。至龍朔中。擊破波斯。又破拂菻。始有麩米之屬。又南侵婆羅門。吞諸國。併勝

兵四十餘萬。開元初，遣使來朝，進良馬寶鈿帶。其使謁見，平立不拜。云本國惟拜天神，雖見王亦不拜。所司屢詰責之。其使遂依漢法致拜。其時康國石國皆臣屬。十三年，遣使蘇梨滿等十三人獻方物，授果毅。賜緋袍銀帶，遣還。其境東西萬里，東與突騎施相接焉。又案賈耽四夷述云：隋開皇中，大食族中有孤列種，代爲酋長，孤列種中又有兩姓，一號盆尼夷深，一號盤泥末換。其奚深，後有摩訶末者，勇健多智，衆立之爲王。東西征伐，開地三千里，兼剋夏獵，一名鈇。音所城摩訶末後十四代，至末換，末換殺其兄伊疾而自立。復殘忍，其下怨之。有呼羅珊末纛人並波悉林舉義兵，應者悉令著皂衣。旬日間，衆盛數萬，鼓行而西，生擒末換，殺之。遂求得夷深種，阿蒲羅拔立之。自後末換以前，種人謂之白衣大食。自阿蒲羅拔以後，改爲黑衣大食。阿蒲羅拔卒，立其弟阿蒲恭拂。至德初，遣使朝貢。代宗之爲元帥，亦用其國兵以收兩都。寶應初，其使又至，恭拂卒，子迷地立。迷地卒，子牟栖立。牟栖卒，弟訶論立。貞元二年，與吐蕃爲勁敵。蕃兵大半西禦大食，故鮮爲邊患。其力不足也。至十四年丁卯九月，以黑衣大食使含嗟焉雞沙北三人並爲中郎將，放還蕃。

火辭彌國

火辭彌與波斯接，風俗亦與波斯同。

貞觀十八年三月，遣使貢方物，與摩羅遊使者偕來。

## 駁馬國

駁馬其地近北海。在突厥北。去京師一萬四千里。經突厥大部落五所。乃至勝兵三萬。馬萬匹。地寒。至冬積雪。樹木不沒者一二尺。至雪消。逐陽坡。以馬耕種五穀。馬色並駁。故以爲國號。其使云。去鬼國六十日。行。其國人夜遊晝隱。眼鼻耳與中國人同。口在頂上。土無米粟。噉鹿與蛇。

永徽二年十一月。朝貢使至。

## 金利毗迦國

金利毗迦。在京師西南四萬餘里。行經日巨國。訶陵國。摩訶國。新國。多薩國。者埋國。婆婁國。多郎婆黃國。摩羅遊國。真臘國。林邑國。乃至廣州。東去至物國二千里。西去赤土國一千五百里。南距婆庭舍。衣朝霞白氈。每食先泥。上鋪席而後坐。其國王名本多陽牙。前有隊仗甲盔。甲用貝多樹皮。風俗物產。與真臘國同。

## 多摩婁國

多摩婁居於南海島中。使云。其王先祖骨利龍之子。利常得一鳥卵。剖之。得一女子。容色殊妙。因以爲妻。今尸羅劬備卽其後也。

顯慶四年二月。朝貢使至。



蝦夷國

蝦夷海島中小國也。其使鬚至長四尺，尤善弓矢，插箭於首，令人戴弧而立，數十步射之，無不中者。顯慶四年十月，隨倭國使至入朝。

哥羅舍分國

哥羅舍分在南海之南，接墮和羅國。其國王名蒲越摩伽，精兵二萬人。其使以顯慶五年發本國，至龍朔二年五月到京。

日本國

日本倭國之別種，以其國在日邊，故以日本國爲名。或以倭國自惡其名不雅，改爲日本。或云日本舊小國，吞併倭國之地，其人入朝者，多自矜大，不以實對，故中國疑焉。

長安三年，遣其大臣朝臣真人來朝，貢方物。朝臣真人者，猶中國戶部尙書冠進德冠，其項爲花，分而四散，身服紫袍，以帛爲腰帶，好讀經史，解屬文，容止閑雅，可人。宴之麟德殿，授司膳卿而還。

開元初，又遣使來朝，因請士授經，詔四門助教趙元默就鴻臚教之。乃遣元默闢幅布，以爲束脩之禮。題云白龜元年調布，人亦疑其僞爲題，所得賜賚，盡市史籍，泛海而還。其偏使朝臣仲滿，慕中國之風，因留不去，改姓名爲朝衡，歷仕左補闕，終右常侍安南都護。

### 師子國

師子在西南大海中洲。宋始朝貢。其洲中有山名稜伽。多奇寶。古佛遊處。國中有王以一善化人。皆以清淨學道爲勝。

天寶五載正月。王尸羅迷伽遣使至。獻大珠。鈿金寶瓔珞。及貝葉鈔寫大般若經一部。細白氎四十張。

### 多蔑國

多蔑居大海之北。周迴可兩月行。南至海西俱遊國。北波刺國。東真陀洹國。其王姓摩伽。名失利。戶口極衆。置三十州。又役屬他國。有城郭樓櫓。宮殿並瓦木。常侍衛兵可四千人。雖有弓箭刀楯甲鞘。而無戰陣。有刑典書記。及婚聘之禮。事佛及神。亦以十二月爲歲首。畜有犀象馬牛。果有檳榔子。其桃棗瓜李及園蔬五穀。與中國不殊。

### 多福國

龍朔元年八月。其王難婆修彊宜說。遣朝貢使至。

### 耽羅國

耽羅在新羅武州海上。居山島上。周迴並接於海。北去百濟可五日行。其王姓儒李。名都羅。無城隍。分作五部落。其屋宇爲圓牆。以草蓋之。戶口有八千。有弓刀楯稍。無文記。唯事鬼神。常役屬百濟。

龍朔元年八月朝貢使至。

拘婁蜜國

拘婁蜜在林邑之西。陸路三月行。山居饒象。並養之以供用。顯慶元年閏正月來朝貢。在盤盤致物國東南。海路一月行。南距婆利國十日行。東去不述國五日行。西北去文單國六日行。風俗物產與赤土國墮和羅國略同。

永徽六年八月遣使獻五色鸚鵡。

驃國

貞元十八年春正月。南詔使來朝。驃國王始遣其弟悉利移來朝。華言謂之驃。自謂突羅朱閣婆。人謂之徒里掘。自古來未嘗通中國。魏晉間有著西南異方志及南中八郡志者云。永昌古哀牢國也。傳聞永昌西南三千里有驃國。君臣父子長幼有序。然無見史傳者。今聞南詔異牟尋歸附。心慕之。乃因南詔重譯遣子朝貢。東北距南詔咩苴城六千八百里。凡去上都一萬四千里。在永昌故郡南二千餘里。其境東西三千里。往來通聘者。迦羅婆提等二十國。役屬者。道林王等九城。食境土者。羅君潛等二百九十八部落。東鄰真臘國。西接東天竺國。南溟海。北通南詔些樂城界。其王姓困沒長。名摩羅惹。其國相名摩訶斯那。其王近適。則輿以金繩牀。遠適則乘象。嬪御甚衆。侍御常數百人。其羅城構以甌篋。周一百六十里。壕岸

亦構以甌。相傳本是舍利佛。城內有居人數萬家。佛寺百餘區。其堂宇皆錯以金銀。渥以丹彩。地以紫鑛。覆以錦罽。其俗好生惡殺。其土宜菽粟稻粱。無麻麥。其治無刑名桎梏之具。犯罪者以竹五十本束之。復犯者笞其背。數止五。輕者止三。殺人者戮之。男女七歲則落髮。止寺依桑門。至二十歲不悟佛理。乃復爲居人。其衣服悉以白氎與朝霞繞腰而已。不衣繒帛。云出於蠶。爲傷生也。又獻其國樂。凡二十二曲。與樂工三十五人來朝。樂曲皆演釋氏經論之詞意。二十一年四月。封彌臣國嗣王樂道勿禮爲彌臣國王焉。咸通三年二月。遣使貢方物。

### 占卑國

大中六年十二月。占卑國佛邪葛等六人來朝。兼獻象。宰相魏謩以性不安中土。請還其使。從之。咸通十二年二月。復遣使朝貢。

### 雜錄

故事。西蕃諸國通唐使處。悉置銅魚。雄雌相合。各十二隻。皆銘其國名。第一至十二。雄者留在內。雌者付本國。如國使正月來者。齋第一魚。餘月准此。閏月齋本月而已。校其雌雄合。乃依常禮待之。差謬。則推按開奏。至開元一十六年十一月五日。鴻臚卿舉舊章奏曰。近緣突騎施背叛。蕃國銅魚。多有散失。望令所司復給。

貞觀二年六月十六日勅諸蕃使人所娶得漢婦女爲妾者並不得將還蕃。

四年三月諸蕃君長詣闕請太宗爲天可汗乃下制令後墮書賜西域北荒之君長皆稱皇帝天可汗諸蕃渠帥有死亡者必下詔册立其後嗣焉統制四夷自此始也。

二十一年三月十一日以遠夷各貢方物其草木雜物有異於常者詔所司詳錄焉。葉護獻馬乳葡萄房長二尺子亦稍大其色紫摩伽國獻菩提樹一名波羅葉似白楊康國獻黃桃大如鵝卵其色如金亦呼金桃伽毘國獻鬱金香葉似麥門冬九月花開狀如芙蓉其色紫碧香聞數十步華而不實欲種取其根罽賓國獻俱物頭花其花丹白相間而香遠聞伽失畢國獻泥樓鉢羅花葉類荷葉圓缺其花色碧而蕊黃香芳數十步健達國獻佛土葉一莖五葉花赤中心正黃而蕊紫色泥婆羅國獻波稜菜類紅藍花實似蒺藜火熟之能益食味又酢菜狀如菜闊而長味如美鮮苦菜狀如苣其葉闊味雖少苦久食益人胡芹狀如芹而味香渾提葱其狀如葱而白辛嗅藥其狀如蘭凌冬而青收乾作末味如桂椒其根能愈氣疾薛延陀獻拔蘭鹿毛如牛角大如覆西蕃突厥獻馬蹄羊其蹄似馬波斯國獻活褥蛇其狀如鼠而色青身長七八寸能入穴取鼠西蕃咄祿可汗獻金卵鷄鷓鳥鷓也雕刻作禽獸而塗以金西蕃胡國出石蜜中國貴之太宗遣使至摩伽佗國取其法令楊州煎蔗之汁於中廚自造焉色味逾於西域所出者葡萄酒西域有之前世或有貢獻及破高昌收馬乳葡萄酒實於苑中種之并得其酒法自損益造酒酒成

凡有八色。芳香酷烈。味兼醍醐。既頒賜羣臣。京中始識其味。

天寶二年四月二十五日。上因問諸蕃諸國遠近。鴻臚卿王忠嗣上言曰。臣謹按西域圖。陀拔恩單國。在疎勒西南二萬五千里。東至渤海國一月程。西至沮滿國一月程。南至羅刹支國十五日程。北至海兩月程。羅刹支國。東至都盤國十五日程。西至沙蘭國二十日程。南至大食國二十日程。北至陀拔國十五日程。都盤國。東至大食國十五日程。西至羅刹支國十五日程。南至大食國二十五日程。北至渤海國一月程。渤海國。東至大食國兩月程。西北至岐蘭國二十日程。南至都盤國一月程。北至大食國一月程。河沒國。東至南陀拔國十五日程。西北至岐蘭國二十日程。從南至沙蘭國一月程。從北至海兩月程。岐蘭國。東南至河沒國二十日程。西至大食國兩月程。南至沮滿國二十日程。北至海五日程。涅滿國。東至陀拔國一月程。西至大食國兩月程。南至大食國一月程。北至岐蘭國十日程。沙蘭國。東至羅刹支國二十五日程。南至大食國二十五日程。北至涅滿國二十五日程。石國。東至拔汗那國一百里。西南至東米國五百里。屬賓國。在疎勒西南四千里。東至俱蘭陀國七百里。西至大食國一千里。南至婆羅門國五百里。北至吐火羅國二百里。東米國。在安國西北二千里。東至碎葉國五千里。西南至石國一千五百里。南至拔汗那國一千五百里。史國在疎勒西四千里。東至俱蜜國一千里。西至大食國二千里。南至吐火羅國一百里。西北至康國七百里。

證聖元年九月五日勅蕃國使入朝其糧料各分等第給南天竺北天竺波斯大食等國使宜給六箇月糧尸利佛誓真臘訶陵等國使給五箇月糧林邑國使給三箇月糧

聖歷三年三月六日勅東至高麗國南至真臘國西至波斯吐蕃及堅昆都督府北至契丹突厥靺鞨並爲入番以外爲絕域其使應給料各依式

開元四年正月九日勅靺鞨新羅吐蕃先無里數每遣使給賜宜準七千里以上給付也  
大歷十四年七月詔迴紇諸蕃住京師者各服其國之服不得與漢相參

### 歸降官位

顯慶三年八月十四日置懷德大將軍正三品歸化將軍從三品以授初投首領仍隸屬諸衛不置員數及月俸料

總章元年十一月授婆羅門盧伽逸多懷化大將軍

貞元十一年正月十九日置懷化大將軍正三品每月料錢四十五千文雜料三十五千文歸德將軍從三品料錢四十千文懷化中郎將正四品料錢三十七千文歸德中郎將從四品料錢三十五千文懷化郎將正五品料錢三十二千文歸德郎將從五品料錢三十千文懷化司階正六品料錢二十五千文歸德司階從六品料錢二十三千文懷化中候正七品料錢十八千文歸德中候從七品料錢十七千文懷

化司戈。正八品。料錢十五千文。歸德司戈。從八品。料錢十四千文。懷化執戟長上。正九品。料錢十一千文。歸德執戟長上。從九品。料錢十千文。勅準六典。應投幕蕃官。前承未置。今蕃人向化。近日漸多。名位高卑。須有等級。其增置官品及料錢等。宜依前件。其月。以歸降吐蕃論乞髯湯沒藏悉諾肆爲歸德將軍。會昌二年八月。制歸義軍使。特進檢校工部尙書兼右金吾衛大將軍同正。懷化郡王。嗚沒斯。賜姓李。名思忠。冠軍大將軍。左衛大將軍同正。寧邊郡公。歷支。賜姓李。名思正。冠軍大將軍。左衛大將軍同正。昌化郡公。習聞。賜姓李。名思義。冠軍大將軍。左衛大將軍同正。寧朔郡公。烏羅思。賜姓李。名思禮。守右領軍大將軍同正。寧塞郡公。受邪勿。可檢校右散騎常侍。右領軍衛大將軍同正。充歸義軍副使。仍賜姓李。名宏順。制李思正弟。冠軍大將軍。右驍衛大將軍同正。昌化郡公。李思義母。可封鴈門郡君。李思忠男。封中散大夫。檢校殿中少監。仍賜紫金魚袋。賜名繼美。

天祐元年六月。授福建道佛齊國入朝進奉使都番長蒲訶粟寧遠將軍。



